


TIMAAN

 Mahimo na kamo makapanglingkod. Maayong buntag, sa tanan! Nalipay ako nga maania sa bulahaton sa Ginoo karong buntaga, balik na usab sa...Wala ko kabalo kon makabalik pa ba kami o dili, apan naghatag ang Ginoo og pamaagi, ug nakabalik kami alang sa panerbisyo karong adlawa. Karon nagapaabot kita sa maanindot nga mga kahigayonan karong adlawa, niining buntaga, sa niining leksyon pang-Sunday school, diha sa Pulong. Ug unyang gabii aduna na usab og panerbisyo alang sa pagpang-ayo, og panerbisyo sa komunyong pagkahuman niana.

² Ug karon aduna kita og usa—usa ka paghalad sa bata, Nagtoo ko nga ang...Giingnan ako ni Igsoong Neville nga adunay gustong maghalad sa ilang bata. Ug kung gusto na nilang dalhon ang maong bata, sige. Ug magpabilin ang atong igsoong lalaki, o ang pipila kanila, diha sa organ o piano, bisan asa man niini. Ug dayon dalhon na dinhi ang maong bata. Ipahigayon na nato ang maong panerbisyo sa paghalad; aron nga makasugod na kita mismo, dihadiha dayon, sa Pulong.

³ Tungod kay, gusto nato nga—nga moadto na sa Pulong. Kana—kana ang pinaka-nahaunang butang, ihatag ang atong panahon eksakto ngadto sa Pulong sa Ginoo. Busa mapasalamaton gyud kami tungod sa kahigayonan nga mahimamat kamong tanan dinhi karong adlawa, ug sa...ug sa niining—niining panerbisyo.

⁴ Nasayup gyud ko. Okey lang, igsoon. Ako—ako—abi ko anaa na. Mahimong nasayup ra ko. Okey. Karon, salamat gyud, kanimo, bisan pa. Kini tingali, sa hunahuna ko niini miagi pa sa uban, miagi pa sa uban, ug medyo nga maoy nagpalisud niini.

⁵ Karon maayo ba ang tanan? [Nagaingon ang kongregasyon, “Amen.”—Ed.]...?...Dalaygon ang Dios!

⁶ [Nagaingon si Igsoong Neville, “Paanhi na sila.”—Ed.] Karon, oh, oo, ania na ang gamay’ng mga bata. Pasayloa ko. Pasayloa ko. Sige, mahimo ka bang moduol, elder? [“Oo, sir.”]

⁷ Bueno, aba duha ka, buutan nga mga batang babaye, brown ang mga mata sa maong mga bata! Huh? Matahum siya. Unsay iyang ngalan? Tan-awa n’yo dinhi! [Nagaingon ang inahan, “Jennifer Lee.”—Ed.] Jenny? [“Jennifer Lee.”] Jennifer Lee. Unsay apelyido? [“Serept.”] Serept. Taga-asa man mo, Igsoong babayeng Lee? [“Versailles, Illinois.”] Versailles, Illinois. Maayo kaayo!

⁸ Karon, diha sa Biblia. Karon, kasagaran, sila—aduna sila og mga pagbautismo sa mga bata; wala kita nagatoo sa

pagbautismo sa mga bata, tungod kay wala pa man sila nakasala, kay bata pa sila kaayo. Apan nagatoo kita sa paghalad sa mga bata ngadto sa Ginoo. Karon ako ug ang elder magpandong og mga kamot diha sa maong gamay'ng bata. Jenny, unsa gani to ingon mo? [Nagaingon si Igsoong Neville, "Jennifer."—Ed.] Jennifer. Sige.

Iduko nato ang atong mga ulo.

⁹ Langitnong Amahan, ingon nga ginadala namo karong buntaga kining gamay nga bata, nga gihinganlan og Jennifer, nganha Kanimo, gidala siya sa inahan ug sa iyang mga paryente gikan pa sa halayo, aron nga ihalad sa Ginoo. Nahibalo kami nga gipandongan Mo kaniadto sa Imong mga kamot ang gagmay nga mga bata, sa Imong mga adlaw, ug—ug nga nag-ingon, "Pasagdi ninyo ang mga bata sa pagduol Kanako, ug dili ninyo sila pagdid-an, kay alang kanila ang Ginharian sa Langit." Karon ginahalad namo siya Kanimo, para sa usa ka kinabuhi nga pagpangalagad, sa Ngalan ni Jesus Cristo. Amen.

¹⁰ Unsa ang ngalan sa usa pa ka batang babaye? [Nagaingon ang inahan, "Connie Lynn."—Ed.] Connie Lynn. Sige, gamay nga Connie, gihimo mong, gipabati mo ako og medyo gamay. Unsa may, imong gihadlok? Oh, nahadlok ko nga medyo dili kini mahimo, inahan. Sige.

Iduko nato ang atong mga ulo.

¹¹ Ginoong Jesus, ginadala kanamo sa maong inahan kining gamay nga si Connie karong buntaga, diha sa usa ka buluhaton sa paghalad ngadto sa Makagagahum sa Tanan. Imong gihatag kaniya kini nga bata, aron padakuon, ug iya kining ginadala Kanimo, uban sa niining batang babaye. Nagaampo ako, Langitnong Amahan, nga maluoy Ka. Panalangini ang mao nga pamilya. Panalangini ang maong batang babaye. Sa diha nga among ginapandong ang among mga kamot diha kaniya, sa Ngalan ni Jesus Cristo, amo siyang ginahalad Kanimo alang sa usa ka kinabuhi nga pagpangalagad. Amen.

Panalanginan ka sa Dios, ug ang imong mga anak dinha.

Aba, aduna na kita og daghang mga gagmay'ng bata karon!

¹² Unsay ngalan niining gamay nga batang lalaki? [Nagaingon ang inahan, "Joel Lee Watson."—Ed.] Joel Watson. ["Joel Lee."] Joel Lee Watson. Pagka-guwapo nga bata, dakuon ug asul ang mga mata! Sus! Asa mo tanan gikan? ["Eastman, Georgia."] Gikan pa sa Georgia. ["Oo."] Abi ko gikan pa mo sa Habagatan. Wala ko kabalo nga. . . ["Bueno, taga-Tifton ang akong inahan. Didto kini sa ubos."] Oh, oo. Oh, kumusta! Usa kini ka buutan, nga batang lalaking taga-Georgia, kung ingon-ana, huh? Sige, sir. Oo, sir, maayo kaayo. Makasulti na siya, usab. Dili ba?

Iduko nato ang atong mga ulo.

¹³ Langitnong Amahan, among ginadala kining minahal nga batang lalaki, ingon nga ang inahan ug amahan niini nagatindog dinhi nga—nga bunga sa ilang pagkahiusa. Gihatag Mo kanila kining gamay nga batang lalaki aron padakuon, ug ila kining ginahalad balik Kanimo. Daw sa unsa ka—ka matahum nga talan-awon kini, nga sama kang Hannah, kaniadto, nga nag-ampo para sa usa ka anak; ug—ug gihatag sa Dios ang mao nga anak, ug iya kining gihatag balik didto sa templo sa Dios, sa paghalad. Itugot, Ginoo, nga kining batang lalaki mamahimong Imong alagad, aron mapanalanginan ang amahan ug inahan niini, ug nga magkaaduna og maayong panglawas ug kusog nga mapadaku kini. Ug hinaut nga magkinabuhi kini nga hataas, malipayon nga pagkinabuhi, ug nga mamahimong Imong alagad, sa diha nga amo kining ginatugyan Kanimo, sa Ngalan ni Jesus Cristo. Amen. (Panalanginan kamo sa Dios!) Ug himoa siya nga usa ka buutang lalaki, tingali usa na usab ka gamay'ng propeta sama ni Samuel.

¹⁴ Karon ania ang duha ka buutan nga mga batang lalaki. Uy! Tulo sila, kung ingon-ana? Bueno, ang tibuok kana nga pamilya. Unsay imong ngalan? [Nagaingon ang batang lalaki, "Michael."] Michael. Ug ang imo? [Nagaingon ang usa pa ka batang lalaki, "Paul."] Paul. Maanindot kaayo nga mga ngalan! Ug ang imoha? [Nagaingon ang batang babaye, "Debbie."] Debra. Pagkamaanindot niana. Michael, ug Paul, ug Debra. Ug unsay inyong apelyido? [Nagaingon ang amahan, "Ellis."] Ellis? ["Oo."] Bueno, pagkamaanindot niana nga pamilya, sultihan ta mo.

¹⁵ Kabalo mo, pagmakakita ako og gagmay'ng mga bata nga sama niana, ginapahibalik ako niini niadtong panahon nga usa pa ako ka bata. Ug nagaingon ang dugay nang panultihon, kabalo na mo, "Imong tiil ang ilang tamakan sa karon, ug sa ulahi imo nang kasingkasing," apan wala ako nagatoo nga mamaingon niana kini pag-gihalad na nato sila sa Ginoo. Aduna kami og katungdanan dinhi, ug gibutang kini sa Dios diha sa imong kamot. Gihimo ka sa Dios nga usa ka magwawali. Pirmi ako nagasulti mahitungod sa mga babayeng magwawali, kabalo na mo, apan magwawali ang matag inahan; ania ang iyang kongregasyon, kita n'yo, aron padakuon kining gamay nga mga bata sa husto, samtang nagatrabaho ang papa. Ug aduna ka'y katungdanan. Pareho kamong panalanginan sa Dios. Aduna kamo'y maayo kaayong pamilya.

¹⁶ Langitnon namong Amahan, nagaduol kami uban niining gamay nga si Michael, nga mao siguro ang kamagulangan. Ug ginapandong namo ang among mga kamot diha kaniya, sa paghalad kaniya, ngadto kang Jesus Cristo. Ginadala sa iyang pamilya ang ilang gagmay'ng mga bata tungod kay Imong gibutang kini diha sa ilang—ilang mga pag-atiman, ug nasayod sila nga kung sila lang dili sila igo, nga wala ang Imong

tabang, busa ilang ginadala ang gamay nilang pamilya, aron nga ihalad sila.

¹⁷ Karon akong ginahatag ang gamay nga si Michael dinhi Kanimo, alang sa usa ka kinabuhi nga pagpangalagad, sa Ngalan ni Jesus Cristo. Amo usab, ginapandongan og mga kamot ang bata nga si Paul, ug among ginahalad ang iyang kinabuhi ngadto kang Jesus Cristo, alang sa usa ka kinabuhi nga pagpangalagad para sa kahimayaan sa Dios. Ug diha usab kang gamay nga si Debra, ginapandongan namo siya og mga kamot, Amahan, diha sa paghalad, pagdumdum kang Jesus Cristo, Nga ginapandongan sa Iyang mga kamot kaniadto ang gagmay'ng mga bata, miingon, "Pasagdi sila sa pagduol Kanako; dili sila pagdid-an." Hinaut nga mapanalanginan ang kinabuhi sa niining gamay nga batang babaye diha sa Gingharian sa Dios.

¹⁸ Panalangini ang amahan ug ang inahan, ug hinaut nga magkinabuhi sila, sa hataas og malipayon nga kinabuhi, nga makita pa nila ang ilang mga anak nga nagapangalagad sa Dios. Ginahangyo namo kini nga mga panalangin para sa kahimayaan sa Dios, sa diha nga ginahalad namo sila sa Ngalan ni Jesus Cristo. Amen.

Panalanginan ka! Panalanginan ka! Usa kamo ka maayong, gamay'ng pamilya. Oo.

¹⁹ Daw sa unsa ka...Kabalo ba mo kung unsa ang ginahunahuna ko? Ang mga batang babaye, sa karon nag-anam pa katahum kay sa niadtong usa pa ako ka bata. Oo, sir. Pagkatahum sa iyang mga mata! Unsay iyang ngalan? [Nagaingon ang inahan, "Joanna."—Ed.] Joanna. Ug ang imong apelyido... [Nagaingon ang amahan, "Blair."] Blair, Joanna Blair. Ikaw nga nagatan-aw dinha dapit, dili ba siya usa ka munyeka? Oo, sir. Ug kumusta ka, Joanna, huh? Medyo maulawon, si Joanna, medyo maulawon lang. Pagkatahum nga bata.

Atong iduko ang atong mga ulo.

²⁰ Langitnon namong Amahan, kining pamilya sa mga Blair nakaangkon og niining regalo nga bunga sa ilang pagkahiusa, kining bata nga si Joanna. Ug nasayod kami nga dautan na ang mga adlaw, nga si Satanas anaa bisan asa, aron lang mangdaut, ilabina sa niining mga batang babaye. Ug nasayod sila nga kung sa ila lang dili sila igo aron—aron sa pagpadaku kaniya sa husto. Ug gusto nila siyang mapadaku sa husto, ug nga mamahimong alagad nganha Kanimo. Ug ilang padakuon kining batang babaye sa pagpasidungog Kanimo. Ug karon ila siyang ginadala, sa paghalad, diha Kanimo. Among ginapandong ang among mga kamot diha kaniya, sa Ngalan ni Jesus Cristo, sa diha nga ginahalad namo ang gamay nga si Joanna Blair ngadto sa Gingharian sa Dios, para sa kahimayaan sa Dios. Amen.

Panalanginan ka, Igsoong Blair. Magauban ang Ginoo kanimo.

²¹ Maayong buntag, sir! [Nagaingon ang amahan, “Maayong buntag!”—Ed.] Pagkaguwapo niini nga bata! Dong, kumusta ka? Bueno, sus, mas guwapo ka kon *dinhi* ka dapit. Oo, sir. Aduna ka’y maayo, nindot, og gamayon nga ulo, ug nawong nga gabagay usab niini. Huh? Unsay iyang ngalan? [“Daniel Mark.”] Daniel Mark. Ug ang imong apelyido? [“Mark Kardum.”] Kardum. [“Kardum.”] Kardum, Daniel Mark Kardum.

²² Taga-dinhi ka ba, Igsoong Kardum? [Nagaingon si Igsoong Kardum, “Sa karon, sa siyudad sa Melkerk.”—Ed.] Oo, sir. Taga-asa man diay ka? [“Taga-New York gyud ko.”] Estado sa New York, usa ka Yankee, husto. [“Oo.”] Bueno, usa kini ka maanindot nga estado. Aduna ko’y pipila ka mga paryente nga nagapuyo didto. Ang uyoan ko nagapuyo didto sa Plattsburgh. Oh, nalingaw gyud ko og ayo didto sa New York. Paingon na usab ko didto sa sunod ko nga panagtigum, sa Siyudad sa New York, didto sa The Stone Church. Sige.

²³ Karon, Mark ang iyang ngalan, ingon mo? [Nagaingon ang amahan, “Daniel Mark.”—Ed.] Daniel Mark, pagkaguwapo nga bata!

Iduko nato ang atong mga ulo.

²⁴ Ginoong Jesus, ginadala namo Kanimo ang bata nga si Daniel Mark, sa paghalad sa iyang kinabuhi. Gihatag kini diha sa mga kamot sa amahan ug inahan, aron padakuon kini nga bata diha sa pagpahamatngon nga iya sa Ginoo. Ug nasayod sila nga kung sila lang dili sila igo, busa ginadala nila kini Kanimo, Ginoo, nga Imong panalanginan ang iyang kinabuhi. Ug, karon, ug nasayod kami nga dautan na ang panahon, nga among gikapuy-an. Makita namo kining gamay nga mga bata, wala gyud kami nahibalo kung unsay mahitabo sa umalabot, apan, bisan unsa man kini, ginasalig namo sila nganha sa Imong kamot. Ginapandongan sa among mga kamot kini nga batang lalaki, ug ginahalad ang iyang kinabuhi nganha Kanimo, alang sa usa ka kinabuhi nga pagpangalagad diha sa Gingharian sa Dios, sa Ngalan ni Jesus kami nagaampo. Amen.

²⁵ Panalanginan ka sa Dios, igsoon. Buutan siya nga bata. Ug panalanginan ka, batang Mark.

Oh . . . them in, bring them in,
Bring them in from the fields of sin;
Oh, bring them in, bring them in,
Bring the little ones to Jesus.

Maanindot kana! Salamat, igsoong babaye.

²⁶ Pila ba kaninyo ang ania niadtong Domingo, nga naiampo niadtong miaging Domingo, nga nabati ang resulta ug nabati

nga giayo na kamo? Ipataas ang inyong mga kamot, kadtong naiampo na. Oh, sus, tan-awa dinhi, halos tanan sila.

²⁷ [Nagaingon si Igsoong Neville, “Alleлуйah! Pagkahibulongan niana! Dalaygon ang Dios! Sige-sige kong may madungog niini, tibuok semana.”—Ed.] Oo, sir. Ako, pud. Gusto ko lang maglingkod, maminaw, kita n’yo.

²⁸ Kita n’yo, may usa ka butang nga nagakahitabo, kana’y akong isulti kaninyo sa sunod na busa, karon, kita n’yo, kini—mahimayaon gyud kini ug makahibulong. Ug kon atong. . . Paghisgotan nato kini, sa sunod nga mga panagtigum, kabalo na mo, sa umalabot. Gasugod na kini nga nagakahitabo, ug mapasalamaton gyud kita tungod niini.

²⁹ Ug didto na ako sa Kentucky, sama sa ginabuhat ko kada tuig, nagaadto ako didto. Kauban ang pipila sa mga higala ko didto. Ug dili kini pagpangayam lang tanan og mga squirrel, ug nakahibalo kamo niana, kita n’yo.

³⁰ Busa aduna lang kita’y mahimayaong panahon, ug mapasalamaton gyud kita sa Ginoo!

³¹ Kinahanglan ko karon nga mobiyahe, kinahanglan kong mopauli pagkahuman niining tigum. Ug dayon, ug kami. . . Dayon mobalik na usab, pagkahuman, aron magbiyahe paingon sa New York para sa usa ka panagtigum. Ug kung makahigayon kami nga makaagi kadiyut, aba, kami—malipay kami nga magkaaduna og usa na usab ka panagtigum dinhi sa tabernakulo.

³² Ug dayon mobiyahe na usab balik, paingon sa Shreveport. Ug dayon mopauli na, ug tuyoon nga maania dinhi sa tibuok bakasyon, kon itugot sa Ginoo, dalhon dinhi balik ang akong pamilya. Ug dayon—ug dayon gusto kong. . .

³³ Dayon ipahigayon ang akong panagtigum didto sa Phoenix, sa Enero. Kada tuig kini nga tigum didto para sa Christian Business Men. Ug mga usa ka semana o napulo ka adlaw sa wala pa kana, paninguhaon ko nga—nga maabangan kanang dakung. . . Ang Jesus Name nga mga tawo; kang Igsoong Garcia kini kaniadto, ug ang—ang maong Katsilang igsoon aduna didto og usa ka maanindot, daku nga tigumanan didto. Bag-o lang nila kadto gitukod. Pipila ka libo ka mga tawo ang mosigo niini, bag-o kaayo, ug gamay ra ang ilang kongregasyon. Nag-ingon sila kanako nga mahimo ko kono abangan kini sa unsa mang oras nga gusto ko. Imbis nga magpahigayon og usa—usa ka tinagsatagsa, nga libuton pa ang walog, gikan sa usa ka simbahan ngadto usab sa usa pa ka simbahan, siguro tingubon ko na lang tanan diha sa usa ka dakung panagtigum, nakita n’yo, ug dayon ipahigayon kini didto.

³⁴ Ug dayon mahimo natong abangan ang maong templo. Hibaloon nato karon kung mahimo kaha nato, ug dayon ipahigayon ang maong Christian Business Men’s Convention.

Dayon, pagnaplastar na ang akong pagbiyahe sa gawas sa nasud, sulayan nato magpahigayon og mga panagtigum didto sa tibuok Habagatan, para sa Enero, ug Pebrero, ug sa Marso, didto sa tibuok Habagatan nga mga lugar. Ug dayon—dayon paingon na . . . tungod, kung sugdan nato karon ug magbiyahe na didto sa Aprika . . . Kita n'yo, kining panahon sa Pasko, para kanila, ikaupat sa Hulyo. Kita n'yo, kini—ting-ulan kini ug dili maayo, ug dili ka makabiyaha didto nianang panahona, busa ang pinakamaayong higayon sa pag-adto didto maoy sa sunod na. Ug dayon gusto nato magsugod, kon mahimo nato, didto sa Norway, ug palibot sa kalibutan, ug mamuhat didto sa Aprika, ug humanon kini didto, kon itugot sa Ginoo.

³⁵ Apan iampo gyud kami karon. Ug gimahal kamo namo, ug nahibalo kamo niana. Busa nagapaabot kita alang sa labing madagayaon, nga labaw pa sa tanan nga mahimo nato, o mahunahuna nga mahimong buhaton sa Ginoo.

³⁶ Ug nagatoo kita, karong gabhiona, nga magkaaduna og usa ka dakung panerbisyo sa pagpang-ayo. Nagatoo ako nga magkaaduna og . . . Mowali lang ako og gamay, tungod kay aduna kita og komunyong karong gabhiona. Ug busa sa mga baynte o traynta minutos, aduna kita og linya sa pagpaampo, ug—ug pagkahuman dayon niana, ipahigayon nato ang—ang komunyong. Ug ginaabiabi kamo sa pagpabilin uban kanamo; malipay kami niana. Wala kami nagapahigayon og usa—usa ka komunyong nga para sa amo lang. Para kini sa matag magtotoo, sa matag magtotoo.

³⁷ Ug sa dili pa ako mobasa og Kasulatan, mahimo ba nga iduko nato ang atong mga ulo sa kadali. Hangyoon ko ang buutan kong higala, si Igsoong Lee Vayle, kon mahimo bang pangunahan niya kita sa pag-ampo, nga panalanginan sa Dios ang Iyang Pulong. Igsoong Vayle, mahimo bang buhaton mo kana para kanamo?

[Si Igsoong Vayle karon nagaampo—Ed.] Amen. Itugot kini, Ginoo. Itugot kini, Ginoo. Itugot kini, Ginoo. Oo, Ginoo. Amen.

³⁸ Karon sa maalampoon, matinahuron nga paagi atong duolon ang Pulong. Karon gusto kong magbasa, ning buntaga, gikan sa ika-12 nga kapitulo sa Exodo, ug sugod sa ika-12 nga bersekulo, ang ika-12 ug ika-13 nga bersekulo, lakip tanan. Ug paminawa og ayo karon. Ug dayon sa dili pa ang pag-komunyong karong gabhiona, basaha ninyo ang ika-12 nga kapitulo sa—sa Exodo, ang tibuok kapitulo niini; kay sa ika-11 nga bersekulo dinhi mao ang pagpangandam alang sa pagpanaw, ug ang komunyong sa dili pa ang maong pagpanaw. Ug atong hisgotan kini karon sa matinahuron gayud nga paagi. Karon ang ika-12 nga bersekulo sa ika-12 nga kapitulo.

Kay molakaw ako niadtong gabhiona latas sa yuta sa Egipto, ug patyon ko ang tanan nga panganay sa yuta sa Egipto, tawo ug mananap usab; ug magahukom ako

batok sa tanan nga mga dios sa Egipto: Ako mao ang GINOO.

Ug ang dugo timaan sa balay diin kamo magapuyo: ug kung makita ko ang dugo, molabay ako sa ibabaw kaninyo, ug walay kamatay nga moabot kaninyo, sa diha nga patyon ko ang mga panganay sa yuta sa Egipto.

³⁹ Hinaut nga panalanginan sa Ginoo ang Iyang Balaan nga Pulong!

⁴⁰ Karon gusto kong mokuha og teksto gikan dinha, lima ra ka letra nga pulong: *Token [Timaan]* Timaan! Gusto kong maghisgot mahitungod sa maong pulong, o magtudlo niining leksyon pang-Sunday school, mahitungod sa pulong nga “timaan.” Nag-ingon ang Biblia dinhi, “Ug ang dugo mamahimong timaan alang kaninyo.” Ug gusto natong gamiton ang maong pulong nga “timaan.”

⁴¹ Karon dili kita mahibalo; pagmotan-aw ako sa orasan, ug kung oras na ba, bueno, kini. . . Aduna ko’y daghan, daghang mga Kasulatan nga naisulat dinhi. Busa aron dili. . . Ug kabalo ko nga dili ako makauban ninyo sa hamubong panahon. Ug unsaon man nato pagkahibalo nga dili kini mao na ang ulahing higayon nga magkita-kita pa kita sa usa’g usa, busa duulon nato Kini sa ingon gayud ka matinahuron nga paagi. Kabalo ko nga malisud kini. Naghatag kanato karon ang Ginoo og usa ka maanindot nga buntag, usab—usab, para sa panerbisyo, maanindot gayud. Ug paninguhaon natong paminawon gayud ang tanan nga—nga pagahisgotan nato, aron nga ang. . . kon aduna ma’y butang dinha nga gustong ipahibalo sa Ginoo kanato, nga mahatag gyud kini kaninyo.

⁴² Ug wala kita nagatambong dinhi aron lang nga makita. Wala kita nagaanhi aron lang nga makita sa uban kung unsa nga sinina ang atong ginasul-ob. O. . . Kita, nagaanhi kita tungod sa usa ra ka butang, sama sa giampo sa atong igsoon kadtong pag-ampo, “Ania kami aron nga maminaw sa Pulong, sa Pulong nga nagaabot kanamo.” Gusto nato Kana, kay kana ang mao ra nga butang nga may kahulogan para kanato, butang nga may kamahinungdanon, butang nga—nga makatabang kanato.

⁴³ Ug mga binuhat kita nga paingon sa kamatayon. Ang tanan nga tawo paingon ngadto sa Eternidad. Ug kung ingon-ana aduna kita niining ingon ka taas nga panahon aron maghimo sa atong mga pagdesisyon kon asa ba kita nga direksyon paingon. Ug anaa sa atong atubangan ang mao nga dalanon; mahimo natong pilion kon asa nga dapit niini ang gusto natong lakwan. Sa ingon niana nga paagi Niyang gibutang si Adan ug si Eva, ug sa ingon niana nga paagi Niya kita gibutang.

⁴⁴ Ato kinahanglan hinumduman, nga bisan unsa pa ang atong ginabuhat, o bisan unsa pa kita ka malampuson, sa kinabuhi, pagwala si Cristo nawala kanato ang tanan-tanan. Busa kung

Siya, human nga . . .kung Siya lang gayud ang mahimo natong lauman, kung ingon-ana mamahimo kitang pinaka-buangbuang nga mga tawo sa dili pagdawat Niini, mahimo gyud, ug—ug ang mahalon Kini. Dili lang nga dawaton Kini, kondili nga mas sobra pa kay niana. Human nga naangkon mo Kini, dili lang nga dawaton mo Kini ug ibutang Kini diha sa panang-atan. Kinahanglan nga gamiton Kini.

⁴⁵ Sama nga nagaadto ka sa doktor para makakuha og tambal, ug dayon ibutang mo lang kini diha sa panang-atan. Kung miadto ka aron makakuha og tambal, tumara ang mao nga tambal. Kung adunay balatian nga nagaprotekta kanimo, ug kini nga tambal mao ang makatabang kanimo, tumaron mo kung unsa ang gihatag niya kanimo; ug sa paagi gayud nga pagkareseta niya niini, tungod kay usahay sa pila lang ka minuto nga diperensiya daku na ang kalainan. Ug unsaon man nato pagkahibalo. . .

⁴⁶ Apan sa niining kaso, sa karon, usa ra ka gutlo sa imong pagdesisyon mahimong mao na ang magbuut sa imong Eternal nga paingnan. Dawata Kini sa ingon ka eksaktong paagi nga pagkahatag Niya Niini kanimo.

Usa ka timaan, “Ang dugo mamahimong usa ka timaan alang kaninyo.”

⁴⁷ Karon unsa man, usá, ang timaan? Usa kini ka pulong nga kasagaran gigamit sa mga tawo nga ang sinultihan English, ilabina dinhi sa Amerika. Ang timaan usa ka . . .Sa tinuod, ang diksyunaryo nagaingon nga ang timaan usa ka timailhan, timailhan sa usa ka pasahe, presyo nga gibayaran na, kita n’yo; nga ang—ang pasahe, o ang bili, usa ka gibayaran na nga bili nga gikinahanglan.

⁴⁸ Sama sa pasahe sa tren o pasahe sa sakyanan. Adto ka ug palit ka sa imong—imong pasahe, ug dayon hatagan ka nila og usa ka timaan niini, ug kana nga timaan dili mahimong ipalit sa kung unsa pa man kondili para lang gyud nianang biyahe sa tren. Ug usa kini ka timaan, para nianang kumpanya sa tren, nga gibayaran mo na ang imong pasahe. Usa kini ka timaan, ug dili mo puede ipalit kini sa kung unsa pa man. Dili kini mahimong dawaton sa bisan unsa man nga laing ruta sa biyahe. Magpulos lang kini nianang ruta. Ug kini usa—usa ka timaan.

⁴⁹ Karon dinhi, sa atong ginahisgotan, nagasugod kita kon diin, ang Dios nagaingon sa Israel, “Ang dugo sa karnero usa ka timaan alang kaninyo.” Ang karnero sa Israel, nga gipatay, mao kaniadto ang gikinahanglan nga timaan ni Jehovah. Kinahanglan nga dugo gyud. Naghimo kaniadto ang Dios og usa ka timaan ug gihatag kini ngadto sa Israel. Ug wala na’y uban pa nga timaan ang mahimong magpulos, kita n’yo, dili kini ilhon.

⁵⁰ Para sa kalibutan, usa Kini ka pundok sa binuang. Apan, alang sa Dios, kini lamang ang bugtong paagi. Ang

bugtong butang nga Iyang gikinahanglan mao kanang Timaan. Kinahanglan nga anaa Kini dinha. Ug maangkon mo lang ang maong Timaan pag-nabayaran na ang pasahe, dayon usa na ikaw ka tag-iya sa maong Timaan nga maoy nagahatag kanimo sa—sa pribilehiyo nga makasakay na. “Kung makita Ko ang Dugo, molabay Ako ibabaw kaninyo.” Pagkamaanindot nga kahigayonan, kana, pagkamaanindot nga pribilehiyo, ang mahibaloan mo nga dala-dala mo, sa sulod nimo, ang Pasahe. “Kung makita Ko ang Dugo, molabay Ako ibabaw kaninyo.” Mao lang kana nga butang ang Iyang pagailhon. Wala na’y uban pa ang mamahimong puli Niini; walay kapuli, walay denominasyon, walay bisan unsa pa man. Kana lang gyud ang gikinahanglan. Nag-ingon ang Dios, “Kana lang gyud ang pangitaon Ko.”

⁵¹ Bisán unsa pa sila kamatarung kaniadto, unsa pa sila ka maayo, unsa pa ka taas nga edukasyon aduna sila, unsa pa ka mindot ilang sinina, ang timaan lang gayud ang gikinahanglan. “Kung makita Ko ang timaan, molabay Ako ibabaw kaninyo.” Ang dugo mao ang timaan nga ang—ang gikinahanglan ni Jehovah natagbo, nga nasunod kini. Ang dugo mao ang nagrepresentar sa timaan. Ang dugo mao ang timaan. Kita n’yo? Ang kinabuhi nga . . .

⁵² Nag-ingon ang Dios nga, “Sa adlaw nga kamo mokaon niini, sa nianang adlaw kamo mamatay.” Ug adunay usa ka pangpuli nga kinabuhi nga gibayad puli sa kinabuhi sa magtotoo. Ang Dios, tungod sa kalooy, midawat og usa ka pangpuli para sa kinabuhi sa tawong sad-an. Sa diha nga ang Iyang anak naghugaw sa kaugalingon niini tungod sa sala, sa dili-pagtoo sa Pulong, ang Dios dayon, nga madagayaon sa kalooy, naghimo og usa ka pangpuli; ug, kadto maoy, butang nga gikinahanglan mamatay puli sa lugar niini. Wala na’y laing uban pa ang mahimong magpulos.

⁵³ Mao kana kon ngano nga ang mga mansanas ug mga peras ni Cain, ug uban pa, wala magpulos. Gikinahanglan niadto ang dugo nga may kinabuhi niini, ug migawas ang kinabuhi gikan sa halad, ug karon ang dugo mao ang timaan nga ang gisugo sa Dios gituman. Karon, unsa man ang gikinahanglan sa Dios? Ang kinabuhi; ug ang dugo maoy nagpakita nga aduna gyu’y kinabuhi nga nawala. Busa ang dugo mao ang timaan nga gihalad na ang kinabuhi, nga adunay namatay, nga gikinahanglan sa Dios; nga usa ka kinabuhi ang gihalad na, ug nga giula na ang dugo. Ug ang maong dugo nagrepresentar alang sa timaan, nga nawala na ang kinabuhi. Ang kinabuhi sa mananap nga gihisgotan sa Dios nga gikinahanglan ihalad, mao ang dugo nga nagrepresentar alang sa timaan. Kita n’yo?

⁵⁴ Ang—ang—ang magtotoo nga magsisimba maila diha sa iyang halad, pinaagi sa timaan. Dili ko gustong mopabilin og dugay sa niining gamay nga mga kinutlo, apan, mahimo mong

gamiton ang tibuok panerbisyo bahin sa usa ra sa mga niini, apan gusto kong mohunong dinhi sa kadali aron sa pagpahayag niana. Ang—ang—ang magtotoo kinahanglan nga maila diha sa iyang halad. Kita n'yo? Kon kini usa ra ka halad ug—ug gipatay sa kung asa didto, kinahanglan niyang ihalad kini; apan kinahanglan nga maila siya diha niini. Sa tinuod, kinahanglan niyang ipatong ang iyang mga kamot ibabaw niini, usá, aron nga mapaila niya ang iyang kaugalingon uban sa iyang halad. Ug dayon ipahimutang ang dugo kon diin nga mahimo siyang motindog ilalum sa maong dugo. Kinahanglan nga ang dugo napaibabaw kaniya. Ug kana mao ang timaan nga ginapaila niya ang iyang kaugalingon, nga sad-an, ug nagpamatuod nga usa ka inosenteng puli ang mikuha sa iyang lugar.

⁵⁵ Pagkamaanindot nga hulagway! Oh, usa ka tinubos na! Kita n'yo, hustisya nga gibayaran na, ug natagbo na ang gikinahanglan sa balaan nga hustisya sa Dios. Ug miingon ang Dios, “Karon gikinahanglan Ko ang pagbayad sa inyong kinabuhi,” ug kung ingon-ana, sa diha nga ang—ang—ang maong kinabuhi nakasala. Usa ka inosenteng puli dayon ang mipuli sa lugar niini. Ug dugo kadto sa mananap; dili mansanas, peras. Walay duhaduha nga ginapahimo niana og klaro kaayo sa tanan ang binhi sa serpente, nga dugo gyud kadto. Ug kini nga dugo, nga dili mahimong nagagikan sa prutas, nagagikan sa usa ka inosenteng puli. Ug ang kinabuhi niini gihalad, usab—usab, puli sa iyang lugar, ug ang dugo mao ang simbolo nga namatay ang mananap ug nga migula ang dugo niini.

⁵⁶ Ug ang magsisimba ingon nga ginaaplikar ang dugo ngadto sa iyang kaugalingon, nagpakita nga naipaila siya diha sa pagtubos, tungod nga gipaila niya ang iyang kaugalingon diha sa . . . sa halad, gihilambigit niya ang iyang kaugalingon ngadto sa maong halad, ug nagrepresentar ang dugo ingon nga mao ang timaan.

⁵⁷ Daw sa unsa—daw sa unsa ka maanindot gayud! Pagkamaanindot nga hulagway! Usa kini ka hingpit nga tipo ni Cristo, ingon ka eksakto, nga ang magtotoo sa karon nagapabilin ilalum sa giula nga Dugo, naipaila uban sa mao nga Halad. Ingon niini gayud kini—kini ka hingpit ug kung unsa nga si Cristo, dili—dili ingon nga usa ka mananap. . . Nakita n'yo, ang—namatay ang mananap, apan kadto'y . . .

⁵⁸ Ang pinaka-inosenteng butang nga aduna kita, siguro, mao, ang—ang mananap, nga—nga karnero. Sa diha nga gusto sa Dios nga ipaila si Jesus Cristo, gipaila Niya Siya ingon nga usa ka Cordero. Ug sa diha nga gusto Niyang ipaila ang Iyang Kaugalingon, gipaila Niya ang Iyang Kaugalingon ingon nga usa ka langgam, usa ka Salampati. Ug ang salampati mao ang pinaka-inosente ug pinaka-limpyo sa tanang kalanggaman, ug ang—ang karnero mao ang pinaka-inosente ug dalisay sa tanang mga mananap. Busa nakita n'yo nga sa diha nga . . .

59 Gibautismohan kaniadto ni Juan si Jesus, ug nag-ingon ang Biblia, “Ug—ug nakita niya ang Espiritu sa Dios, nga sama sa usa ka salampati, nga mikunsad Kaniya.” Busa kung usa pa kadto ka . . . Kung usa pa kadto ka lobo, o kung uban pa nga mananap kadto, ang—ang kinaiyahan sa salampati wala unta mibagay sa kinaiyahan sa lobo, dili usab mahimo nga ang—ang kinaiyahan sa salampati mobagay sa laing uban pa nga mananap gawas sa karnero. Ug kadtong duha ka mga kinaiyahan nagkasagol, dayon nagkauyon ang usa’g usa niini.

60 Karon makita ba ninyo diha ang predestinasyon? Usa kadto ka karnero sa miabot kini didto. Kita n’yo? Kita n’yo? Ang . . . Usa kadto ka karnero sa diha nga kadto—sa diha nga gidala kini didto. Usa kadto ka karnero. Gipanganak kadto nga usa ka karnero. Gipadaku kadto, nga usa ka karnero. Kita n’yo?

61 Ug, busa, kana ang mao lang nga matang sa matuod nga Espiritu nga makadawat sa Pulong, nga makadawat kang Cristo. Ang tanang uban pa kanila maninguha, naninguha aron madawat Kini, ug nga ibutang ang Espiritu sa Dios diha sa usa ka lobo, kita n’yo, masuk-anon, dili-maayo, dautan. Dili Kini mopabilin dinha. Molupad gayud palayo ang Balaang Espiritu. Dili Niini mahimo kini.

62 Unsa kaha kung kadto nga Salampati mikanaug, ug, imbis ingon nga usa ka Karnero Kini, ang atua didto maoy laing mananap? Dalidali na unta Kadto milupad palayo ug mihawa. Kita n’yo? Apan sa nakaplagan Niya kadto nga kinaiyahan mahimo Siyang moipon, nahimo Kadto nga Usa Ra.

63 Ug dayon ang—ang—gipangunahan na sa Salampati ang Karnero, ug, himatikdi, giagak Niadto ang Karnero paingon sa ihawan. Karon, nagmasinugtanon ang Karnero ngadto sa Salampati. Kita n’yo? Bisan asa pa Siya agakon Niadto, andam Siya sa pagsunod.

64 Unsa kaha, karon, sa diha nga ginapangunahan kita sa Dios ngadto sa usa—usa ka kinabuhi nga bug-os ang pagtugyan ug pagpangalagad Kaniya, unsa kaha kung ang mga espiritu na nato usahay wala nagarebelde, nga medyo nagapakita og ingon niana, gahunahuna ko kung mga karnero ba kaha kita? Kita n’yo? Kita n’yo? Masinugtanon ang karnero.

65 Ang karnero nagahalad sa iyang kaugalingon. Kini—kini wala—kini wala nagapangangkon, dili gani angkonon ang iyaha na. Mahimo mo mismong ipahigda kini ug alutan ang mga balhibo niini. Kana lang ang butang nga aduna siya. Kini wala—wala gayud nagareklamo bahin niini; basta ihalad lang niya ang tanan nga aduna siya. Ingon niana ang karnero. Ginahatag ang tanan-tanan ngadto sa . . . ginahatag ang tanan-tanan, ang iyang kaugalingon ug ang tanan na niini.

66 Ug ingon niana ang usa ka tinuod nga Cristohanon, kung ilang . . . ginasakripisyo ang ilang mga kaugalingon, walay mga

pagkahingawa sa niining kalibutan, kondili ginahatag ang tanan nga aduna kanila ngadto sa Dios. Kita n'yo?

67 Ug karon ingon niini ang hingpit nga Cordero, ingon niana si Cristo. Ug dayon tungod sa pag-ula sa niadtong karnero, ang natural nga karnero didto sa Egipto, sa dugo nga gihaplas, ug, sa nahaplas na kadto, nagrepresentar kadto ingon nga usa ka timaan, kung ingon-ana sa unsa man diay nagapatimaan ang Dugo sa niining Cordero? Kita n'yo? Sa Timaan nga mga patay na kita sa atong mga kaugalingon ug naila diha sa atong Halad. Kita n'yo? Kung ingon-ana, ang Cordero ug ang—ug ang—ang Dugo ug ang maong tawo parehong naipaila, ang Halad ug ang magtotoo. Kita n'yo, naila ka sa imong pagkinabuhi, pinaagi sa imong Halad. Mao kana ang nagapahimo kanimo kung unsa ikaw.

68 Kung ingon-ana ang dugo mao ang timaan, o ang pagpaila. Gipaila sa dugo nga ang magsisimba nagpatay og karnero, ug gidawat ang karnero, ug giaplikar ang timaan niini ngadto sa iyang kaugalingon, nga wala siya naulaw niini. Wala siya'y labot kung kinsa man ang nakakita niini. Gusto niya ang tanan nga makakita niini, ug napahimutang kadto sa usa ka puwesto kon diin ang tanan nga tawong nagaagi makakita niadtong timaan.

69 Kita n'yo, daghang mga tawo ang gusto mamahimong mga Cristohanon, ug ilang—ilang—ilang gustong buhaton kini sa tago aron walay tawo nga—nga makahibalo nga sila mga Cristohanon. O, sa—sa mga kauban nila, mohunahuna ang uban kanila, “Bueno, karon, tan-awa, ako—ako—gusto kong mamahimong Cristohanon, apan dili ko gustong mahibal-an ni *Ingon-ani ug ni ingon-ana* ang mahitungod niini.” Kita n'yo? Bueno, karon, nakita n'yo, dili kana pagka-Cristohanon.

70 Kinahanglan nga ipasundayag sa pagka-Cristohanon ang Timaan niini, kita n'yo, sa publiko, diha sa dayag nga pagkinabuhi, sa opisina, diha sa dalan, pagmay mga problema, sa bisan unsang butang, sa simbahan, bisan asa pa man. Ang Dugo mao ang Timaan, ug ang Timaan kinahanglan nga maaplikar, kita n'yo, o (kon dili ingon niini) bisan ang pakigsaad mamahimong walay epekto.

71 Ang dugo usa ka timaan, o usa ka pagpaila, ginapaila nga kini nga tawo natubos na. Karon, bueno, himatikdi, sila kaniadto, gitubos sila nga wala pa'y nahitabo. Pinaagi sa pagtoo gipahid nila ang dugo. Kita n'yo, sa wala pa kadto nahitabo, giaplikar na ang dugo pinaagi sa pagtoo, sa pag-too nga mahitabo gayud kadto. Kita n'yo? Sa dili pa moagi ang kapungot sa Dios sa maong tibuk kayutaan, kinahanglan nga maaplikar na ang dugo, usá. Mamahimong ulahi na kini pagmiabot na ang maong kapungot.

72 Karon aduna kita'y leksyon dinha nga ato gayu'y, nga mahimo natong ipasulod sa inyong hunahuna, sa kadali. Tan-

awa, *kadto'y sa wala pa* nahitabo, kay ang panahon moabot nga dili na ninyo mahimo ang pag-aplikar sa Dugo.

⁷³ Gipatay niadto ang karnero sa panahon sa kagabhion, human nga giandam kadto sulod sa katorse ka adlaw. Ug dayon ang mao nga karnero gipatay ug gipahid ang dugo niini sa panahon sa kagabhion. Nakuha ba ninyo kini? Mitungha lamang ang timaan pag-abot na sa panahon sa kagabhion.

⁷⁴ Ug kini mao na ang panahon sa kagabhion sa kapanahonan nga atong gikapuy-an. Kini na ang panahon sa kagabhion para sa—para sa Iglesia. Kini na ang panahon sa kagabhion para kanako. Kini na ang panahon sa kagabhion sa akong Mensahe. Hapit na ako mamatay. Magabiya na ako. Pabiya na ako, sa panahon sa kagabhion sa niining Maayong Balita. Ug naagian na nato ang pagpamatarung, ug uban pa, apan mao na kini ang panahon nga kinahanglan maaplikar na ang Timaan. Giingnan ko kamo sa miaging Dominggo nga aduna ko'y usa ka butang nga gusto kong pagahisgotan; mao na kini. Ang panahon sa diha nga kamo—dili na kamo mahimong magdula-dula pa Niini. Kinahanglan na Kining mahitabo. Kung kini kinahanglan man nga buhaton, kinahanglan nga buhaton na kini karon. Tungod kay, makita na nato karon nga haduol na ang pag-agi sa maong kapungot sa tibuok kayutaan, ug ang tanan nga wala napailalum nianang Timaan mamatay. Ang Dugo, mao ang nagapaila kaninyo. Himatikdi.

⁷⁵ Kay, ang kinabuhi sa mananap dili mahimong moanha sa tawo. Sa diha nga giula ang dugo, migawas ang kinabuhi, siyempre, tungod nga usa kini ka binuhat. Ug sa diha nga ang dugo sa maong kinabuhi nawagtang na gikan niini, ang kinabuhi ingon nga lahi sa dugo. . . Karon, ang dugo mao ang kemika sa kinabuhi, pero ang kinabuhi usa ka butang nga lahi sa dugo, apan ang maong kinabuhi anaa diha sa dugo. Ug ang kinabuhi sa mananap dili mahimong moanha sa usa ka magsisimba. Sa diha nga gipatulo niya kini nga dugo nga iya sa karnero, kinahanglan niya nga ipahid ang kemika niini, tungod kay ang—ang kinabuhi nawala ug dili na mahimong mobalik.

⁷⁶ Tungod, dili kini mahimong moanha sa tawo, tungod kay ang kinabuhi sa mananap walay kalag. Wala ang mananap nakahibalo nga hubo siya, ug siya—siya gayu'y. . . Dili niya mahibal-an ang kasal-anan. Wala siya'y nahibal-an ni usa niini, busa usa ra kini ka buhing binuhat nga walay buhi nga kalag. Busa, ang kinabuhi sa mananap dili mahimong moanha sa kinabuhi sa tawo, tungod kay walay kalag sa niana nga kinabuhi. Karon, adunay kinabuhi, adunay dugo; usa ka kinabuhi, ug usa ka kalag sulod sa maong kinabuhi; ang kalag mao ang kinaiyahan sa maong kinabuhi. Busa, wala kadto og usa ka kinaiyahan, usa man kadto ka mananap, busa ang dugo niini mao ang puli ingon nga usa ka timaan nga ang kinabuhi naihalad na.

⁷⁷ Apan diha niining mahimayaong dapit, ilalum sa niining pakigsaad, adunay kalainan ang Dugo ug ang Kinabuhi. Ang Timaan para sa magtotoo karon mao ang Espiritu Santo; dili dugo, dili kemika, kondili ang Balaang Espiritu Kini sa Dios. Mao kana ang Timaan nga gikinahanglan sa Dios para sa Iglesia karon. Kinahanglan nga makita sa Dios kini nga Timaan. Kinahanglan nga makita Niya Kini diha sa matag usa kanato.

⁷⁸ Busa, sa diha nga nagapakita na ang mga landong sa kagabhion, ug andam na nga ibubo ang kapungot gikan sa Kahitas-an, ngadto sa mga dili-diosnon nga mga nasud, ug ngadto sa mga dili-diosnon nga mga dili-magtotoo, ngadto sa—sa mga nagapamahayag lamang ug wala man diay, ngadto sa mga ingon-niini! Ug akong—gipaninguhaan kong ipahayag ang akong kaugalingon ug magkinabuhi og husto sa taliwala niini, aron makita kung unsa gyud ang kahimtang niini, sa wala ko pa gisulti kini nga mga butang. Karon nagakinabuhi na kita ilalum sa mga landong niini, ug andam na nga mohapak ang kapungot, ug ang Dios nagkinahanglan ug usa ka Timaan nga ikaw mismo nakadawat na sa Iyang Timaan, ang Espiritu Santo. Kini lang ang bugtong paagi, ug ang bugtong ilhanan nga ang Dios molabay ibabaw kaninyo, tungod kay Kini mao ang mismong Kinabuhi ni Jesus Cristo nga nagaanha sa magtotoo.

⁷⁹ Ang kinabuhi sa mananap dili mahimong moanha, busa gikinahanglan nga ang dugo niini maipahid diha sa pultahan, diha sa balabag ug diha sa haligi sa maong pultahan; nga ang matag lumalabay, ang tanang publiko, ang tanang tawo nga nagalabay sa maong balay, masayod nga adunay usa—usa ka ilhanan ibabaw nianang pultahan, bahin sa dugo, nga usa ka kinabuhi ang namatay sulod nianang pultahan. Amen!

⁸⁰ Kinahanglan nga mamahimong ingon niana kini sa matag magtotoo karon, puno sa Espiritu Santo; usa ka Timaan nga ang giula nga Dugo sa Cordero, nga ang Kinabuhi nga atua sa maong Cordero, misulod dinha ug dayag nga naiselyo na dinha, nga ang tanan nga nagalabay, nga nagapakigsulti kanimo, nga aduna ma'y pagpakighilambigit kanimo, makakita nga naaplikar na ang Dugo, ug ang Timaan sa Kinabuhi nga anaa nianang Dugo anaa na kanimo. Luwas ka na gikan sa maong kapungot. Ingon niana lang; dili ang pagpamiyembro. Dili, sir!

⁸¹ Ang kinabuhi sa mananap dili mahimong moanha sa magtotoo, tungod kay usa kini ka mananap, ug naghisgot lamang kadto bahin sa usa ka mahinlo nga konsensiya, nga nagapakita nga adunay moabot nga usa ka hingpit nga Halad.

⁸² Ug, karon, aduna pa ba'y usa ka mas hingpit nga Halad gawas sa Dios Mismo nga nahimong mao ang Kabayaran, Siya Mismo? Sa diha nga ang Dios nahimong unod, diha sa Kaugalingon Niyang binuhat nga Dugo, nga kini . . . ang bugtong paagi nga mahimong moanha ang Kinabuhi sa Dios.

⁸³ Tungod kay, kitang tanan natawo tungod sa pagpakighilawas, ug busa ang kinabuhi nga anaa dinha iya sa kalibutan, ug kana nga kinabuhi dili magdugay. Butang kini nga hinukman na ug kondenado. Dili mo na kini mahimong patsing-patsingan. Wala na'y paagi nga mapatsingan kini. Wala na'y paagi aron—aron nga mapasinaw pa kini. Wala na'y paagi pa nga mapaarang-arang kini. Kinahanglan nga mamatay kini! Ingon niana ang bugtong gikinahanglan niini. Kinahanglan nga mamatay kini.

⁸⁴ Ug ang Pangpuli niini, usa ka Kinabuhi ni Jesus Cristo, nga kinahanglan mosulod diha kanimo, nga mao ang Espiritu Santo, ang Timaan sa Dios; nga imo nang nadawat ang Dugo sa Iyang Anak, si Jesus Cristo.

⁸⁵ Mao nga sa panahon ni Wesley kaniadto o . . . Sa panahon ni Luther, gihunahuna kaniadto nga, “pagtoo lamang.” Sa panahon ni Wesley, “mao ang kemika sa Dugo.” Apan kini na ang kaulahiing adlaw, kon diin ang—gikinahanglan na ang Timaan. Ug nagapahimo kana, tanan, ang kinatibuk-an niini para ngadto sa Pagsakgaw. Nasabtan ba ninyo kini? [Nagaingon ang kongregasyon, “Amen.”—Ed.]

⁸⁶ Tubig, dugo, ug espiritu ang nagagawas pag-ipanganak na sa usa ka inahan ang bata. Ang unang butang nga nagagawas, diha sa usa ka normal nga pagpanganak, mao ang tubig, ang sunod nga butang mao ang dugo, ug ang sunod mao ang kinabuhi.

⁸⁷ Ang migawas didto gikan sa lawas sa atong Ginoong Jesus Cristo: tubig, Dugo, ug Kinabuhi. Ug ang tibuok Iglesia, ang Pangasaw-onon, ang kinatibuk-an niini, miagi sa pagpamatarung, pagpakabalaan, ug sa bautismo sa Espiritu Santo, nga mao ang Timaan.

⁸⁸ Sama sa ginaingon sa Mga Hebreohanon 11, “Silang tanan nga nanagpanglakaw nga nanagsapot og panit sa mga karnero ug mga kanding, nanag-antus sa kawalad-on, ug tanan na niadtong ilang gipangbuhat, apan bisan pa niana dili sila pagahingpiton gawas kon mahiuban kita.”

⁸⁹ Ug ang Iglesia sa niining panahon, nga nadawat ang Timaan, ang bautismo sa Balaang Espiritu, nga nabubo ang Dugo ug nga anaa na diha ang Espiritu Santo sa maong Iglesia; kung wala kita, nan, dili mahimo nga sila mabanhaw. Kondili nakadepende sila kanato, kay nagsaad ang Dios nga buhaton Niya Kini, ug aduna gyu'y maatua didto. Wala ko kahibalo kung kinsa man, apan aduna gyu'y makadawat Niini. Ang katungdanan ko lang, mao ang pagwali Niini. Katungdanan na sa Dios ang pagpangita nianang pinili nga binhi. Aduna gyu'y maatua didto, bisan pa man. Tungod kay, maatua gayud sila didto, ang matag usa kanila, ang usa uban sa usa pa; ang kapanahonan sa tubig, ang kapanahonan sa Dugo, ug karon ang kapanahonan sa Timaan sa Espiritu Santo.

⁹⁰ Ug, hinumdumi, miagi ang Israel sa daghang mga butang, apan panahon na sa kagabhion kadto sa diha nga gikinahanglan na ang timaan; dili niadtong buntag, dili niadtong mga nagapangandam pa, niadtong katorse ka adlaw sa pag-andam sa karnero. Nasayod gyud ang Israel nga adunay butang nga moabot.

⁹¹ Si Luther nasayod usab niini, nasayod usab si Wesley niini, mao usab si Finney, si Knox, si Calvin, nasayod sila niini. Mao na Kini! Nasayod sila nga moabot ang panahon nga ang Haligi nga Kalayo magabalik sa Iglesia. Nasayod sila nga moabot ang panahon nga mahitabo kini nga mga butang, apan wala sila nabuhi aron makita kini, apan ila kining gipaabot.

⁹² Nasayod ang Israel nga may moabot nga usa ka butang, apan sa panahon na kadto sa kagabhion sa diha nga ang dugo sa karnero, ang timaan, gibutang didto sa pultahan. Sa wala pa kadto, giandam na daan ang karnero.

⁹³ Cordero na sukad pa kaniadto. Ang Cordero na kadto sa panahon ni Luther, ang Cordero na—ang Cordero na kadto sa panahon ni Wesley, apan ang sa karon mao na ang panahon sa Timaan nga kinahanglan ang matag balay natabonan sa maong Timaan. Ang matag balay sa Dios kinahanglan nga natabonan sa maong Timaan. Kinahanglan nga ang tanan nga anaa sa sulod niini natabonan sa maong Timaan. Ug ang Balay sa Dios mao ang Lawas ni Jesus Cristo, ug pinaagi sa usa ra ka Espiritu nabautismohan kita pasulod ngadto niining Timaan ug nahimong mga kabahin Niini, nga, miingon ang Dios, “Pagmakita Kong napasundayag kini nga Timaan, molabay Ako ibabaw kaninyo.” Pagkamakuyaw nga takna kining atong gikinabuhian! Oh!

⁹⁴ Ang dugo mao ang nagapaila, ang nagapaila sa magtotoo, tungod ang migawas nga kinabuhi, dili mahimong moanha kaniya, busa kinahanglan nga aduna siya’y usa—usa ka kemika. Kinahanglan aduna siya og usa ka sama sa pintal, dugo, usa ka kemika nga nagapakita nga ang kinabuhi migawas na gikan niini.

⁹⁵ Karon ang Espiritu Mismo mao ang Timaan. Ang Espiritu Mismo mao ang Timaan, dili ang Dugo. Ang Dugo giula kaniadto didto sa Kalbaryo, tinuod kana. Apan ang Dugo, ingon nga mao man gyud kini, mibalik na ngadto sa mga elemento sa kung asa kini gikan, sa mga pagkaon nga gikaon Niya aron mabuhi. Apan, nakita n’yo, sa sulod niadtong selula sa Dugo mao ang Kinabuhi nga maoy misugod sa pagpalihok sa maong selula sa Dugo. Kung kadto’y . . . Walay kinabuhi diha sa kemika, mismo, ug busa dili kini mahimong molihok. Apan sa diha nga moabot ang Kinabuhi diha sa maong kemika sa dugo, miporma Kini og usa ka selula. Nagporma Kini og Iyahang selula, dayon selula na human sa selula, dayon nahimo kining usa ka Tawo. Ug kana nga Tawo

mao ang Dios, si Emmanuel, diha sa unod. Apan sa diha nga kadto nga Kinabuhi mibalik na, nawala usab ang kemika, apan ang Timaan mao na ang Espiritu Santo nga anaa sa Iglesia, aron nga makita nila si Cristo.

⁹⁶ Kinahanglan kini nga mahitabo, tungod kay ang babaye ug ang iyang bana nahimong usa ra. Nahimo silang usa ra. Ug mao usab ang Pangasaw-onon ug si Cristo nga nahimong Usa ra. Ang ministerio sa Pangasaw-onon, ug ang ministerio ni Cristo, mao ra. Ug hinumdumi, “Kining nahauna kong basahon, O Teofilo, nagasulat ako kanimo, mahitungod sa gisugdan ni Jesus sa pagbuhat ug padayon nga ginabuhat.” Wala nakapagundang Kaniya ang Iyang kamatayon. Wala, sir! Mibalik Siya pag-usab. Dili ikatulo nga persona, apan ang mao ra mismo nga Persona ang mibalik pag-usab diha sa porma sa Espiritu Santo, ug aron nga ipadayon ang buluhaton; ug nagapadayon sa gihapon, miingon ang Basahon sa Mga Buhat. “Si Jesus Cristo ang mao sa gihapon kagahapon, karon, ug hangtud sa kahangturan.” Mao kana ang Timaan. Mao kana ang ilhanan.

⁹⁷ Sa diha nga miagi si Pedro ug si Juan didto sa pultahan nga ginganla’g Matahum, may naghigda didto nga usa ka lalaki nga bakul, sukad pa sa iyang pagkahimugso, ug miingon si Pedro, “Ako walay salapi ug bulawan; apan ang ania kanako, hatagan ko ikaw. Sa Ngalan ni Jesus Cristo nga Nazaretnon, tindog ug paglakaw.” Kita n’yo? Ug nakig-estorya sila kanila, ug nasayran nila nga walay mga himbangaagan ug walay edukasyon kini nga mga tawo, apan hing-ilhan nila nga kini sila nakigkauban kang Jesus. Kita n’yo, atua didto ang Timaan, nga napasundayag. Kita n’yo, “Ang ania kanako!” Sa dihang nakita ang usa ka kabus, nga igsoong lalaki nga naghigda na lang didto, bakul ug kibag na, ug tanan na. Ug ang mao ra nga Kinabuhi nga atua kang Cristo anaa sa sulod kanila, “Ang ania kanako!”

⁹⁸ “Sa Akong Ngalan inyong pagulaon ang mga yawa.” Dili nga, “Akong pagulaon.” “Inyong pagulaon!” “Kon moingon kamo niining bukid!” Dili nga, “Kon moingon Ako.” “Kon moingon kamo niining bukid!”

⁹⁹ Oh, igsoon, ang takna haduol na nga kana nga Timaan kinahanglan nang mapasundayag. Makita na nato kini. Nahibalo kita nga haduol na kita karon sa katapusan. Naihatud nato ang tanan na nga matang sa mensahe, aron maipakita ang mga ilhanan ug mga katingalahan, ug karon atong ginabalikan kung unsa ang gikinahanglan buhaton sa Iglesia. Kinahanglan nga mapasundayag ang maong Timaan. “Kung makita Ko ang dugo, molabay Ako ibabaw kaninyo.” Wala na’y uban pang magpulos. Gikinahanglan niini ang Dugo. Karon, ang Espiritu Santo mao ang atong Timaan, gikan sa Dios.

¹⁰⁰ Ingon nga usa ka bantugan nga teologo, usa—usa ka iskolar, usa ka igsoong Baptist, buutan nga tawo, maayo kaayong tawo,

sa dihang miduol siya kanako usa ka higayon, ug miingon siya, “Igsoong Branham,” miingon siya, “nagahisgot ka bahin niining Espiritu Santo,” ingon niya, “aba, dili na man kana bag-o.” Ingon pa, “Dugay na namo Kining ginatudlo, niadto pang mga kapanahonan.” Ug ako—ingon ko, bueno, akong. . . Ingon niya, “Nadawat na namo ang Espiritu Santo.”

¹⁰¹ Ingon ko, “Kanus-a ninyo Kini nadawat?”

¹⁰² Ingon niya, “Sa dihang mitoo ako.” Kay, kabalo ko nga pang-Baptist kana nga teolohiya, nga imo, nga sa dihang mitoo ka, nadawat mo ang Espiritu Santo.

¹⁰³ Ingon ko, “Miingon kaniadto si Pablo, diha sa Mga Buhat 19, ngadto sa usa ka pundok, usa ka grupo sa mga Baptist, nga, ang usa ka magwawaling Baptist nga usa sa mga kinabig kaniadto ni Juan, nga ginapamatud-an pinaagi sa Biblia nga Jesus mao ang Cristo.”

¹⁰⁴ “Sa dihang tapos niya malatas ang kayutaan ibabaw sa Efeso, nahibalag niya ang pipila ka mga tinun-an, ug miingon siya kanila, ‘Nakadawat ba kamo sa Espiritu Santo *sukad* nga mitoo kamo?’ Miingon sila, ‘Wala man gani kami makadungog nga aduna diay Espiritu Santo.’” Dayon gipangutana niya sila kung giunsa sila pagbautismo. Ug wala diay sila nabautismohan sa Ngalan ni Jesus Cristo, ang gihalad nga Cordero. Wala gyud sila naila nga kauban Niya, man lang. Ila lang gitooan kini; sama sa tambal nga gipatong lang dinha, ug wala nila kini gitumar. Ug gisugo sila ni Pablo nga magpabautismo pag-usab, diha sa Ngalan ni Jesus Cristo.

¹⁰⁵ Ug pagkabuhat niya niini, miabot dayon ang Timaan diha kanila. Naila sila pinaagi sa mga buhat ug mga ilhanan nga iya sa Espiritu Santo, nagsulti sa laing mga dila pinaagi kanila, ug nanagpropesiya, ug nanag-ambahan sa Dios. Naila sila ingon—ingon nga kauban sa ilang Halad.

¹⁰⁶ Ug ang Espiritu Santo mao ang nagapaila kanato. Kini ang nagapaila kanato ingon nga mga Cristohanon. Dili ang atong pagpamiyembro ngadto sa mga iglesia, dili ang atong mga pagpanabut sa Biblia, dili sa kung unsa ka daghan ang nahibaloan mo bahin sa Biblia. Kini mao kung unsa gayud ang pagkaila mo sa Nagsulat niini, kita n’yo, kung nagakinabuhi ba gayud ang Nagsulat niini diha sa sulod mo. Kini ang imong—imong kaugalingon nga patay na. Wala ka na. Giisip mo ang imong kaugalingon ingon nga patay na, ug ang Timaan ang maoy nagakinabuhi na diha kanimo. Ug dili na Kini ang imong kinabuhi; Iyaha na.

¹⁰⁷ Nag-ingon si Pablo, “Ang kinabuhi nga karon akong ginakinabuhi.” Nagkinabuhi na siya og usa ka lahi nga pagkinabuhi kay sa kaniadto. “Dili na ako, kondili si Cristo ang nabuhi sa sulod nako.” Mao kana ang nagapaila nga Timaan nga gikinahanglan sa Dios. Naipaila uban sa atong. . . Ang pagpaila

kauban sa atong Halad, ang Kinabuhi sa atong Manluluwas nga ania sa sulod nato, ang Balaang Espiritu.

¹⁰⁸ Oh, daw sa unsa—daw sa unsa ka klaro kaayong Timaan! Dili mahimo nga aduna pa’y ubang Timaan. Oh, sus, kon inyo lang unta makuha ang—ang unod niini. Kung aduna ako og—og gahum karong buntaga, pinaagi og mga pagsulti, aron maipahayag ug mapasulod kini ngadto sa inyong kalag nga anaa sa sulod; dili sa inyong mga dalunggan, kondili sa inyo gyud kalag, ug inyong—inyong makita ang garantiya Niini. Kini—nagkinahanglan kini, nagaparelaks Kini kaninyo.

¹⁰⁹ Unsa kaha kung ikaw, nakahimo og usa ka krimen, ug idimanda ka diha sa usa ka nasudnong hukmanan. Ug nasayod ka, nga kung makaplagan ka nila nga sad-an, siguradong mamatay ka, nga pagasilotan ka diha sa usa ka electric chair, o sa gas chamber, o sa kung unsa man nga pang-publiko nga pagsilot og kamatayon nga pagabuhaton nila kanimo, mahimong bitayon ka, o unsa man, o patyon, sa kung unsa man nga pagsilot. Ug nahibalo ka nga imong. . . Nakasala ka. Nahibalo ka nga nakasala ka, ug siguradong mamatay ka kung dili ka mokuha og usa ka abogado aron nga magrepresentar kanimo, nga mahimong makapagawas kanimo gikan sa maong butang. Ug karon gusto mong mokuha og pinakamaayo nga abogado nga makuha mo.

¹¹⁰ Ug dayon pagkakuha mo og usa ka abogado nga maayo, maalisto nga abogado, mabati mo nga ang imong kaso medyo na. . . medyo maka-relaks ka na og diyutay, tungod nga aduna ka na’y abogado. Apan aduna sa gihapon og mga pagduhaduha kon mapausab ba sa niining abogado ang hunahuna sa huwes, o mapausab niya ang mga maghuhukom; kon kini nga abogado, pinaagi sa kalarino niyang mga pagpanulti ug ang kabatid niya sa mga balaod, mahimong mapausab kana, ug mahimo niyang depensahan ang imong kaso ug mapamatud-an nga—nga kinahanglan kang mabuhi. Apan bisan pa niana, bisan pa sa tanan niyang—niyang makatarunganong mga kapasikaran ug kalarino sa pagpanulti nga mahimo niya, ug mga pagpakita nga mahimo niya ngadto sa mga maghuhukom o sa huwes, ikaw—ikaw—ikaw. . . Mahimong maka-relaks ka sa kadali, apan aduna sa gihapon og pagduhaduha diha sa imong hunahuna, “Mahimo niya kaha kini?”

¹¹¹ Apan sa niining kaso, ang Huwes Mismo mao ang nahimong atong Abogado. Ang Dios nga nahimong tawo. Walay abogado nga makahimo niini. Wala kita’y makita ni usa. Si Moises, ug ang Kasugoan, ang mga propeta, wala bisan unsa man nga makahimo niini. Busa ang Huwes parehong nahimong Maghuhukom, Abogado, ug Huwes, Mismo; ug giangkon ang paghukom sa Iyang Kasugoan sa Kaugalingon Niyang mga kamot, ug gibayaran ang bili niini, Siya Mismo. Dili ba pagkasigurado na gyud nato niini? Ug gipadala Niya ang Mismo

Niyang Kinabuhi nganhi kanato, ingon nga saksi nga Iya kining gidawat. Hilwas na gayud!

112 “Oo, bisan magalakaw ako latas sa walog sa landong sa kamatayon, ako walay kahadlok sa bisan unsa nga dautan, kay Ikaw nagauban kanako.”

113 Sa diha nga pareho nahimo Siyang Huwes, Maghuhukom, ug—ug Abogado, Iyang gidepensahan ang atong kaso. Kita, nga nakaplagan nga sad-an sa Kaugalingon Niyang Balaod; ug miabot Siya ug giangkong ang lugar sa tawong sad-an, nga atua didto sa dalangpanan. Iyang gikuha ang iyang kasal-anan. Iya kining giangkong sa Iyang Kaugalingon, ug namatay, ug gibayaran ang bili niini, ug giula ang Iyang Dugo, ug gihatag balik ang Kaugalingon Niyang Timaan, ang Kaugalingon Niyang Kinabuhi.

114 Aba, okey na kita. Giwagtang na ang kaso. Wala na’y kasal-anan ang magtotoo. Oh Dios, kaloy-i kami, kung dili kana makita sa mga tawo, nga wala na’y kaso. “Ang nagapatalinghug sa Akong mga Pulong ug nagatoo Kaniya nga nagpadala Kanako, adunay Kinabuhing Walay Katapusan, ug dili Pagahukman sa Silot, kondili miagi na gikan sa kamatayon ngadto sa Kinabuhi.” Mao na kana ang kahimtang niini. Giwagtang na ang kaso! Wala na’y kaso. Amen! Kung ingon-ana luwas na, luwas na uban sa giaplikar nga Timaan, sa dihang mosugod na nga mohapak ang kamatayon dinha sa pultahan, wala na kini gahum. Kita n’yo? Oo.

115 Giaplikar na ang Timaan. Ang Timaan lang ang pagailhon sa karon. Kita n’yo, gibuhat Niya kadto aron nga moabot ang Timaan. Ang Timaan mao ang Kinabuhi sa Dios.

116 Ug sa diha nga gibuhat sa Dios ang nahaunang tawo kaniadto, gihimo Niya siyang usa ka anak nga lalaki. Ug nahugawan ang maong anak sa pagpaminaw niya sa iyang asawa imbis sa Dios, ug ang maong asawa naminaw sa yawa imbis sa iyang bana, ug, sa diha nga nahitabo kini, mao kadto ang nagpahugaw kanila, nga naghatud kadto og kahugawan. Ug nasayod Siya, nga pagnabuhat nila kadto, maghatud sila og mga anak ngadto sila sa kalibutan. Ang bunga nga atua sa tunga sa kahoy dili gayud mahimong hikapon, ug, dayon, sa diha nga nahikap kadto, ilang gihatud kini nga sala ngadto sa ilang mga kaugalingon. Ug busa ang tibuok katawohan, nga gipanganak, natawo sa kasal-anan. Didto, wala na’y kahilingkawasan.

117 Ug dayon mikanaug ang Dios. Adunay usa lang ka paagi nga mapahibalik ang tawo; kana mao ang pagpaanaa sa Dios og usa na usab ka anak nga lalaki. Ug unsaon man Niya pagbuhat niini, sa diha nga ang Kaugalingon Niyang balaod nagababag dinha ug nagaingon nga ang tawo “hinukman na sa silot”? Dayon ang Amahan Mismo nahimong usa kanato. Kana ang tinuod na

gayud nga Karnero. Mao kana ang katuyoan nga atua sa Iyang hunahuna.

¹¹⁸ Mao kana ang hinungdan nga ang Cordero naila gayud didto sa Tanaman sa Eden, sa paghibalo nga ang Cordero ug ang Salampati magtagbo usa ka higayon, sa diha nga mag-uban na ang Cordero ug ang Salampati. Dinha Siya nakahibalo, pinaagi niana, nga mahimo kitang tanan magkauban. Ug andam Siya nga himoon ang ingon niana nga paghalad, karon, aron nga maaplikar ang Timaan, aron nga dili na kita mamahimong mga lumalangyaw, dili na kita mga dumuloong, kondili mga anak na kita nga lalaki ug babaye sa Dios. Parehong si Adan ug si Eva, ang babaye ug ang lalaki, ingon nga nausa na, mga anak nga lalaki ug mga anak nga babaye sa Dios, diha kang Cristo Jesus, pinaagi sa Iyang dakung pagsakripisyo.

¹¹⁹ Ug, bueno, aron nga wala na'y kasaypanan! Ang binhi niining kinabuhia nga kinahanglan maitanum sa yuta, kining lawas nga usa—usa ka binhing mamatay; ug ang kinabuhi, kung kini usa ka hiwi nga kinabuhi nga anaa sa maong binhi, mamatay kini uban sa maong binhi. Apan gibutangan Niya kini og Kinabuhing Walay Katapusan ug naila kini ingon nga Iyaha, aron nga didto sa pagkabanhaw pagabanhawon Niya kini, ug wala ni usa ang mawala. Makita ba ninyo ang gusto kong ipasabot? [Nagaingon ang kongregasyon, “Amen.”—Ed.]

¹²⁰ Mao kana, dili na kini karon mahimong mamatay. Naputos na kini sa Kinabuhi. Ang Timaan kini, nga nagaputos sa nianang luoy'ng lawas, nga nagaputos sa nianang kalag sa maong tawo. Aduna na'y Timaan nga nagaputos dinha, ang Balaang Espiritu, nga panag-iyá kini sa Dios. Iyaha kini. “Kung makita Ko ang Timaan, molabay Ako ibabaw kaninyo.” Usa ka klarong Timaan, ang Balaang Espiritu mao ang atong Timaan. Busa, pagnadawat ninyo ang Espiritu Santo, kamo nakalabang na gikan sa kamatayon ngadto sa Kinabuhi. Ingon niana gyud kini, tungod anaa na ang Kinabuhi diha kaninyo. Dili na kamo mahimong mamatay.

¹²¹ Nag-ingon ang Biblia, “Ang gipanganak sa Dios dili magahimo'g pagpakasala, kay siya dili makasala, kay ang Binhi sa Dios,” amen, “ang Binhi sa Dios nagapabilin kaniya.” Ug unsaon man niya pagpakasala sa diha nga ang walay-sala nga Dios anaa sa sulod niya? Pag-anaa siya diha sa walay-sala nga Dios, unsaon man niya pagpakasala? Bisan unsa pa'y iyang gihimo, ang Dugo nagatabon kaniya. Kita n'yo? Usa na siya karon ka bag-ong binuhat. Ang iyang mga pangandoy ug tinguha Langitnon na, tungod kay gibag-o na siya gikan sa pagka-amorseko ngadto sa pagka-trigo. Ang iyang mga pangandoy dili na pareho sa kung unsa kini kaniadto, ug maipakita niya kini.

122 Moingon ka, “Oh, nagatoo ako Niana.” Ug sa gihapon nagapakasala? Na! Nalimbongan ka gyud. Kita n’yo? Wala kini may maipasundayag og bisan unsa man nga Timaan.

123 Minandoan ang Israel kaniadto nga magpabilin ilalum niadtong dugo hangtud nga miabot ang sugo nga magmartsa na. “Ayaw gayud paggawas ilalum niini!” Pag-atua na sila ilalum niadtong timaan, selyado na sila didto sa sulod. “Ayaw gayud paggawas dinha!” Mipabilin sila didto hangtud miabot ang tungang gabii ug gipatunog na ang mga trumpeta. Ug sa diha nga gipatunog na ang mga trumpeta, gisugdan usab pagpatunog ang daan nang mga trumpeta nga hinimo gikan sa sungay sa lakeng-karnero, pagawas nga mimartsa na ang matag usa nga dala-dala ang iyang balon, paingon sa yutang saad.

124 Mao usab ang usa ka lalaki o babaye nga napuno sa Espiritu Santo, selyado na siya, ug luwas na gikan sa tanang kadaut ug mga katalagman. Nagapakita ang tibuok niyang kinabuhi kung unsa siya, asa man siya galakaw, unsa man iyang negosyo, kinsa man iyang kaestorya. Sa pagpakighinabi niya sa mga kababayan-an, sa pagpakighinabi niya sa iyang mga kauban, sa pagpakighinabi niya sa tanan, makita ang Timaan. Amen! Pagmoabot ang kamatayon, “ako walay kahadlok sa bisan unsa nga dautan, kay Ikaw nagauban kanako,” anaa dinha ang Timaan. Pagmoabot ang pagkabanhaw, atua siya didto, tungod kay pagabanhawon siya sa Dios sa kaulahiang adlaw. Mao kana ang gisulti ni Jesus! “Kung makita Ko ang Dugo, ang Timaan, molabay Ako ibabaw kaninyo.” Oh!

125 Hinumdumi, kon wala niadto gipasundayag kadto nga timaan, bisan ang pakigsaad wala unta epekto. Husto kana. Kawang unta ang pakigsaad. Walay—walay pakigsaad pagwala dinha ang timaan. Nagrepresentar ang timaan sa pakigsaad. Naghimo kaniadto ang Dios og pakigsaad kanila, oo, sir, apan aduna kinahanglan ang timaan. Walay epekto kadto, ang pakigsaad walay epekto, pagwala dinha ang timaan.

126 Mahimong daghang mga Judio kaniadto ang makaingon, “Ari ka! Wala ma’y dugo diha sa akong pultahan, apan aduna ko’y gustong ipakita kanimo, usa ako ka na-sirkunsisyon na nga Judio. Na-sirkunsisyon na ako.” Dili kana ang pasabot *niana*. [Gipalagitik ni Igsoong Branham ang iyang tudlo—Ed.] “Kung makita Ko ang dugo! Pagmakita Ko ang timaan!”

127 Mahimong moingon ka, “Usa ako ka Baptist, Presbyterian, Methodist,” o unsa man nga gusto mong mamahimo.

Apan, “Kung makita Ko ang Timaan!”

128 Moingon ka, “Usa ako ka magtotoo. Usa ka miyembro ang akong inahan niining iglesia. Usa ka miyembro ang akong amahan niining iglesia. Usa na ako ka miyembro dinha sukad niadtong bata pa ako.” Dili kana ang pasabot *niana*. [Gipalagitik ni Igsoong Branham ang iyang tudlo—Ed.]

“Wala ako nagapamakak, nagapangawat. Wala ko ginabuhat *kini*. Ako...” Dili kana ang pasabot *niana*. [Gipalagitik ni Igsoong Branham ang iyang tudlo.] “Miyembro ako sa Branham Tabernacle. Ginabuhat ko *kini*, *kana*, o ang *uban pa*. Ginatoohan ko ang tanang Pulong.”

¹²⁹ Silang mga Judio mahimong moingon, “Nagatoo ako kang Jehovah!” Naminaw unta siya sa Mensahe alang sa niining kapanahonan, kon nagtoo siya. Sigurado.

Aduna sila’y daghang mga mensahe, apan Kini mao ang Mensahe alang niining kapanahonan. Kita n’yo? Nagatoo ako sa maong Mensahe alang niining kapanahonan. Oo. Giaplikar kaniadto ang dugo sa panahon sa kagabhion.

Mahimong miingon sila, “Ako, usa ako ka Judio.”

¹³⁰ Ang mga tawo sa karon nagaingon, “Usa ako ka Cristohanon. Mahimo kong ipakita kaninyo ang dugay ko nang pagkamiyembro. Gusto kong isulti mo kanako kung aduna ba ko’y gikawat og bisan unsa man, kon nakasuhan na ba ako. Ipakita kanako kung asa ba ako nakapanapaw. Wala ko gayud nabuhat kini nga mga butang, o butang nga sama niana. Pakitai ko og usa ka higayon.” Wala kana nagakahulogan ni usa ka butang karon. Wala, wala gayud. Kita n’yo, bisan unsa pa siya kaana sa pakigsaad, walay epekto ang maong pakigsaad. Kawang kini.

Moingon ka, “Bueno, usa ako ka magtotoon sa Biblia.”

¹³¹ Dili ko igsapayan kung unsa man ka. Pagwala kana nga pakigsaad, anaa ang kapungot sa Dios diha kanimo. Kita n’yo Husto kana. Naabtan ka na niini. Oo. “Hipalgan ikaw sa imong sala.” Unsa ang sala? Dili-pagtoo. Wala mo gitooan ang Mensahe. Wala mo gitooan ang Pulong. Wala mo gitooan ang saksi sa Timaan, Mismo, sa diha nga gipaila Niini ang Iyang Kaugalingon sa taliwala nato. Ug wala mo ba gitooan Kana? Bisan kung giunsa mo pa nga wala Kini gitooan, pero kinahanglan nga maaplikar gyud kini.

¹³² Mahimong moingon ka, “Nagatoo ako Niini. Nagatoo ako Niini. Nagatoo ako ang Kamatuoran Kini. Ginadawat ko Kini ingon nga mao ang Kamatuoran.” Kung ingon-ana maayo kaayo, apan bisan pa niana kinahanglan nga maaplikar gyud Kini.

¹³³ Aba, kadtong usa ka Judio nga nagatindog didto, nga ginakutaw ang dugo, sa diha nga nagaagas ang dugo gikan sa karnero, nagaingon, “Kini mao si Jehovah.”

¹³⁴ Ug may nagatindog didto nga usa ka sacerdote, nga nagaingon, “Oo, sir, nagatoo ako nga matuod kana,” apan didto sa kaugalingon niyang balay mismo wala kadto naipahid. Dili niya gustong maila ang iyang kaugalingon didto nga kauban siya nianang pundok; dili, sir, sa niining mga panatiko kono nga may mga dugo diha sa ilang mga pultahan. Dili niya gusto kana nga

pagpaila. Bisan unsa pa siya ka dugay na nga sacerdote, bisan unsa pa ka daghan ang nahibaloan niya sa Pulong, giunsa man siya pagpadaku, unsa man nga maayong mga buhat ang iyang nahimo, unsa man ka daku na ang nahatag niya ngadto sa mga kabus, unsa man ka daghan na ang iyang nahalad!

¹³⁵ Nag-ingon si Pablo, “Itahan ko man ang akong lawas aron pagasunogon, ingon nga usa ka paghalad; ipanghatag ko man ang tanan kong katigayunan sa pagpakaon sa mga kabus; aduna man ko’y pagtoo nga arang ko mabalhin ang mga bukid, ug uban pa; ug magsulti sa laing mga dila, nga iya sa tawo ug mga manulonda; ug tanan nang uban pa niining mga butang,” ug miingon, “Wala ko’y kapuslanan hangtud nga ang Timaan maaplikar gayud. Hangtud nga maaplikar ang Timaan!” Mao kana ang akong ginahisgotan karong gabhiona, ang gugma. Kita n’yo? “Karon, hangtud nga kini maaplikar, wala ako’y kapuslanan.” Kita n’yo?

¹³⁶ Dili ko igsapayan, nga mahimong nakapagula man ka man og mga yawa. Mahimong napaayo mo ang mga masakiton pinaagi sa imong pag-ampo nga inubanan og pagtoo. Mahimong nahimo mo ang tanan niining mga butanga. Apan kung wala kana nga Timaan dinha, anaa ka pa ilalum sa kapungot sa Dios. Mahimong usa ikaw ka magtotoo. Mahimong nagatindog ka sa pulpito ug nagawali sa Maayong Balita. “Daghan ang magaduol Kanako nianang adlaw, ug moingon, ‘Ginoo, Ginoo, dili ba nanaghimo man ako’g mga propesiya tungod sa Imong Ngalan, nagwali tungod sa Imong Ngalan? Dili ba nagpagula ako og mga yawa tungod sa Imong Ngalan?’” Pareho kanang mga Methodist, mga Baptist, ug mga Pentecostal. Moingon si Jesus, “Pahalayo kamo Kanako, kamo nga mga mamumuhat sa kadautan. Walo Ko gayud kamo maila.”

¹³⁷ “Apan pagmakita Ko ang Timaan, molabay Ako ibabaw kaninyo.” Kini ang gikinahanglan sa Dios ngadto niining kapanahonan. Ang Mensahe sa gabiing-panahon, mao ang iaplikar ang Timaan.

¹³⁸ Nanglabay si Satanas og tanan na nga matang sa mga mining-butang, mga paglamanohay, ug mga ebidensiya kono, ug tanan na nga sama niana. Pangkalimti kini! Miabot na ang takna nga Timaan, Mismo; dili sa kung unsang mini, mga patootoo lamang, mga inawat-awat, og unsa pa man.

¹³⁹ Ania na ang takna kon diin ang Timaan Mismo mao ang nagapaila sa Iyang Kaugalingon mismo sa taliwala nato, ug nagapamatuod nga si Jesus mao sa gihapon kagahapon, karon, ug hangtud sa kahangturan, ug Siya’y eksakto sa Pulong. Kinahanglan nga maaplikar Kini. Ang tawo nga nagaingon nga aduna kaniya ang Timaan, nga ginapanghimakak kini nga Pulong, unsa na lang kini kung ingon-ana? Kita n’yo, dili mo mahimo kana. Kinahanglan nga anaa gyud dinha ang Timaan.

“Kung makita Ko . . . Ang dugo ang mamahimong timaan para kaninyo.” Karon ang Balaang Espiritu, ang Kinabuhi nga anaa sa Dugo, mao na ang Timaan para kaninyo. Pagahisgotan nato kini taudtaod, kita n’yo. Ang Espiritu Santo mao ang Timaan. Sirado na ang kaso. Oo, sir. Karon, hinumdumi. Ug akong . . .

¹⁴⁰ Bisan unsa ka pa, unsa ka pa ka maayo, unsa man ka daghang higayon nga milukso ka *paitaas-ug-paubos*, unsa man ka daghang mga iglesia ang giapilan mo, unsa pa ka daghang maayong mga butang ang nahimo mo, wala kini ni usa man ka kapuslanan para kanimo kung wala naaplikar ang Timaan. Panahon na kini sa kagabhion. Okey man kana niadtong panahon ni Luther, okey man kana niadtong panahon ni Wesley, apan dili na kini magpulos sa karon. Dili.

¹⁴¹ Oo, ang paghupot sa karnero okey ra niadtong panahona. Kadtong mga namatay nga wala pa naaplikar ang karnero, ang dugo, lahi kaniadto. Oo, sir. Dayon mihawa sila nga may maayo na nga konsensiya. Pagahukman sila kung sila—kung sila man . . .

¹⁴² Kung pinili na silang daan, moabot kini kanila. Kung dili man, dili kini moabot kanila. Kana lang. Ang Dios lang gyud kini. “Siya—Siya nagamatarung niadtong buot Niya, malooy niadtong pagakaloy-an Niya, ug Siya magahukom og silot niadtong buot Niya.” Dios Siya. Kana lang. “Malooy Siya niadtong mga pagakaloy-an Niya, ug pagahukman og silot kadtong gusto Niyang pagahukman.”

¹⁴³ Klarong makapakita ang usa ka Judio, tungod sa sirkunsisyon, nga usa siya ka magtotoo.

¹⁴⁴ Dinha’y daghang mga tawo, tawong pundamental, nga mahimong kuhaon kini nga Biblia ug moingon, “Usa ako ka magtotoo, ug miingon si Jesus nga ‘pinaagi’g pagtoo’ maluwas kita. Ug usa ako ka magtotoo, apan kanang bautismo sa Espiritu Santo binuang kana.” Kung ingon-ana wala maaplikar ang Timaan. Bisan pa, bisan kung giunsa pa niya pagtoo, kawang kini.

¹⁴⁵ Sama lang sa sirkunsisyon sa mga Judio. Moingon siya, “Usa ako ka Judio. Nganong moadto pa man ko didto ug maglihok nga sama nianang pundok sa mga panatiko?”

¹⁴⁶ Si Moises didto, nga nagalakaw-lakaw didto sa dalan, nagaingon, “Ania na ang pang-gabiing mensahe! Mahitabo kini, nga sa pagkatapos sa napulo ug upat ka adlaw, inyong tigumon tanan ang kongregasyon ug patyon ang karnero. Pagapatyon kini sa tibuok kongregasyon sa Israel, nga ginapatong ang ilang mga kamot diha niini, nga ginapaila ang ilang mga kaugalingon uban niini. Ug igapahid ang maong dugo diha sa haligi, ug diha sa balabag sa pultahan, ug, ‘Kung makita Ko ang dugo, molabay Ako ibabaw kaninyo, tungod kay usa kini ka timaan nga inyong

nadawat ang kamatayon sa karnero nga Akong gikatagana alang kaninyo.” Ang dugo mao kaniadto ang timaan.

147 Sa karon ang Espiritu mao ang Timaan. “Pagabautismohan kamo sa Espiritu Santo sa dili madugay sukad karon.” Ug sa diha nga giula ang Dugo, ang maong Timaan gipadala niadtong Adlaw sa Pentecostes, nga sama sa usa ka nagahaguros, makusog nga hangin.

148 Mao kadto ang pinaka-tema sa matag apostoles. Kadtong, “Nadawat ba ninyo ang Espiritu Santo sukad nga mitoo kamo? Paghinulsol kamo, ang matag usa kaninyo, ug pabautismo sa Ngalan ni Jesus Cristo alang sa kapasayloan sa inyong mga sala, ug inyong madawat kining gasa nga Espiritu Santo, kay usa kini ka Timaan, amen, nga kamo miagi na gikan sa kamatayon ngadto sa Kinabuhi.” Mao kana. Sa diha nga ang Gen-...kadtong iglesiang Judio hinayhinay nang nawala, gipulihan kadto sa mga Gentil, ug kadto na dayon nga mga pagtuis nga sama niana; karon migawas kini, sa pagsagop nianang mga nahabilin nga mga Gentil, alang sa Iyang Ngalan, ang Pangasaw-onon.

149 Nakita n’yo kung unsay akong pasabot? Nakita n’yo kung unsa ang ginahisgotan sa Kasulatan dinhi? Kung wala gipasundayag ang Timaan, kung ingon-ana walay epekto ang pakigsaad. Kita n’yo? Kinahanglan nga maipakita Kini. Tungod, kung nagaingon ka nga nagatoo ka, ug wala ka nagasunod sa mga ginasugo sa Pulong, kung ingon-ana wala ka nagatoo. Kita n’yo? Bisan pa nga na-sirkunsisyon ka na, bisan pa nga nakapamiyembro ka, ug bisan pa nga nabautismohan ka, nahimo mo na ang tanan niining mga butang nga sama niana; dili kana sa gihapon mao ang Timaan, ang Espiritu Santo.

150 Kadtong maayo kaayong iskolar padayon nga nakigsulti kanako, sama sa giestorya ko kaganina. Miingon siya, “Billy,” ingon niya, “Mitoo man si Abraham sa Dios, ug kini giisip kaniya alang sa pagkamatarung. Unsa pa ma’y buhaton sa maong tawo gawas nga toohan ang Dios?”

151 Ingon ko, “Tinuod kana, Doctor. Husto kana. Mitoo siya sa Dios. Ingon niana ang sulti sa Biblia. Husto ka. Hangtud sa nianang imong punto, husto ka.”

152 Kutob nga ang—ang—ang dose kaniadto ka mga maniniid, nga gipadala didto ug sa pagpaniid sa yuta sa Canaan, kutob nga padayon silang nagalakaw paingon sa Canaan, gauswag sila; apan sa diha nga miabot sila didto na sa utlanan, ningsalikway na sila dayon.

153 Ingon ko, “Kamong mga Baptist okey pa, kutob sa inyong naabot, apan nadawat na ba ninyo ang Espiritu Santo sukad nga mitoo kamo?” Hum. Ingon ko, “Hinumdumi, gidawat sa Dios kaniadto ang pagtoo ni Abraham. Siya—mitoo siya sa Dios, ug kadto giisip kaniya alang sa pagkamatarung, matuod kana, apan dayon gihatagan siya og selyo sa sirkunsisyon, ingon nga usa

ka ilhanan, usa ka ilhanan para kaniya.” Dili nga ang iyang unod, nga na-sirkunsisyon, adunay kahilambigitan sa iyang kalag, apan usa kadto ka ilhanan nga Siya (ang Dios) giila ang iyang pagtoo.

¹⁵⁴ Ug gihatag Niya kanato ang ilhanan, ang Espiritu Santo, nga Iya kitang giila ingon nga mga magtotoo. Kay, “Paghinulsol, ug pagpabautismo ang matag usa kaninyo sa Ngalan ni Jesus Cristo alang sa kapasayloan sa mga sala, ug madawat ninyo ang gasa nga Espiritu Santo. Kay ang saad alang kaninyo!”

¹⁵⁵ Sabta n’yo ang mao nga punto karon. Ang mga Judio kaniadto, bisan unsaon pa nila pagpamatuod nga na-sirkunsisyon sila, apan kinahanglan nga maipakita ang timaan. Kung wala kini dinha, walay epekto ang pakigsaad. Kawang kini.

¹⁵⁶ Mao usab kini sa karon, pareho ra. Bisan unsa pa’y imong nabuhat, bisan unsa pa ka maayo nga mahimo mong—mahimo mong isaysay ang Biblia. Mahimong usa ikaw ka magtotoon sa Biblia. Oh, sus! Mahimo nga imong—mahimong moingon ka, “Usa ako ka magtotoo, ug tanan na.” Apan sa gihapon ang Timaan ang gikinahanglan. Ingon nga usa ka magtotoon sa Biblia, moingon ka, “Usa ako ka buutan nga tawo, Igsoong Branham.”

¹⁵⁷ “Dili ko igsapayan kung unsa ma’y ingnon ni kinsa man, dili mo mapildi kana nga tawo. Wala gyud ko’y nakita kaniya nga naghimo og bisan unsa man nga sayup, sa tibuok kong kinabuhi.” Wala *kana’y* unsa man nga kahilambigitan sa Dios. [Gipalagitik ni Igsoong Branham ang iyang tudlo—Ed.] Adunay usa ra ka gikinahanglan, ug kana lang gayud!

¹⁵⁸ Ug dili mo kadto mahimo. Dili mo mahimong ipahid ang dugo didto sa balabag sa pultahan, kon diin, ang timaan angay’ng maipakita gawas nga namatay ang karnero. Ug ang dugo mao ang klarong ilhanan nga namatay ang karnero. Dili nga tinumo-tumo lang; namatay gyud ang karnero!

¹⁵⁹ Ug ang Espiritu Santo maoy usa ka klarong Timaan nga ang imong Cordero namatay ug imong gidawat ang maong Timaan diha sa imong kaugalingon, tungod ang Iyang Kinabuhi mismo anaa kanimo. Kita n’yo? Dili og patoo-too lamang. Dili og pagpaaron-aron. Dili mga pagpangsundog. Anaa gyud Kini dinha! Kabalo ka niini. Kabalo gyud ka niini. Nakahibalo ang kalibutan niini. Anaa gyud ang Timaan dinha.

¹⁶⁰ Bisan unsa pa ka maayo ang maong tawo. Mahimong usa siya ka magtotoon sa Biblia. Mahimong usa ka . . . Mahimo og unsa man nga matang sa—sa kamaayong miyembro sa iglesia. Mahimong usa ka buutan nga tawo. Mahimong usa—usa ka pangulo sa usa ka denominasyon. Mahimong anaa sa—sa herarkiya sa Roma. Ako—wala ko kabalo kung kinsa man kini siya, wala kini—wala kini nagapasigurado niini.

161 Apan, ang Israel, ang si kinsa man nga magtotoon sa Biblia nasayod nga ang Israel usa ka tipo sa Iglesia, eksakto, nga paingon ngadto sa yutang saad. Ug didto kon diin Siya nagapanaw paingon.

162 Apan sa diha nga miabot ang panahon sa kagabhion, ug padayon ang pagpanaw niadto, adunay usa ka bililhon nga gikinahanglan. Bisan unsa pa siya ka dugay nang tinuod nga Judio, bisan unsa pa ka maayo niya pag-atiman ang iyang mga pananum, bisan unsa pa ka maayo niyang gimahal ang iyang mga silingan, bisan unsa pa ka daghan ang gipanghimo niya, bisan unsa pa siya ka maayo nga miyembro, bisan unsa pa ka daku nga ikapulo ang gihatag niya. Ang tanan niining mga butang maayo kaayo. Okey kana. Usa siya ka buutan nga tawo, inila sa iyang mga paryente, ingon nga usa ka maayong tawo. Apan kon walay timaan, sa dugo, mamatay gyud siya.

163 Oh, tabangan ako unta sa Dios, para sa niining mga ania dinhi ug diha sa mga nagapaminaw sa teyp, nga mapatuhop kana!

164 Bisan pa man, mahimo nga nagwali ka sa Maayong Balita, mahimo nga nagpagula ka og mga yawa, mahimo nga nagsulti ka og laing mga dila, mahimo nga nakasinggit ka, misayaw ka diha sa Espiritu, apan kung wala ang Timaan.

Moingon ka, “Posibli ba nga mahimo ko kana?”

165 Nag-ingon si Pablo nga posibling mahimo mo. “Bisan pa nga magsulti ako sa laing mga dila sa mga tawo ug sa mga manulonda, bisan pa nga ihatag ko ang tanan kong katigayunan aron mapakaon ang mga kabus, itahan ko ang akong lawas aron pagasunogon ingon nga usa ka halad, aduna man ko’y pagtoo nga makapabalhin og mga bukid, ug kining mga butanga, ako walay kapuslanan sa gihapon.” Ayaw pagsalig niana. Ang Timaan kini! Bisan unsa pa ang imong nahimo, bisan unsa ka pa ka buutan; pagmokidlap na ang kapungot sa Dios, ang Timaan lang ang pagailhon niini.

166 Usa kini ka Timaan nga ang bili nabayaran na, kadtong gikinahanglan. Ug ang gibayad nga bili niini mao ang Kinabuhi ni Jesus Cristo, ug Iyang gihalad ang Iyang Kinabuhi. Ug mibalik ang Iyang Espiritu diha kanimo, ingon nga usa ka Timaan nga gidawat ka. Ug dala-dala mo kana nga Timaan, adlaw ug gabii, dili lang pag-Dominggo. Sa tanan kini nga panahon, nga aduna kanimo ang Timaan. “Kon Akong . . . Ang dugo ang mamahimong usa ka timaan alang kaninyo.”

167 Moingon ka, “Nagatoo ako sa gihapon. Usa ako ka magtotoo.” Okey ra kana. Apan pag-imong isalikway ang maong Timaan, nan giunsa mo man pagkahimo og usa ka magtotoo? Nagatug-an kini batok kanimo. Kita n’yo, nagatug-an kini batok sa imong mga pagpahayag, nga ingon mong nagatoo ka.

168 Magtotoon sa Biblia, buutan nga tawo, miyembro sa iglesia, kung unsa man ikaw, wala kana nagapasabot og bisan unsa man. Oo, sir. Tingali usa ka magwawali ang imong amahan. Tingali ang imong—ang imong inahan usa ka santo. Tingali. . . Kana’y—okay ra kana, manubag sila para sa ilang mga kaugalingon. Sama sa giingon ko na, nagasulay. . .

169 Ginapilit sa mga tawong himoon ang Dios ingon nga usa ka daku, tigulang na, tambokon, mapinangaon nga lolo, kita n’yo, ug adunay usa ka pundok nga mga apo, nga sama sa batan-ong mga Ricky ug mga Elvis, ug, “Sige dili man na makapadaut.”

170 Dili ingon niini ang Dios! Wala Siya’y mga apo. Usa Siya ka Amahan. Kinahanglan nga matawo ka pag-usab! Dili Siya kanang mapasagaron ug okey-okey lang.

171 Usa Siya ka Dios sa paghukom. Nagaingon ang Biblia nga ingon niana Siya. Mabangis ang Iyang kapungot. Dili mo puedeng tamak-tamakan lang Kana ug magpaabot sa kaayo sa Dios nga dawaton ka sa umalabot nga adlaw, bisan sa imong mga sala, ug dad-on ka didto sa Langit. Kung gibuhat man Niya kana, napahilingkawas na unta kining tanan dinhi, ug gidawat unta kaniadto si Eva. Kinahanglan toohan mo ang Iyang Pulong, o kon dili ikaw. . . mamatay ka. Ug kon toohan mo ang Iyang Pulong, maanaa kanimo ang Timaan. Uh-huh.

172 Andam nang mohapak ang kamatayon ngadto sa Egipto niadtong gabhiona, sa unsa mang takna. Makahahadlok kadto nga takna; bisan pa sa tanan nilang mga seremonya, tanan nilang mga adlaw nga pagsaulog, ug mga adlaw sa pagpuasa.

173 Miduaw ang Dios kanila. Nagpakita ang Dios sa Iyang dagkung mga ilhanan ug mga katingalahan sa taliwala nila. Unsa man kadto? Karon hunong ta sa kadali. Gipakita sa Dios kanila ang Iyang grasya. Gihatagan Niya sila og usa ka kahigayonan.

174 Dili nila Kadto mahimong balibaran, ug moingon, “Oh, wala kana’y pulos. Binuang lang kana. Butang lang kana nga nagagikan sa mga busay, aduna man gyu’y pagbuto nga—nga nagpabutho sa mapula nga mga lapuk, ug mao kana ang nagpapula sa dagat.” Dayon miabot ang mga ulan-nga-yelo. Dayon miabot ang mga baki. Nag-andam na ang Dios og usa ka lugar, ug gibutang ang Iyang Pulong diha sa baba sa usa ka propeta. Ug kung unsa man ang gisulti niya, nagakahitabo kini, ug nakita nila kini. Dili nila kini malimod.

175 Unsa man ang litukon ni Moises, mao kana ang madawat ni Moises, gikan sa Dios, tungod kay gisulti lang niya ang Pulong sa Dios. Miingon Siya, “Himoon Ko ikaw nga usa ka dios.” Usa ka dios si Moises para kanila. Kita n’yo? Wala sila’y lain pa nga nahibaloan, busa miingon Siya, “Mamahimo kang usa ka dios, ug si Aaron ang mamahimo mong propeta. Kita mo, mamahimo kang sama sa usa ka dios, kay gamiton Ko ikaw, ang imong

tingog, ug Ako magabuhat uban kanimo. Ug Ako’y magasulti, ug dili kini malimod sa mga tawo, kay maanaa kini dinha mismo. Unsa ma’y imong isulti, mahitabo.” Oh, sus! “Ipakita Ko kanimo kanang mga butanga.” Sus! Ug nakita kadto sa Egipto. Nakita nila kadto sa wala pa ang kagabhion, o niadtong panahon mismo sa kagabhion.

¹⁷⁶ Gipakita Niya kanila ang Iyang kaayo. Gipakita Niya kanila nga mahimo Niya kining walaon, ayohon.

¹⁷⁷ Gisulayan sa mga magmamadyik didto nga buhaton ang mao rang butang, ang mga manunundog. Makita mo kana sila bisan asa. Aduna si Janes ug si Jambres, nga nagtindog didto. Apan pag-abot na sa tinuod gyud nga butang, wala sila niini kaniadto. Husto kana. Magsige sila uban-uban, sa kadali. Apan, dili magdugay, madayag man gyud ang ilang kabuang.

¹⁷⁸ Ug dili ba nagaingon man ang Biblia nga ang mao rang butang magakahitabo sa kaulahiang mga adlaw, “maingon nga si Janes ug si Jambres misukol kang Moises”? Apan nadayag lamang ang ilang mga kabuang, ug ingon niini usab ang magakahitabo. Kita n’yo? Mao na kini, mga tawo nga dunot og hunahuna, mga sinalikway mahatungod sa Kamatuoran, ang Tinuod. Mahimong aduna sila’y mga kongregasyon ug halangdong mga butang, ug dagku, hatag-as, dagku og magarbong mga butang, apan moabot ra gyud ang takna.

¹⁷⁹ Magbarug nga malig-on sa Timaan! Mao kana ang gusto sa Dios nga buhaton nato. Magpabilin sa Iyang Pulong. Ayaw gayud pag-irog palayo Niini. Magpabilin mismo Niini. Ingon niana ang ginaingon sa Biblia.

¹⁸⁰ Pahapak na ang kamatayon. Ang Dios nagpakita na kanila og kalooy, nagpakita og mga gahum ug mga ilhanan.

¹⁸¹ Karon mohunong kita sa usa ra ka gutlo o duha, sa nianang orasan dinha. Hunahunaon lang nato diha sa atong mga hunahuna, balik, kung unsa ang Iyang gisaad nga mahitabo sa kaulahiang mga adlaw. Nahunahunaan ko kon basin dili lang nato nasusi pa, kini usab, kita n’yo?

¹⁸² Iyang gibuhat na ang tanan niining mga butang, ug bisan pa niana wala sila’y tinguha nga maghinulsol, o toohan ang mensahe sa maong panahon. Sa gihapon dili nila gustong buhaton kini, bisan pa nga naipakita na kini sa atubangan nila, ug siguradong napaila na gayud.

¹⁸³ Ug sa diha nga makita mong nagakahitabo na ang ingon nianang mga butang, usa kini ka ilhanan sa nagasingabot na nga paghukom. Ang paghukom nagasunod sa niining mga butang. Kanunay kining nagakahitabo, ug kini dili mahimo nga dili-apil. Kita n’yo? Gasunod ang paghukom sa grasya. Pag-gisalikway ang kalooy, wala na’y nahibilin pa gawas sa paghukom. Busa kanunay kining nagasunod niini.

¹⁸⁴ Karon, diha sa maong eksena. Ang matag espirituhanong hitabo usa ka ilhanan gikan sa Dios. Magbantay gayud. Himatikdi kana, kita n'yo. Bantayi, ang matag espirituhanong hitabo, ang tanan nga nagakahitabo, usa ka ilhanan. Dili aksidente nga ania kita dinhi. Kining mga butang dili basta lang nagakahitabo tungod sa aksidente. Usa kini ka ilhanan. Usa kini ka ilhanan, para makaadto—makaadto sa luwas nga dapit, sa gilayon. Si Noe usa kaniadto ka ilhanan para sa iyang henerasyon; si Elias usa ka ilhanan sa iyang henerasyon; si Juan usa ka ilhanan sa iyaha usab. Kita n'yo? Ang tanan, ang Mensahe sa iyang kapanahonan niini, usa ka ilhanan. Bantayi Kini, tan-awa kung unsay ginabuhat Niini. Kita n'yo? Usa kini ka ilhanan. Ang tanan adunay kahulogan.

¹⁸⁵ Ug wala na'y ubang panahon nga kini nga matang sa Mensahe moabot. Dili kini mahimong moabot sa mga adlaw ni Luther, dili kini mahimong moabot sa mga adlaw ni Wesley, dili kini mahimong moabot sa mga adlaw sa Pentecostal. Dili kini mahimo. Kita n'yo? Wala'y . . . wala pa'y ingon nianang butang nga nagakahitabo, ug bisan pa niana gisaaran na kita diha sa Biblia. Kita n'yo? Ania na kita sa katapusan. Wala'y puedeng mahitabo, dili kini puedeng mahitabo gawas lamang sa niining panahon. Ug nagakahitabo kini ingon nga usa ka ilhanan. Unsa kaha ang maong ilhanan?

¹⁸⁶ Oh, mahal kong mga tawo, igsoon kong lalaki, igsoong babaye, magpasilong ilalum nianang Timaan, dihadiha dayon. Kita n'yo? Ayaw, ayaw pagdawat og unsa man nga puli niini. Ayaw, ayaw, ayaw, ayaw gayud buhata kana. Kita n'yo? Ayaw Kini handurawa. Magpabilin ka dinha hangtud nga nahibal-an mong naaplikar na ang Timaan, hangtud nga (ang tibuok mong) ang hunahuna nga anaa kang Cristo maanaa kanimo, hangtud nga ang tanang kabuangan sa kalibutan nawala na, kita n'yo, hangtud nga ang tibuok pangandoy sa kasingkasing mao gayud Siya. Kita n'yo? Kana, dayon, kabalo na mo, nan nasayod ka nga aduna gyu'y butang nga nagakahitabo. Miingon si Jesus, "Kini nga mga ilhanan maganunot kanila nga nagatoo," dili mga nagapatootoo lang, kondili mga magtotoo gayud. Kita n'yo? Karon, dili nato gustong mamasin, manalagma niini; ayaw gyud pagpanalagma.

¹⁸⁷ Ang Mensahe sa iyang kapanahonan niini usa ka ilhanan para sa mga kaiglesiahan. Usa kini ka ilhanan para sa mga tawo. Ayaw'g . . . inyo, inyo bang nasabtan kini? [Nagaingon ang kongregasyon, "Amen."—Ed.] Nagalaum ako, sa mga nagapaminaw sa teyp, nga mao pud sila, kita n'yo, ug ngadto sa mga ubang bahin pa sa kalibutan. Kita n'yo, ania na ang ilhanan sa maong panahon. Aduna na'y Timaan nga kinahanglan maaplikar, ug wala na'y uban pang panahon nga mahimong moabot Kini.

¹⁸⁸ Himatikdi ang mga pagpangandam sa Dios para sa niining panahon. Karon, sama sa nahibaloan na nato nga ang Biblia nag-ingon, “Tanan niining mga butang nahitabo ingon nga mga panig-ingnan, nakita n’yo, para kanato.” Himatikdi, sa diha nga andam na ang Dios nga hukman ang Egipto, naghimo usá Siya og mga pagpangandam. Unsa ma’y Iyang unang gibuhat? Wala gayud Siya nagausb sa Iyang mga pamaagi.

¹⁸⁹ Ang unang butang, sa gibuhat Niya, sa diha nga naghimo Siya og mga pagpangandam, nagpadala Siya og usa ka propeta nga dala ang usa ka mensahe. Ang unang butang nga gibuhat Niya sa Iyang katawhan mao ang nagpadala og usa ka propeta nga may dalang mensahe.

¹⁹⁰ Ang sunod nga butang nga Iyang gibuhat, aron nga mapaila Niya kini nga propeta, nagpadala Siya og Haligi nga Kalayo ingon nga usa ka pagpaila, aron mapaila kini.

¹⁹¹ Ug ang ikatulong butang nga gipadala Niya mao ang timaan. Husto gyud kana. Ang timaan, unsa ma’y kahulogan niadtong timaan? Kasiguradohan!

¹⁹² Una, Iyang propeta nga dala ang mensahe; Iyang gipaila ang Iyang Kaugalingon sa taliwala sa . . . pinaagi sa—pinaagi sa usa ka Haligi nga Kalayo nga nagauban sa Iyang propeta; dayon Iyang gipadala ang usa ka timaan, aron sa pagpasilong niining dugo, nga Iyang gidawat kini nga pang-puli nga kamatayon imbis nga kamo niini. Dayon, ang maong dugo mao ang timaan nga Iyang pangitaon, nga nadungog mo ang mensahe, mitoo sa Haligi nga Kalayo, ug gidawat ang maong pangpuli nga Iyang gikatagana para kanimo, ug napailalum ka sa maong dugo nga mao mismo ang kemika sa kinabuhi nga nawagtang tungod kanimo. Sus! Daw sa unsa ka hingpit, daw sa unsa ka hingpit nga butang kana, kita n’yo, nagapasilong ka ilalum sa dugo.

¹⁹³ Karon anaa ka ilalum sa Espiritu, ilalum sa Balaang Espiritu. Kita n’yo? Kita n’yo? Mitoo ka sa Mensahe sa karong panahon, kita n’yo, nagatoo ka sa—sa—sa—sa—sa gahum, sa—sa—sa Haligi nga Kalayo. Nagatoo ka niana, kita n’yo, ug gatoo ka gayud.

¹⁹⁴ Karon, karon tan-awa, dili igo ang pagtoo lang Niini. Dili ang—ang. . . Ang paglakaw-lakaw lang palibot Niini, dili igo. Kita n’yo, samot lang nga ginadaut mo niana ang imong kaugalingon, “Ang tawo nga mahibalo nga magbuhat sa maayo, ug kana wala niya pagabuhata, kaniya kana sala.” Kita n’yo, kadtong mga hangtud utlanan lang nga mga magtotoo, naghigot si Jesus sa mao rang butang.

¹⁹⁵ Mga Hebreohanon, sa ika-6 nga kapitulo, “Kay mahitungod niadtong mga naiwagan sa makausa, ug mga nanagpakatilaw sa hatag nga langitnon ug nahimong mga umalambit sa Espiritu Santo, ug nakatilaw sa maayong Pulong sa Dios, ug sa mga gahum sa katuigan nga umalabut, ug unya mahulog,

dili na mahimo ang pagpabag-o kanila pag-usab ngadto sa paghinulsol; samtang nga gilansang nila pag-usab ngadto sa ilang kaugalingon ang Anak sa Dios; ug ilang gipakawalay bili ang Dugo sa pakigsaad, nga pinaagi niini gibalaan sila . . .” Ang kemika dinha mao ang nagabalaan. Dili Kini ang Timaan. Ang Dugo dili mao ang Timaan sa karon. Ang Kinabuhi mao ang Timaan.

¹⁹⁶ Dili mahimong maatua ang kinabuhi, kay usa kadto ka mananap. Ang kemika niini mao ang timaan, gikinahanglan mo kaniadto ang literal nga dugo nga mapahid didto sa pultahan. Apan sa karon ang Balaang Espiritu na kini. Paingon na kita niini, sa makadiyut na lang, aron mapamatud-an kana, kita n’yo. Ang Kinabuhi mao na ang Timaan.

¹⁹⁷ Ang imong kinabuhi wala na, ug patay ka na, ug ang imong kinabuhi patay na. Natago ka diha sa Dios, pinaagi kang Cristo, ug naselyohan dinha pinaagi sa Balaang Espiritu. Ang hunahuna nga atua kang Cristo anaa kanimo. Ug si Cristo, ug ang Biblia, ug ang Pulong, mao ra. “Sa sinugdanan mao na ang Pulong, ug ang Pulong uban sa Dios, ug ang Pulong mao ang Dios.” Kung ingon-ana ikaw, ug ang Pulong, ug ang Dios, ug si Cristo, mao ra. “Ug kung kamo magapabilin Kanako, ug ang Akong Pulong anaa kaninyo, managpangayo kamo sa bisan unsa nga buot ninyo, pagabuhaton kini kaninyo.” Kita n’yo?

¹⁹⁸ Gibutangan og gahum ang mga ngabil ni Moises, aron moadto didto dala ang Iyang Pulong ug misulti, ug mitungha ang mga baki; misulti, dayon mihawa ang maong mga baki; misulti, mitungha ang mga kuto; misulti, dayon ang kinabuhi—ang maong mga kuto ninghawa. Amen!

¹⁹⁹ Apan gikinahanglan niadtong tungora ang timaan para sa tanang Israel. Gikinahanglan gikan sa tanang Israel kadto nga timaan. “Ug kung makita Ko ang timaan, molabay Ako ibabaw kaninyo.” Oh, sus, sus! Daw sa unsa nga kasiguradohan!

²⁰⁰ Ang Israel nga nagagawas kaniadto gikan sa Egipto, usa ka tipo, sa anti-tipo sa karong panahon. Ang Egipto mao ang iglesia kaniadto, ug ang Israel nagrepresentar sa Pangasaw-onon. Ug sa diha nga migawas ang Israel sa Egipto, mao usab ang Pangasaw-onon migawas gikan sa iglesia. Kita n’yo? Tungod, kinahanglan nga aduna gyud Siya’y pagagawasan, ug kinahanglan gyud Siya’y mogawas, nga, kung usa kini ka tipo. Ang—ang iglesia atua sa Egipto, didto sa kalibutan ug sa kasal-anan, ug wala gyu’y pagtagad sa—sa—bahin sa imong Timaan. Wala gani sila nagatoo Niini. Apan gusto kini sa Israel, tungod kay kaluwasan kini para kanila. Oh! Oh! Angay lang nga magpalipay kini kanato, himoon ang atong mga kasingkasing nga . . . Oh!

²⁰¹ Iaplikar Kini, iglesia! Ayaw gayud pagkapakyas niini. Mahimo ba ninyo karon? Ayaw, ayaw, ayaw hulata ang pagsalop sa adlaw. Ayaw, ayaw, ayaw, ayaw pahulayi, sa adlaw og gabii.

Ayaw gayud mamasin. Dili kini magpulos, mga anak, Dili kini magpulos. Kinahanglan nga maanaa kanimo ang Timaan!

²⁰² Moingon ka, “Nagatoo ako. Oo, moadto ko. Ako, oo, nagatoo ako sa Mensahe. Ako . . .” Okey ra kana, apan, kana—maayo kana.

²⁰³ Apan kinahanglan nga maanaa kanimo ang Timaan! Nadungog ba ninyo, Branham Tabernacle? Kinahanglan nga maipakita ninyo ang Timaan! Kung wala Kini, ang tanan ninyong pagtoo kawang lang. Kita n’yo? Mahimong magkinabuhi ka og usa ka maayong pagkinabuhi; nagapatalinghug ka sa kung unsa ang ginaingon sa Pulong; nagasimba ka; nagapaninguha kang magkinabuhi nga matarung; maayo kana, apan dili ingon niana Kini. “Kung makita Ko ang dugo,” mao kana ang Timaan. Ug ang Timaan sa karon dili ang . . .

²⁰⁴ Tungod, unsa, Iyang—Iyang kinahanglan kaniadto nga makita ang mismong kemika, tungod nga wala na ang kinabuhi, siya . . . nawala na gikan niini, usa man kadto ka mananap.

²⁰⁵ Apan sa karon Iya na Kini Mismong Kinabuhi nga anaa diha sa Dugo. Ug ang kemika usa lamang ka paila o ilhanan sa pagkabalaan, apan ang Kinabuhi Niini Mismo mao ang Timaan; kay kung wala ang sirkunsisyon, kung wala ang Timaan, wala gani ikaw diha sa pakigsaad. Masigtabang nga nagapamuhat ang maong tibuok butang. Kung nagaingon ka nga na-sirkunsisyon ka na sa Pulong, ug sa Niini lang gyud, kung ingon-ana toohan mo gyud ang Pulong; kung nagatoo ka sa Pulong, nan moabot gyud kanimo ang Timaan, kay miingon siya, “Paghinulsol kamo, ug managpabautismo ang tagsatagsa kaninyo sa Ngalan ni Jesus Cristo alang sa kapasayloan sa mga sala, ug madawat ninyo ang gasa nga Espiritu Santo.” Mao kana. Oh, sus!

²⁰⁶ Himatikdi kung ingon-ana ang mga pagpangandam alang sa Iyang mga paadto-sa-yutang-saad nga mga katawhan. Himatikdi kung unsa ang Iyang gibuhat. Una, aduna Siya’y katawhan nga giandaman Niya og usa ka yuta. Nag-andam Siya og usa ka yuta para kanila. Ug naghatud Siya didto og mga pagpangandam para niini, alang sa maong paadto-sa-yutang-saad nga katawhan. Para lang kadto sa mga pinili nang daan para sa nianang yutang-saad, adlaw sa Pangasaw-onon. Ug giunsa Niya kadto paghimo, nagpadala Siya og usa ka propeta nga dala ang usa ka mensahe, mailhan kini pinaagi sa usa ka Haligi nga Kalayo, ug naghatag og usa ka timaan aron makasigurado sila nga husto kadto. Hust kana. Kalipayan niya kadto.

²⁰⁷ Ang Israel, nga nagagawas gikan sa Egipto niadtong tungora, usa kadto—usa kadto ka tipo. Ang kini sa karon mao ang anti-tipo, sa Iglesia nga nagagawas sa mga denominasyon.

Karon, dili tanan nag-denominasyon. Ang pasabot ko ang Pangasaw-onon. Kita n'yo? Ang ubang mga tawo, adunay pila ka mga independiente nga ingon ka dili-tarung sama sa mga denominasyon, usahay mas ngil-ad pa gani.

²⁰⁸ Ang ginahisgotan ko mao ang mahitungod sa ginaaplikar nga Timaan. Ang Timaan nagauyon gayud sa matag Pulong. Kita n'yo? Kinahanglan gyud, tungod kay Kini mao ang Pulong. Kini mao ang Kinabuhi nga anaa sa Pulong. “Ang Akong mga Pulong Espiritu; Kinabuhi ang mga Niini,” ang giingon ni Jesus. Kita n'yo?

²⁰⁹ Sa diha nga gisugdan ni Moises ang Iyang ministerio didto sa Israel, nga kauban ang dagkung mga ilhanan nga makita mo, nagkatipon dayon ang Israel gikan sa tanang bahin sa Egipto, ngadto sa Goshen, nagabalik ngadto sa lungsod pinuy-anan, kay nahibalo sila nga adunay butang nga andam nang mahitabo. Oh, daw sa unsa nga tipo!

Oh, they come from the East and West,
They come from the lands afar, (husto kana,
nadungog ninyo ang maong kanta)
To feast with the King, to dine as His guest,
How blessed these pilgrims are!
Beholding His hallowed face
Aglow with love Divine;
Blest partakers of His grace,
As gems in His crown to shine.

Oh, Jesus is coming soon,
Our trials will then be o'er.
Oh, what if our Lord this moment should come
For those who are free from sin?
Oh, then would it bring you joy,
Or sorrow and great despair?
When our Lord in glory comes,
We'll meet Him up in the air.

²¹⁰ Ang pagpakita sa Timaan! “Ug pagabanhawon Ko siya sa kaulahiag nga adlaw.” Sigurado gayud! Ania na kita sa maong mga adlaw.

²¹¹ Nanggitigum ang katawhan ngadto sa Goshen. Andam na sila. Nahibalo sila nga aduna gyu'y butang nga andam nang mahitabo. Sama lang sila sa . . .

²¹² Ipanag-ingnan mo ang mga pato, sa diha nga panahon na sa pagtigum-tigum, dungan silang tanan nga manglupad. Sa diha nga ang mga buyog, ang tanang uban pa, gapangandam na, aduna sa kung unsa nga kaigmat nga nagabira kanila.

Ang Balaang Espiritu ang maoy nagabira sa mga tawo!

²¹³ Oh, pag-moabot na ang panahon sa kapungot sa Dios, ang matag . . . Ania na nagaabot ang duha ka pato, laki ug baye. Ania

na nagaabot ang duha ka gangsa, laki ug baye; ania na nagaabot ang duha ka kabayo, laki ug baye; aduna sa kung unsa nga nagabira kanila, ang mga pinili nang daan. Ang tanang uban pa nangamatay. Oh! Ang tanang uban pa nangamatay! Apan ang kadtong mga nagkaaduna niadto nga pagbira nga nagasugyot kanila nga mosulod, nasayod sila nga inandam kadto nga arka. Usa kadto ka timaan nga adunay moabot nga ulan. Nasayod sila nga adunay nagasingabot nga ulan, bisan unsa pa ang makita niadtong tungora ug bisan unsa pa ang ginahunahuna sa mga tawo kaniadto. Nasayod sila.

²¹⁴ Aduna sa kung unsa nga atua sa sulod nila, nga nagaingon, “Pagsulod na didto, karon mismo! Pagsulod na didto, tungod kay mao lang kana ang luwas nga lugar.” Tungod kay, nag-andam ang Dios og usa ka propeta, gipadala Niya ang arka ingon nga usa ka ilhanan, miingon, “Pagsulod na didto,” ug paabot na ang ulan. Ug nanagsulod sila mismo didto, nga pares-pares. Ang tanang mga mananap ningsulod, nga pares-pares, didto sa arka, tungod kay nagpailalum sila niini. Bisan unsaon sa tanang uban pa nga . . .

²¹⁵ Ug ang tanan nga atua sa gawas niadto nga arka nangamatay. Ang tanan nga atua sa gawas sa maong timaan, sa maong dugo, nangamatay, tanan sila. Ang tanan nga anaa sa gawas sa Timaan, sa Espiritu Santo, mamatay.

²¹⁶ Bisan unsa ka pa ka buutan, bisan unsa pa kamo nga mga miyembro sa iglesia! Daghan kaayo kanila niadtong mga adlaw ni Noe. Daghan kaayo kanila kaniadto sa mga adlaw ni Moises; apan ang tawo nga napakyas sa pag-aplikar sa dugo, ingon nga mao ang timaan, kaniadto, namatay siya. Kadtong mga wala nakasulod sa arka, nangamatay. Kadtong mga napakyas sa pagsulod ngadto kang Cristo, kay Siya mao man ang Arka!

²¹⁷ Ang Nahaunang Mga Taga-Corinto 12, nag-ingon, “Pinaagi sa usa ka Espiritu kitang tanan gibautismohan ngadto sa usa ka Lawas.” Sa mistiko, dili sa iglesia; kondili sa mistiko, dili sa mga denominasyon; sa mistiko nga Lawas ni Jesus Cristo! “Pinaagi sa usa ka Espiritu,” dagkung letrang E-s-p-i-r-i-t-u, Espiritu, “gituslob kitang tanan pasulod ngadto niining usa ka Lawas.” Kung ingon-ana ang Timaan anaa na diha sa pultahan, kay anaa ka na kang Cristo. Ug Siya mao ang Usa, ang imong Halad, Nga miatubang sa paghukom. Ug sa diha nga ang Dios motan-aw dinha, wala Siya’y ni usa ka butang nga mahimong buhaton. Ingon niana ka gayud ka luwas, tungod kay ang Dios ug si Cristo mao ra nga Persona, ang Espiritu nga nahimong unod ug miipon uban kanato. Ug mao kana ang Dios diha sa Kaugalingon Niya Mismo, ug kamo, ang Mismo Niyang mga anak, sulod sa maong Lawas. Tan-awa, dili nga usa ka kemika, kondili ang Espiritu! “Molabay Ako ibabaw kaninyo.”

218 Gikan sila sa tanan nga bahin sa Egipto, sa pagtigum ngadto niining usa ka dapit, aron nga mapailalum sila sa niini nga timaan.

219 Ug gikan sila sa pagka mga Methodist, Baptist, Presbyterian, Lutheran, Pentecostal, tanang uban pa, aron nga mapailalum sa Timaan. Eksaktong sama sa nahitabo kaniadto!

220 Ang Haligi nga Kalayo ang nagrepresentar didto. Ug gisultihan sa usa ka tawo ang usa pa, gisultihan niini ang usa usab, ang maong usa usab gisultihan ang usa pa gyud, ug, mahibaloan mo na lang, ania na silang tanan nga nagasugod pangabot. Misugod sila og pangabot, ug gibantayan nila ang ilhanan sa Dios. Miingon sila, “Haduol na ang paghukom.”

221 Dayon miingon ang propeta, “Nadungog ko ang Dios. Magkaaduna og usa ka timaan. Ug inyong ipahid ang dugo sa pultahan. Patyon n’yo ang karnero, ipahid ang dugo niini diha sa pultahan, ug mao kana ang mamahimong timaan, tungod kay andam nang mohapak ang kamatayon.”

222 Sultihan ko kamo karon, ingon nga Iyang alagad, gawas lamang napahid na ang Timaan dinha sa pultahan, adunay mohapak nga usa ka espirituhanong kamatayon. Ug ang tanang mga kaiglesiahan paingon na sa—sa nianang konseho, sa World Council of Churches. Nagapabalik na silang tanan sa Katolisismo. Ug kadto lang mga tinuod, nga mga natawo na pag-usab, ang magapabilin nga gawas niini!

223 Hinumdumi, dili ang inyong Pentecostal nga mga denominasyon, tungod anaa na sila sa sulod niini. Nga nagapakita lang nga patay sila! Patay na sila. Nanaghalad sila. Ningbalik pud sila. Gipagawas nila Siya sa pultahan, apan ginapangita Niya ang Timaan. Tungod kay, ang bugtong butang nga ilang gisaligan mao ang pagsulti diha sa laing mga dila.

224 Ayaw gayud pagsalig diha sa pagsulti og laing mga dila, diha sa bisan pa man. Kondili tugoti nga maanaa dinha ang Timaan Mismo, ang Persona ni Jesus Cristo, ang Kaugalingon Niyang Kinabuhi nga maanaa kanimo. I-sirkunsisyon dili lang *kini, kana*; kondili i-sirkunsisyon ang tibuok mong pagkatawo, hangtud nga ikaw ug si Cristo mamahimong Usa ra. Si Cristo nga anaa sa sulod mo, ug nga ang Iyang Kinabuhi nagakinabuhi diha kanimo.

225 Karon, karon, gikan sila sa tanang bahin sa Egipto! Ug tan-awa karon, sama sa makita nato kung unsa ang gibuhay nila kaniadto, sa diha nga makita nato nga pahaduol na ang maong panahon, minandoan kita nga buhaton nato ang mao usab nga butang. Nahibalo ba kamo niana? Bantayi kung unsa ang giingon sa propeta.

226 Ug atong pagabasahon karon, kung gusto n’yong basahon, diha sa Mga Hebreohanon sa ika-10 nga kapitulo. Ug kung gusto ninyong basahon uban kanako, gusto kong mobasa og usa ka

bersekulo o duha dinhi karon sa dili pa kita mopadayon. Mga Hebreohanon ika-10 nga kapitulo, ug sugdan nato sa ika-26 nga bersekulo sa ika-10 nga kapitulo sa Mga Hebreohanon. Dili, akong. . . Tan-awon nato. Oo. Oo, sir! Sa Mga Hebreohanon, sa ika-10 nga kapitulo, ug sa ika-26 nga bersekulo, kita n'yo.

Kay kung magpakasala kita sa tinuyo sa human ta madawat. . .

227 Tan-awon nato, kung husto ba ang pagkabasa ko niana? Oo. Husto kana. Oo.

. . .kung magpakasala kita sa tinuyo human ta. . . madawat ang pag-ila sa kamatuoran, wala na'y halad-tungod sa mga sala.

Apan usa ka makalilisang nga paghulat sa paghukom, ang kabangis sa kalayo nga magalamoy sa mga kaaway.

Tan-awa dinhi! Ang tawo nga nakapasipala sa kasugoan ni Moises sa mapamatud-an sa duha kun tolo ka mga saksi mamatay sa walay kalooy:

. . .unsa ba ka labing mabug-at nga silot, bisan pa, sa hunahunaa ninyo, ang angay igasilot bisan pa nga takus, niadtong nagayatak sa tiil, nakayatak sa Anak sa Dios, ug. . .nag-isip nga butang nga walay-bili, ang dugo sa tugon, nga nagbalaan kaniya, ug nga nakapanamastamas sa Espiritu sa grasya nga nagagikan sa Dugo?

228 Ministro, miyembro, maayo nga tawo, buutan nga tawo, unsa pa man ikaw, ug nahibalo ka nga gitangtang na sa Dios ang sigarilyo gikan kanimo. Kamong kababayen-an, nahibalo kamo nga Iya nang gitangtang ang pagsul-ob og mga shorts gikan kaninyo, ug—ug ang pagpamubo og buhok, ug tanan na, gikan kaninyo. . .Nasayod kamo nga gibuhat Niya kana. Apan dayon motalikud kamo ug magbuhat bisan pa niana, ug isipon ang Dugo sa pakigsaad, sama sa nahitabo Niini kaniadto, “ingon nga walay-bili,” Nga mao ang nagbalaan kaninyo ug naghatud kaninyo hangtud niining puntoha!

229 Sama sa mga maniniid kaniadto, kon nakaabot man sila hangtud dinhi sa utlanan, ug nakalantaw na didto, ug miingon, “Bueno, kabalo ko anaa lang gyud kini dinha, apan grabe man gud kalisud ang mga balabag. Kita daw sa mga dulon ra kon tan-awon,” nangamatay sila didto sa kamingawan. Hangtud utlanan lang nga mga magtotoo!

230 Dili lang nga nakadangat ka na niining punto, nga nagaingon, “Nagatoo ako sa Mensahe.” Sunda ang mensahero. Pagsulod ngadto kang Cristo! Moingon ka, “Bueno, gatoo man ko sa gisulti sa matag Pulong, Igsoong Branham.” Maayo kana, apan kana'y—kana'y ang kaarangan lamang sa pagbasa.

231 Dawata ang Mensahe, ipasulod Kini sa imong kasingkasing, nga kinahanglan maangkon mo gayud ang Timaan, ang mismong Kinabuhi nga atua kang Cristo nga maanaa gayud kanimo. “Kung makita Ko kana, molabay Ako ibabaw kanimo.”

232 Sa diha nga makita na nato ang dagkung mga ilhanan sa niining kaulahi pang panahon nga ania na sa kalibutan karon, nasayod kita nga husto kana. Karon tan-awa, naghulat ako para niini, sulod sa dugay, dugay na nga panahon, alang sa niining Mensahe para kaninyo. Kita n’yo? Ug nakita na ninyo ang pangkaulahi pang panahon nga mga ilhanan. Ug giwali ko Kini kaninyo, ug gipakita Kini kaninyo, sa tanan-tanan nga gisulti ni Cristo. Husto ba kana? [Nagaingon ang kongregasyon, “Amen.”—Ed.] Mouyon ba mo niana? [“Amen.”] Ania na kita sa kaulahi pang panahon. Wala na ko’y nakitang nahibilin nga wala pa mahitabo.

233 Moingon mo, “Unsa diay ang mahitungod sa mapintas nga mananap?” Kadtong mga nagasalikway sa Balaang Espiritu aduna na’y marka sa mapintas nga mananap. Sa ulahi na moabot ang silot niini. Kita n’yo?

234 Didto sa Israel, sa dihang mitingog na ang trumpeta diha sa tuig Hubileyo, ang tanan nga tawo . . . Nahimatikdan ba ninyo si Cristo, sa pagbasa Niya niadto? Tunga ra ang gibasa Niya niadto, tungod ang tunga ra niadto ang naaplikar niadtong panahona. Kita n’yo? “Iya Akong gisugo sa pag-ayo sa mga masulob-ong kasingkasing, sa pagwali sa kagawasan, ug uban pa, kita n’yo,” apan, Siya, “ug ang nahimut-ang tuig sa Ginoo.” Ang tanang uban pa niini, wala Niya—wala Niya gibasa kadto; gibutang na Niya ang Kasulatan, tungod para kadto sa niining panahon. Kita n’yo? Kabahin lang ang gibasa Niya kaniadto, ang bahin lang para sa Iyang adlaw.

235 Karon kini maoy kung unsa ang Iyang pagabuhaton sa karon. Kini mao kung unsa ang Iyang ginahisgotan, pinaagi sa Iyang dinihogang Espiritu, alang sa iglesia karon. Karon na ang maong takna. Karon na ang maong panahon. Dawata ninyo Kini, katawhan. Dawata gyud ninyo Kini!

236 Grabe! Makita na nato ang makalilisang nga panahon sa katapusan, ang pulang mga suga nga nagakidlap, bisan asa. Bisan diha sa kinaiyahan, makita nato nga ginapakidlap na sa kinaiyahan ang maong suga, “Ang panahon haduol na.” Makita na nato kini diha sa iglesia, nga ang maong suga nagakidlap na. Kondenado na siya. “Haduol na ang panahon.” Anaa na siya dinha sa kalibutan. Makita nato kini diha—diha sa mga kawanangan, sa kadagatan, sa mga kanasuran, bisan asa na lang; diha sa adlaw, sa bulan, sa mga bitoon. Makalilisang nga mga ilhanan!

237 Makita nato ang pangkaulahi pang panahon nga mga ilhanan mahitungod sa Espiritu Santo nga nagaanha balik sa mga tawo.

Sama sa nahitabo kaniadto sa mga adlaw ni Lot, kung unsa nga ang Balaang Espiritu namuhat kaniadto pinaagi niadtong tawhanong lawas, nga mao ang Dios nga nadayag diha sa unod. Kung unsa nga ang Dios misulod Siya Mismo sa tawo, Siya Mismo diha sa Iyang Pangasaw-onon niadtong panahona, ug gipakita ang mao rang ilhanan, nag-ingon si Jesus nga mahitabo ang mao ra mismong butang sa kaulahiang mga adlaw. Makita na nato kini. Makita nato ang mao ra nga Haligi nga Kalayo. Bisan ang siyensiya nakakuha og retrato Niini, ug uban pa. Makita natong ania na ang maong mga pangkaulahiang-panahon nga mga ilhanan. Nasayod kitang ania na kini.

²³⁸ Ug kung ingon-ana, makita ninyo kini, kung nagatoo kamo kanako! Kung wala kamo nagatoo kanako; toohi ang maong mga ilhanan, toohi ang Pulong, tungod nagahisgot ang mga niini kung unsa ang ginasulti ko kaninyo. Kung wala ako nagasulti kaninyo sa Kamatuoran, dili ang mga niini magpamatuod. Dili gayud ang Dios makigsulti ngadto sa bakak. Kamatuoran ang ginasulti sa Dios. Ug kini nga mga Pulong nagapamatuod nga Kamatuoran ang ginasulti ko kaninyo. Ang mga niini mao ang nagapamatuod mahitungod sa Mensahe nga akong ginawali. Dili lang ang Manolunda didto sa suba niadtong adlaw, nga nag-ingon, “ang imong Mensahe mao ang magauna sa ikaduhang Pag-abot ni Cristo,” ang mga buhat mismo! Kung dili kamo makatoo nga kamatuoran ang gisulti niadtong Manolunda; toohi ang maong mga buhat, kay ang Biblia nag-ingon nga kining mga butanga mahitabo sa katapusang panahon. Ang mga Niini mao ang nagapamatuod. Mas lanog ang ginasulti sa mga Niini kay sa akong mga pulong o sa kang kinsa man. Iyaha kining Pulong. Ang mga niini nagapamatuod sa maong panahon.

²³⁹ Ug makita nato kining dagku, makalilisang nga pangkatapusang mga ilhanan diha sa mga tawo, ug mga ilhanan sa panahon, diha sa kalibutan, kagul-anan sa mga kanasuran.

²⁴⁰ Makita na nato ang Israel nga atua na sa iyahang yutang natawhan. Ang bandila, ang Bitoon ni David nga may unom ka tumoy, nga nagakayabkayab didto, ang pinaka-karaang bandila sa tibuok kalibutan, ang pinaka-kaniadto pa nga bandila sa tibuok kalibutan. Usa na siya ka nasud. Usa na siya ka gobyerno. Usa na siya mismo ka katawhan. Apil na siya sa kapunungan sa mga nasud. Siya, siya’y, ang tanan niining mga butang ingon na niana siya. Miyembro na siya sa U.N. Ug aduna na siya’y kaugalingong kuwarta, tanan na. Nag-ingon si Jesus, “Dili mahanaw kining kaliwatana hangtud ang tanan matuman.” Ug, hinumdumi, niadtong mismong gabii nga ang Israel nahimong usa ka nasud, mao kadtong gabii nga ang Manolunda sa Ginoo mipakita kanako didto. Husto kana. Dinha na gyud kita.

²⁴¹ Ang tanan-tanan eksakto gayud nga nagatudlo ngadto sa Kamatuoran. Wala ako namakak kaninyo. Ang gisulti ko kaninyo Kamatuoran, ug nagpamatuod ang Dios nga nagsulti

ako kaninyo sa Kamatuoran. Karon, hinumdumi, inyo akong igsoon. Tawo lang ako, kita n'yo. Usa lang ako ka tawo nga sama kaninyong tanan, apan aduna gyu'y kinahanglan nga maghatud Niini, aduna gyu'y kinahanglan nga magsulti Niini. Dili nako kagustohan kana; Iya kanang gusto. Ug nagsulti ako kaninyo sa Kamatuoran, ug nagpamatuod Siya mismo kaninyo nga Kini mao ang Kamatuoran. [Nagaingon ang kongregasyon, "Amen."—Ed.]

²⁴² Sa diha nga makita na nato kini nga mga butang sa ibabaw sa yuta karon, oh, mga tawo, mao na kini ang kaulahiag takna. Itabon na kanang Timaan kanimo, sa madali nga mahimo mo; o, pagsulod na sa Timaan, sumulod ka na sa maong Timaan. Sa diha nga makita na nato ang makalilisang nga ilhanan sa katapusan, ug haduol na ang panahon, nga nagapasidaan kanato, "Haduol na ang panahon."

²⁴³ Oh, pamalandungi kini nga maalampon gayud! Kinahanglan maghigugmaay kita sa usa'g usa. Oh, sus! Kinahanglan magmahigugmaon gyud kita! Ayaw gayud pagsulti og dautan batok sa usa'g usa. Kung aduna ma'y nakasala, iampo siya dayon. Magkauban kitang tanan diha niini, sa Dios. Managsoon kitang lalaki ug babaye. Oh, magkinabuhi nga Diosnon. Magkinabuhi, magkinabuhi ingon nga mga anak nga babaye sa Dios, magkinabuhi ingon nga mga anak nga lalaki sa Dios. Magkinabuhi nga malulot, maloloy-on, mapainubsanon.

²⁴⁴ Ayaw tugoti nga may dautang moabot sa imong hunahuna, sa imong mga panghunahuna. Basta, isalikway kini dayon. Kung manuktok man kini diha sa pultahan, ayaw kini pasudla. Ingna dayon, ipakita lang ang imong Timaan, nga padayon lang nga nagalakaw, "Napailalum ako sa Dugo!"

²⁴⁵ Hinumdumi, daghan kanila ang miadto ngadto sa mga babaye niadtong gabhiona, nagaingon, "Hoy, Gertie, Lillie, ang uban pa kaninyo, gawas mo dinha, adto ta sa party karong gabii."

²⁴⁶ "Huh-uh! Ilalum na ako sa dugo. Napailalum na ako sa timaan, sa pagpabilin dinhi. Ang akong gugma para lang sa akong Magbubuhat. Anaa na ang kamatayon sa kayutaan karong gabhiona."

²⁴⁷ Ug anaa na ang kamatayon sa kayutaan sa karon. Nagahulat na ang paghukom, haduol na kini. Ang atomika, ang mga hydrogen, ug ang tanan na nga matang sa mga hitabong-dautan, gahulat na sa mga nasud.

²⁴⁸ Ug ginapalihok na sa Dios ang Iyang Iglesia, ug gipakita na ang tanan. Dugay-dugay na natong gitipigan ang Cordero, ginabantayan, nakita ang Iyang mga pagpamuhat, nakita ang Iyang kinaiyahan ug tanan na, apan ang Timaan kinahanglan nga maaplikar karon. Kinahanglan gyud Kini nga maaplikar. Kini lang ang bugtong butang. "Gawas ang tawo ipanganak

pag-usab sa Espiritu, ug sa tubig, dili gayud siya makasulod.” Ug kinahanglan nga maghigugmaay sa usa’g usa. Kinahanglan nga ilain sa mga magtotoo ang ilang mga kaugalingon gikan sa kalibutan. Dili lang nga tagdon kini nga daw sa wala lang.

²⁴⁹ Karon, kamong mga tawo nga nagapaminaw Niini, diha sa teyp, kamong kababayen-an, kamong kalalaken-an, pagpaminaw sa makadiyut. Kung nagatoo gyud kamo kanako, toohan n’yo Kini karon.

²⁵⁰ Panahon na kini nga undangan na ang mga pagpakiglalis sa usa’g usa. Toohi ang Mensahe sa Biblia! Toohi si Jesus Cristo! Ug maghigugmaay, ug magpasidungganay, ug magrespetohanay ang usa’g usa. Ang mga lalaki magrespeto sa ilang mga asawa. Respetoha ang inyong panimalay. Ipahiusa ang imong panimalay, tungod kay, hinumdumi, kining Cordero para sa panimalay, dili lamang para sa usa; para sa tibuok panimalay, usab, nga madala. Kinahanglan nga ang tanan madala. Kinahanglan natong higugmaon ang usa’g usa. Ug ang mga magtotoo kinahanglan nga ilain nila ang ilang mga kaugalingon gikan sa kalibutan.

²⁵¹ Himatikdi, wala sila nagkatigum-tigum aron estoryahan ang mahitungod sa mensahe. Nagtigum-tigum sila aron iaplikar ang dugo, aron iaplikar ang timaan.

²⁵² Mao kana ang kinahanglan ninyong buhaton. Pastor Neville, ug sa niining kongregasyon, sa mga tinugyanan, sa mga diyakono, kaninyong mga kaigsoonan, panahon na nga isalikway nato ang tanang mga kabuang sa kalibutan, panahon na nga isalikway nato ang tanang uban pa. Igo na ang mga nakita nato karon, hangtud nga kita sigurado, gayud. Ug kinahanglan maaplikar ang Timaan. Pagwala Kini, mamatay ka; mamatay ka gayud, mao gyud kana.

²⁵³ Oh, ayaw’g duol nga motigum lang, nga moingon, “Nagatoo ako Niini.” Pagpailalum gyud Niini, sumulod ka Niini! [Usa ka nagsabasaba nga pang-publikong sibya sa radyo ang madungog—Ed.] Unsaon man paghimo niini? “Pinaagi sa usa ka Espiritu gibautismohan kita pasulod ngadto sa Lawas ni Jesus Cristo.” Ang tanan magtoo, sa tibuok ninyong kasingkasing. Kita n’yo? Dili Siya responsabli sa kadtong mga wala nagpailalum Niini.

²⁵⁴ Kinsa kanang nagasulti? [Adunay nagaingon, “Usa kana ka nasagap nga sibya sa radyo, Igsoong Branham.”—Ed.] Sibya sa radyo gikan sa taas? [“Miagi lang sa speaker.”] Miagi sa speaker. Napaagi nila kini dinha? May nadungog ko nga usa ka tawo. [“Igsoong Branham, usa kini siguro ka sibya sa radyo nga nakasulod dinha.”] Sibya sa radyo, oo. Oh, ilang—ila kini naikonekta. Siguro ilang . . . Oh, sa mga sakyanan ba? Pasayloa ko. May sa kung unsa nga gisulti ang usa ka tawo. Ug abi ko adunay gustong makigsulti kanako, ug wala nila kini napaabot,

nakita n'yo, ug mao kana ang hinungdan nga akong—nga nasulti ko ang gisulti ko. Nakita kong nagtan-aw tan-aw kamo sa palibot. May nadungog ko nga tingog. Abi ko adunay mitindog aron magsulti og unsa man, ug wala ko mahibalo kung unsa kadto. Karon, karon, salamat.

Apan, magtoo, magpailalum Niini!

²⁵⁵ Wala magtigum ang Israel, nga nagaingon, “Moadto kitang tanan sa Goshen karon. Magbiyahe kita ngadto sa Goshen. Pagsakay na mo sa inyong kamelyo, ug kami usab mosakay sa carrong-baka. Ug paubanon nato ang mga Jones, dinhi, ug uban pa, ug—ug ang mga Goldberg, ug moadto kitang tanan ngadto—ngadto sa Goshen. Ug kabalo ba mo? Magapanulti si Moises karong adlaw.” Dili kadto ingon niana. Dili, sir, igsoon! Kadto, mao ang pagpailalum niadtong dugo! Mao, gyud.

Dili nga maghisgot-hisgot bahin Niini; kondili magsulod ngadto Niini!

²⁵⁶ Ang usa kanila moingon, “Kabalo ka, Mr. Goldberg, sa tinuod lang kabalo gyud ko nga Kamatuoran kana.”

²⁵⁷ “Oo, igsoon, nagatoo ako nga kini ang Kamatuoran. Kabalo ko nga mao kana ang Kamatuoran.”

“Mr. Lavinski, unsa ma’y hunahuna mo niana?”

²⁵⁸ “Walay pagduhaduha nga Kamatuoran gyud! Nakita ko ang gahum sa pagsulti ni Jehovah nga Dios. Nakita ko kadtong mga baki nga ningtungha didtong yutaa. Kabalo ko nga wala gyud kana nahitabo hangtud nga gisulti niya kadto, ug kabalo ko nga si Jehovah nga Dios kadto.” Karon, maayo man kana.

“Na-sirkunsisyon ka na ba?”

“Oo, sir!”

“Usa ka ba ka magtotoo?”

“Oo, sir!”

²⁵⁹ Ug dayon sa diha nga nadungog niya si Pastor Moises nga nagasulti, niadtong adlaw, nga miingon siya, “Apan kinahanglan kamong magpailalum nianang dugo, kay nag-ingon ang Dios, ‘Ang dugo mao ang timaan.’ Usa kana ka timaan! Bisan giunsa mo pa pagtoo, bisan pila ka pa ka beses gi-sirkunsisyon; usa kana ka pakigsaad nga gihatag sa Dios kang Abraham, ug uban pa, mao kana ang pakigsaad. Apan kinahanglan nga magpailalum kamo sa dugo, usa kana ka timaan, kay miingon Siya, ‘Kung makita Ko ang dugo, Ako molabay.’ Israelinhon man, o kinsa man!”

²⁶⁰ Kana’y denominasyon man o dili denominasyon, asa man niini, kinahanglan nga magpailalum ka sa Dugo. Methodist man, Baptist, Presbyterian, Pentecostal, dili man denominasyon, unsa man ikaw, para kini sa indibiduwal. Kinahanglan nga magpailalum ka sa Dugo. Karon dili lang nga maghisgot-

hisgot bahin Niini; dawata Kini! Pagpatalinghug kanako! Pagpatalinghug kanako! Sa Ngalan sa Ginoo, patalinghugi ako! Kita n'yo? Kinahanglan nga magpailalum sa Dugo!

261 Wala Siya'y tulubagon sa kang kinsa man nga wala napailalum sa dugo. Giklaro gyud sa Dios nga ang tanan nga wala napailalum nianang dugo mamatay gayud.

262 Mahimo ko bang gamiton ang Iyang mga Pulong? Ang tanan nga atua sa gawas ni Cristo mamatay gayud. Unsaon mo man pagsulod kang Cristo? Unang Mga Taga-Corinto 12, "Pinaagi sa usa ka Espiritu!"

263 Dili nga, "pinaagi sa pagpakiglamano, pinaagi sa pagpamiyembro, pinaagi sa denominasyon." Mao kana kung unsa ang ginapaninguhaan nilang buhaton niini. Mahimo nilang buhaton kana.

264 "Apan pinaagi sa usa ka Espiritu gibautismohan kitang tanan ngadto sa usa ka Lawas." "Kung usa man ka manolunda gikan sa Langit ang magatudlo og laing uban pa," ingon ni Pablo, "ipatunglo siya." Mao kana ang Mensahe, pagsulod ngadto kang Cristo!

265 Tan-awa, ang si kinsa man nga tawo nga atua sa gawas sa timaan, walay responsabilidad ang Dios. Ug walay responsabilidad ang Dios sa kang kinsa man nga tawo, daku man o gamay, inila man o dili-inila, dato man o kabus, nakagapus man o hilwas, lalaki man o babaye; wala Siya'y responsabilidad sa kang kinsa man nga wala napailalum sa maong pakigsaad sa Timaan. Wala Siya'y responsabilidad.

266 Moingon ka, "Apan, Oh Ginoo, nabuhat ko *kini*. Nanghingilin ako og mga yawa. Ginoo, gibuhat ko *kini*. Ako—giwali ko ang Maayong Balita."

267 "Pahawa kamo Kanako, kamo nga nagabuhat og dautan. Wala Ko kaila kaninyo." Ilhon Niya lamang ang Timaan.

268 Nadungog ba ninyo Kini? Pag-ingon, "Amen." [Nagaingon ang kongregasyon, "Amen!"—Ed.] Karon, nakadepende na kini kaninyo. Siya . . .

269 Sa nagalingkod ako didto sa mga kakahoyan sa miaging adlaw, ug ang kauban kong mga lalaki natingala, nanag-ingon, "Duha na ta ka adlaw dinhi, wala ka pa'y . . ." Wala man lang ko'y napusil pa niadto nga usa ka squirrel. Nanag-ingon, "Unsa ma'y nahitabo?" Kita n'yo, ingon niana kadto. Kita n'yo?

270 Adunay miingon, "Ibutang kini diha kanila, diha kanila." Miingon pa, "Imo na kining gisulti—gisulti mo na kini Kanako." Kita n'yo? Karon ania na kini sa inyong sabakan. Ania na kini kaninyo.

271 Wala na'y bisan unsa man nga butang nga Iyang pagailhon gawas nianang Pakigsaad, sa Balaang Espiritu. Ug dili ninyo mahimong madawat kana nga Pakigsaad gawas lamang kung

kamo luwas, nabalaan, ug dayon nabautismohan na pasulod ngadto sa Lawas. Dili Niya gayud ilhon.

272 Mahimong masundog-sundog mo, mahimong mobati ka og maayo, ug maglukso-lukso og *pataas ug paubos*, magsulti sa laing mga dila, ug mosayaw diha sa Espiritu. Wala kana ni usa ka kahilambigitan Niini. Paminaw Niini, sa Ngalan sa Ginoo! Dili kana pagailhon sa Dios. Ginabuhat kana sa mga pagano. Ginabuhat kana sa mga balbal.

273 Moingon ka, “Usa man ako ka iskolar. Ginabuhat ko *kini, kana, o uban pa.*” Wala Siya’y labot kung usa man ikaw ka iskolar. Iskolar man pud ang yawa, kita n’yo.

274 Iya lamang ginaila ang—ang Timaan. Mao kana ang Mensahe sa maong takna! Mao kana ang Mensahe sa niining adlaw! Mao kana ang Mensahe sa karong panahon! Sa Ngalan ni Jesus Cristo, dawata ninyo Kini!

275 Dili nga usa ka pu...puli, butang nga mahimong ipahimutang sa yawa diha kanimo; sama sa usa ka dili-tinuod nga gugma, aron pahigugmaon ang usa ka lalaki ngadto sa usa ka laing babaye nga dili iyang asawa, o ang asawa ngadto sa dili iyang bana, o sa kung unsa niining dautan, makauulaw nga butang. Dili kana tinuod nga gugma. Ang yawa kana. Iya kanang mga pagpamuhat. Butang kini nga ginasulayan niyang itunol kanimo, nga pangpuli; usa ka kalipayan, aron mag-inom og makahubog nga mga ilimnon ug mobati og maayo tungod niini, moingon, “Namingaw ko; mogawas ko ug moinom og usa ka quart nga bino, ug aron makalimtan kini.” Kamatayon kana.

276 Ang Dios ang inyong kalipay. Ang Dios ang inyong kusog. Ingon nga nahibalo na sa Mensahe, nahibalo na sa Kamatuoran, mao kana ang atong katagbawan karon. Siya mao ang akong bug-os nga katagbawan. Diha Kaniya, ang tanang butang nga kinahanglanon ko anaa Kaniya. Mao kana ang atong kusog. “Ang akong tabang nagagikan sa Ginoo.” Kamong mga Cristohanon, saligi Siya para sa inyong kalipay, saligi Siya para sa inyong kusog, saligi Siya para sa inyong kasadya. Siya ang akong pakigdait. Siya ang akong kalipay. Siya ang akong gugma. Siya ang akong Kinabuhi. Usa kana ka Pakigsaad, ang Timaan nga anaa diha sa pultahan!

277 Wala Siya’y responsabilidad para sa usa ka tawo, usa ka tawo, bisan kinsa ka man, dili Siya responsabli, kung wala ka nagpailalum Niini.

278 Ug hinumdumi, ang tibuok pamilya gitigum, gidala tanan. Oh, sus! Oh, timan-i!

279 Moingon ka, “Bueno, ang akong papa usa man ka magwawali. Ang igsoon ko! Ang pastor ko! Ang akong...” Mahimong matuod kana, usab, apan unsa man ikaw?

280 Hinumdumi, sigurado ka lang pagmaipakita ang timaan! Kung ang usa ka tawo dinhi napailalum *dinhi*, ug ang iyang anak nga lalaki atua didto sa pikas dalan, atua ang maong anak sa peligro. Mamatay siya. Ang iyang papa maluwas. O, kung ang maong anak nga lalaki ania *dinhi*, ug ang iyang papa atua didto, mamatay ang iyang papa. Ang timaan lang gayud! “Kung makita ko ang timaan, molabay Ako ibabaw kaninyo.” Mao lang kana ang importanteng butang.

281 Moingon ka, “Buena, ang akong anak nga lalaki usa ka magwawali.” Kamong mga inahan moingon, “Maayo kaayo ang anak ko nga lalaki, o maayo kaayo ang anak kong babaye. Sultihan ko kamo, sila ang pinakabuutan nga mga bata. Napuno sila sa Balaang Espiritu, ug pagkamahigugmaon! Masinugtanon sila. Wala pa ako’y nakita og ingon niana!” Apan unsa man ikaw, mama?

282 Moingon ka, “Ang inahan ko mao ang pinakabuutan nga mama. Kabalo ko, kung mamatay siya, paadto siya sa Langit, tungod aduna gyud kaniya ang Timaan, Igsoong Branham.” Apan unsa man ikaw, igsoon? Kinahanglan nga ang tibuok pamilya mapailalum gayud.

283 Kapoy na ba mo? [Nagaingon ang kongregasyon, “Dili.”—Ed.] Akong... Alas dose na... Kadali lang. Mahimo kong undangon kini ug sugdan na lang unyang gabii. [“Dili.”] Apan kung inyong—kung gusto ninyong mohulat og dugay-dugay pa, paningkamotang kong dalion karon. [“Amen.”] Isalot ko na lang mismo kini. Tungod, siguro, mismo karon nga napailalum pa kamo sa pagdihog niini, mas maayo kung makuha n’yo mismo kini karon. [“Amen.”]

284 Sa diha lamang nga maipakita ang Timaan! Kung ingon-ana, ang tibuok pamilya kinahanglan mapailalum nianang Timaan, ang Dugo. Papa ug mama, kabalo ko kung unsay inyong ginabati. Aduna ko’y mga anak, usab, kinahanglan nga makita ko silang luwas. Nagapakig-estorya ako sa akong kaugalingon karon. Kita n’yo? Aduna ko’y mga igsoong lalaki. Aduna ko’y usa ka igsoong babaye. Aduna ko’y mga paryente. Ako—gusto kong makita sila nga luwas, usab. Apan, timan-i, pagdili-maipakita ang Timaan, mamatay sila. Walay pagkabanhaw para kanila. Husto kana. Wala na sila. Sa diha lamang nga ang Timaan maipakita!

285 Tan-awa, si Josue, unta aduna pa kita’y oras aron basahon kini. Markahi kini, Josue sa ika-2 nga kapitulo; ang bigaong Gentil niadto nga nagatoo, si Rahab.

286 Oh, alas nuebe pa lang unta. Gusto kong—gusto kong hisgotan kana ug ipakita lang kaninyo kung unsay nahitabo kaniadto, kita n’yo. [Nagaingon ang kongregasyon, “Ayaw lang tagda ang oras.”—Ed.]

287 Kining bigaong, Gentil, himatikdi, ang tibuok niyang pamilya. Usa siya kaniadto ka magtotoo. Ang tibuok niyang

pamilya kinahanglan nga magpailalum niadtong pulang pisi, kadtong timaan. Kinahanglan nilang magpailalum niini, kay kon dili mamatay sila. Nakadungog sila bahin sa kapungot sa Dios. Nakadungog sila bahin sa mga naipakita nga mga ilhanan ug mga milagro sa Dios sa taliwala sa Iyang katawhan, ug kinahanglan nga dawaton nila kini. Kinahanglan dawaton kini ni Rahab. Ang Dios, ang manggugun-ob nga manolunda, nagasingabot na. Nasayod sila niadto. Ug si Josue mao kanang manolunda. Nakalinya sila.

²⁸⁸ Ug mao usab ang matag nasud, sa kalibutan, anaa na nakalinya sa Paghukom sa Dios!

²⁸⁹ Kining luoy'ng, bigaon, nakadungog usab siya. Ang pagtoo nagagikan man sa pagpatalinghug! Miingon siya, "Ang tibuok nasud nalisang tungod kaninyo." Husto kana.

²⁹⁰ Karon, ang mga maniniid nga gipadala didto aron sa paghimo og mga pagpangandam, ug uban pa, gitahod ni Rahab kadtong mga tawhana. Ug, siya, gusto niyang maluwas. Miingon siya, "Kabalo ko nga Dios ang inyong Dios, ug nadungog ko ang bahin sa dagkung mga butang nga Iyang gihimo. Nasayran ko kung unsa ang Iyang gibuhat kang Og, ug nasayran ko kung unsa ang Iyang gibuhat sa nagkalainlaing mga nasud. Ug nakita ko nga kadtong mga midawat Kaniya naluwas, ug kadtong mga wala midawat Kaniya nangamatay. Ug gusto kong mabuhi," ingon niya. Oh, sus! Tan-awa. "Gusto kong mabuhi." Tungod sila kaniadto . . .

²⁹¹ Himatikdi, ang Jericho nakadungog kaniadto kung unsay ginahimo sa Dios, apan ayaw nilang dawaton ang maong pasidaan.

²⁹² Ug walay denominasyon niining nasud, sa tibuok niini, kondili nakadungog gayud kung unsa ang ginahimo sa Dios. Ayaw lang nilang dawaton ang maong pasidaan.

²⁹³ Ang Iyang dakung gahum ug mga ilhanan naipakita na. Kung unsay Iyang gihimo, gitabok Niya mismo ang Dead Sea, sama sa daw sa uga kini nga yuta. Napahimo Niya, nagbuhat Siya og mga butang gikan sa wala, ug nagbuhat og mga baki, ug mga kuto, ug mga pulgas nga mangtungha sa kawanangan; gibuhat ang mga niini pinaagi sa Iyang Pulong, pinaagi sa Iyang propeta. Dili kadto tinago. Nasayod sila niadto.

²⁹⁴ Ug miingon si Rahab, "Nadungog ko kana. Dili ko gustong mamatay kauban niining mga dili-magtotoo. Dili, sir!" Nasayod siya nga gasunod na niadto ang paghukom, tungod nga nakalinya na sila niadto. Nasayod siya niadto. Busa, nangita sila'g paagi para siya makaikyay niini.

²⁹⁵ Nagtoo sila kaniadto nga arang mapugngan sa mismong daku nilang denominasyon sa Jericho ang kapungot sa Dios, kita n'yo, ang mismong daku nilang denominasyon.

296 Ingon niana ang ginahunahuna sa kadaghanan kanila sa karon. “Oh, siguradong dili kana buhaton sa Dios.” Mao kana ang gisulti ni Satanas kang Eva. “Oh, siguradong dili buhaton sa Dios.” Buhaton gayud Niya, tungod nag-ingon Siya nga buhaton Niya, kita n’yo, ug mao kana ang Iyang Pulong. Oo, sir.

297 “Gawas nga ang usa ka tawo ipanganak pag-usab!” “Ug kini nga mga ilhanan maganunot kanila nga natawo pag-usab!” Kita n’yo? “Tungod niini ang tanang tawo makaila nga kamo mga tinun-an Ko,” ug uban pa, kita n’yo. Sige, gusto nilang buhaton kini. Oh!

298 Unsay nahitabo? Karon nanghilum sila. “Walay rebaybal nga mahitabo dinhi. Dili magpasiugda ang among denominasyon sa mga ingon niana. Ayaw namo og ingon niana nga matang sa mga binuang sa taliwala namo. Ginadid-an ko kamo nga motambong sa nianang panagtigum.” Huh! Jericho, nga nakalinya na gayud uban sa mga pagahukman sa silot!

299 Apan siguradong aduna gyu’y mga lalaking may dala-dalang teyp nga makalusot dinha, para sa kadtong mga pinili nang daan. Mubutho lang sila didto sa balay sa maong igsoong babaye ug magpatukar og mga teyp. Gihimo niya—ang mismo niyang balay nga usa ka simbahan, aron madawat ang mensahe.

300 Aduna kita sa gihapon og mga sama kanila, kabalo mo. Ginaabot sa Mensahe ang mga Binhing pinili nang daan, sa gihapon. Wala kita kabalo kung ginaunsa Niini pag-abot, apan nakaabot Kini didto, aron nga ang mga matarung dili mamatay uban sa mga dili-matarung. Ginasigurado gyud kana sa Dios, sa karon. Oo, molusot Kini sa unsa mang paagi. Wala kita nahibalo kung sa unsang paagi. Bisan pa nga ayaw nila Kining ipasiugda, apan adunay pipila ka Binhi dinha nga mga pinili nang daan.

301 Ang si kinsa man nga may nahibaloan sa Biblia, nasayod nga kadtong bigaong babaye pinili nang daan. Sigurado gyud! Wala siya’y. . . Nag-ingon ang Biblia, “Wala siya namatay uban kanila nga wala nanagtoo.” Husto kana. Kondili gitooan niya ang mensahe sa maong panahon.

302 Ug gihatagan siya sa Dios og usa ka ilhanan, pinaagi sa Iyang mga mensahero. Miingon, “Pagkuha og usa ka mapula, pula nga pisi ug ihikot kini diha sa imong. . .” Miingon, “Timani, kung dili mo ihikot kana nga pisi dinha, o ipabilin kini dinha, nga among gigamit sa pagpalagiw, wala kami tulubagon sa among gisaad kanimo.” Ug miingon, “Kung wala kamo napailalum niini, wala kami tulubagon.” Oh, sus! “Rahab, ang tanang mga pinili nang daan nga ania dinhi, adtoi sila didto ug pangitaa sila. Kuhaa imong papa, ang imong mama! Kay, kami migikan na, ilalum nianang halad-tungod-sa-sala, didto sa Egipto, ug ang tanan nga wala nagpailalum nianang timaan nangamatay. Rahab, ginahatagan ko ikaw og usa ka ilhanan. Usa kini ka timaan. Ug nagaingon ako, sa Ngalan sa Ginoo, sa pag-

ingon, kung ibutang mo lang kana! Nakaila gyud ako niana, sa mensahero. Nakaila ako sa maong manolunda sa kapungot, si Josue. Siya mao ang mensahero sa Dios nga nagapanggun-ob. Nakaila ako kaniya, ug nasayod siya nga kinahanglan aduna gyu'y usa ka ilhanang timaan. Ug ipabitay mo kini dinha, ug nagapasalig ako kanimo. Ginapanumpa ko.” Ug nanumpa ang Dios, usab, nga ang unsa man nga wala napailalum niini mamatay, ug ang tanan nga napailalum niini mabuhi.

³⁰³ Ug karon, ang mao rang panumpa mao sa gihapon sa karon, pareho ra, kita n'yo, “Dili Ko tugotang mamatay kamo uban kanila nga wala nagatoo sa Mensahe.” Ug sila . . .

³⁰⁴ Nadungog niya nga nahimo ang maong mga buhat, ug gitooan niya kadto. Apan, ang mahitungod sa, siya'y . . . Siya ug ang iyang amahan, ug pipila sa igsoon niyang mga lalaki, o unsa man, mao lang ang nagtoo niadto, sa tibuok siyudad.

³⁰⁵ Kita n'yo daw sa unsa lang ka gamay kadto? Usa ra *dinhi* ug *didto*, usa ra ka gamay nga pamilya gikan sa usa ka tibuok nasud. Husto ba kana? [Nagaingon ang kongregasyon, “Amen.”—Ed.] Eksakto gyud sa karon, ania ang mga kamatuoran nga atong ginahisgotan. Atong . . . Kung gusto ninyong makita kung unsa ang anti-tipo, kinahanglan nga makita ninyo usá ang tipo niini. Kinahanglan nga makita ninyo ang landong, diha dayon mahibaloan ninyo kung unsa ang itsura sa mao mismong tinuod nga butang. Kita n'yo?

³⁰⁶ Naipakita na ang Iyang gahum. Gasunod na ang paghukom. Kinahanglan silang magtoo, aron sila maluwas. Oo, sir. Ug kadtong mga . . .

³⁰⁷ Miadto didto kadto nga mga lalaki, kadtong mga mensahero, ug—ug nakaplagan kadtong pinili nang daan nga binhi nga nagtoo. Iyang gigamit ang iyang balay ingon nga usa ka simbahan, aron madawat kadto nga mga mensahero. Dili man nila dawaton sila sa ilang mga kasimbahanan. Dili, sir. Kita n'yo? Busa ang maong babaye . . .

³⁰⁸ Ayaw nila kanimo, usab. Palagpoton ka nila pag-aduna ka'y isulti og unsa man bahin Niini. Oo. Kita n'yo?

Natipon nila ang tanan sa iyang siyudad, kadtong mga motoo, ilalum sa timaan.

³⁰⁹ Mas maayong eksaktong ingon niana ang buhaton nato sa karon. Kung aduna ka'y gustong maluwas nga paryente, mas maayo nga ipasulod mo na sila mismo karon. Kita n'yo?

³¹⁰ Sa diha nga gigun-ob sa kapungot sa Dios kadto nga dakung siyudad, ang ilhanang timaan mao ang nagpapabilin nga luwas ang iyang balay. Amen. Unsa man? Ang ilhanan atua sa iyang timaan . . . O, atua ang timaan sa iyang balay, sa diha nga ang tanang uban pa nga bahin sa siyudad nangalumpag. Unsa man kadto? Unsa man kadto? Si Josue, ang mensahero sa Dios! Giila

sa Dios Mismo ang mensahe sa Iyang mensahero. Amen! Kadto ang nagpamatuod niadto. Kadto ang nagpamatuod niadto. Ilang giila ang mensahe. Iyang giila ang mensahe sa Iyang mensahero. Ug sa diha nga ang tanang uban pa nga bahin sa siyudad nangalumpag, atua nagpabilin ang pulang timaan ni Rahab didto sa pultahan, ug ang tanang uban pa kanila wala na.

³¹¹ Dayon, diretsong miadto didto ang manggugun-ob nga mga manolunda ug gigun-ob ang tanan-tanan nga atua sa sulod sa maong siyudad, wala ni usa ka buok nga butang ang nahibilin. Ang usa nga mokuha og usa ka buok nga butang, kinahanglan siyang mahanaw uban niini, gikan nianang denominasyon. Gisakup ang tibuok siyudad ug gigun-ob kini! “Tinunglo ang tawo nga maninguhang tukoron kini. Mamatay ang iyang panganay pag-sugdan niya kini,” ug uban pa. Tinunglo kini sa Dios nga sama niadto, kadtong dakung butang nga misalikway sa gras- . . . sa mensahe sa grasya ug kalooy, nga nanagdahum nga protektado sila.

³¹² Daghang mga tawo nagahunahuna, karon, “Tungod miyembro man ako sa iglesia, sigurado na ako.” Ayaw gayud toohi kana nga binuang.

³¹³ Sa dihang, “Ang dugo mao ang mamahimong usa ka timaan para kaninyo.” Ang Espiritu na karon mao ang Timaan para kaninyo, ang Kinabuhi nga atua sa Dugo.

³¹⁴ Mao ra kini sa gihapon, atong hunahunaon nga, ang mao ra nga timaan nga gigamit nila didto sa Egipto, ang mao ra nga timaan sa kinabuhi nga atua kaniadto sa Egipto, nga atua sa Egipto, gigamit sa Dios ang mao ra nga simbolo didto. Si Josue, usa ka hingpit nga tipo ni Jesus, nagmatinud-anon sa ilhanang timaan nga giwali sa iyang mensahero. Si Josue, sa dihang gisulti niya kadto, ingon niya, “Ayaw gayud ninyo hilabti kana nga balay o ang unsa man nga anaa sa sulod niini. Naka-reserba kini para sa Ginoo.” Amen!

³¹⁵ Usa ka Gentil, usa ka bigaon, usa ka nagabaligya sa iyang lawas, apan nakadungog siya ug mitoo, ug iyang giaplikar ang timaan.

³¹⁶ Bisan unsa ka pa ka nagtikubo na sa kasal-anan, unsa ma’y imong nabuhat, wala kana ni usa ka kahilambigitan niini. Iaplikar mo ang Timaan. Para Kini kanimo. Kung may mabati ka sa imong kasingkasing nga daw sa adunay nagabira kanimo, para Kini kanimo. Iaplikar mo ang Timaan. Ug ang gamhanang Jos- . . .

³¹⁷ Ang pulong nga *Josue* nagakahulogan og “Jehovang-manluluwas.” Mao usab ang *Jesus*, nga nagakahulogan og “Manluluwas.” Ug, si Josue, sa nahibal-an niya nga ang iyang mga mensahero . . .

³¹⁸ Ang iyang mga mensahero mibalik, ug miingon, “Gisunod ko ang imong sugo. Ug may usa ka babaye nga among nakaplagan,

sa dihang gipatukar namo ang mga teyp, kabalo ka. Nakakaplag kami og usa ka babaye nga mitoo. Ug gisultihan namo siya, nga ang tanan nga magpailalum sa nianang pula nga ilhanan didto, ang timaan, maluwas kini. Karon giwali ko kana. Ilhon mo ba kini, Josue?”

“Gipadala ko kamo sa pagbuhat niini.” Amen.

³¹⁹ Ug sa diha dayon, nga, giila kadto sa Dios, wala gayud nalumpag ang maong balay. Ug dayon sa diha nga atua na si Josue didto ug misenyas na aron gun-obon ang tibuok siyudad, diretsong silang nakasulod, ug si Rahab ug tanan sa iyang kaparyentihan mipabilin lang, ug tanan nilang mga kabtangan, amen, amen, ang tanan nilang mga kabtangan atua sulod sa balay, nga luwas. Mipabilin lang sila didto, ug wala na’y kinahanglan pang modungaw sila bintana. Mahimo nilang basahon ang Kasulatan samtang nagapadayon ang gubat.

³²⁰ Miadto siya pagkahuman niadto ug gipamaraygan, gipamaraygan ang heneral sa kasundalohan, ug gipasidunggan, ug mipuyo didto sa Betlehem, ug ang iyang bahin gihatag kanila didto. Ug nanganak siya og usa . . . nanganak siya og usa ka anak nga lalaki nga nahimong inila, ug kadto nga anak nanganak og usa pa ka inila nga anak nga lalaki, ug kana nga anak nanganak og usa na usab ka inila nga anak nga lalaki, hangtud nga miabot ang pinaka-inila, inila nga Anak nga Lalaki. Dire-diretso, ug diretso hangtud kang Obed, ug diretso hangtud kang Jesse, ug diretso hangtud kang David. Husto kana, ang bigaon nga si Rahab, tungod nga nagtoo siya sa mensahero. Iyang giaplikar ang timaan, ug naluwas ang iyang panimalay, o kon dili namatay unta siya kung asa siya kaniadto.

³²¹ Paminaw og ayo karon. Oh, moingon, mahibal-an mo ba kini? Ang tanan nga napailalum niini naluwas didto sa Egipto. Ang tanan nga napailalum niini naluwas didto sa Jericho. Ang tanan nga napailalum Niini maluwas sa karong panahon. Ang magpaula og dugo, nagkadugong karnero, usa ka tipo ni Jesus Cristo.

³²² Diha sa Mga Hebreohanon 13:10 ug 20. Wala na ko’y oras sa pagbasa niini. Isulat ninyo kini. Basahon ko unta kini. Gitawag kini “ang dayon nga pakigsaad.” Ang Dugo ni Jesus Cristo gitawag nga “ang dayon nga pakigsaad.” Oo, sir! “Dayon nga pakigsaad.”

³²³ Nganong wala kini gitawag nga “Walay-katapusang pakigsaad”? Tungod kay dili kini mamahimong Walay-Katapusan. Sa diha nga tinubos na kita, nan human na kini tanan. Kini maoy *hangtud sa kahangturan*, nga nagakahulogan, “usa ka kadugayon sa panahon,” hangtud nga mahurot kana nga panahon. Wala na’y usa pa niini. Sa diha nga mawala na ang panahon, dili na kita manginahanglan og pakigsaad.

Apan hangtud nga anaa pa'y panahon, kinahanglan nato ang pakigsaad.

³²⁴ Karon, hinumdumi, Mga Hebreohanon 13:10-20, usa ka “dayon nga pakigsaad.” Ang gapaula og Dugo nga saad sa Dios maoy nagaluwas kanato gikan sa kasal-anan. Amen! Wala’y kasal-anan diha Kaniya; kasal-anan, pang-kinaugalingon, unodnon.

³²⁵ Simbaha Siya ug ipahayag ang Iyang gisaad nga gahum! Ang mga nagapus-sa-Dugo, nagapus-sa-timaan, nga mga tawo sa Dios sa pakigsaad adunay Espiritu ni Jesus Cristo dinhi, nga, “Ang nagatoo Kanako, ang mga buhat nga Akong ginabuhat, iya usab pagabuhaton,” ginapakita ang maong pakigsaad. Kita n’yo?

³²⁶ Bag-ong Tugon! Ang *Tugon* nagakahulogan og “pakigsaad.” Husto kana, dili ba, Doktor Vayle? Nagakahulogan ang *Tugon* og “pakigsaad.” Ang *Bag-ong Tugon* nagakahulogan og “ang bag-ong pakigsaad.” Ang Daang Tugon mao ang daan, ilalum kaniadto sa karnero, kon diin ang kinabuhi niini dili mahimong moanha sa magtotoo. Ang Bag-ong Tugon mao ang Cordero sa Dios, ug nagaanha kanato ang Iyang Kinabuhi. Ang Kinabuhi sa Maong Dugo! Kita n’yo? Kinabuhi ang Dugo diha sa Bag-ong Tugon, kita n’yo, ang Kinabuhi nagagikan sa Dugo sa Cordero, nga nagakahulogan nga mao ang Bag-ong Tugon, ang bag-ong pakigsaad.

³²⁷ Kon diin, ang Dios, “Tapos niadtong mga adlaw a igasulat Ko ang Akong mga kasugoan sa papan sa ilang mga kasingkasing.” Kita n’yo? Kita n’yo? “Dili diha sa mga papan nga bato, ug dugo sa karnero, nga kinahanglan ingnon mong, ‘Oo, ako—aduna ko’y dugo *dinhi*, karon unsa ma’y ginaingon niining gibuhat ko?’ Kondili diha sa mga papan sa inyong kasingkasing, kita n’yo, ang pakigsaad nga iya sa Espiritu ang maoy igapakigsaad Ko uban sa mga tawo.”

³²⁸ Ug ginapakita Niini ang Iyang gahum. Juan 14:12, nagaingon, “Ang nagatoo Kanako, iyang pagabuhaton usab ang mga buhat nga Akong ginabuhat.”

³²⁹ Ang *Bag-ong Tugon* mao ang “bag-ong pakigsaad,” ang bag-ong Kinabuhi, nga nagapakita nga gitagbo ni Jesus ang tanan nga kinahanglanon nato nga gikinahanglan sa Dios, aron maibalik kita, ingon nga tinuod, nga mga anak nga lalaki ug anak nga mga babaye sa Dios, ilalum sa Dugo, kon diin wala na’y pagkahinukman sa silot.

³³⁰ Mga Taga-Roma 8:1, “Busa karon walay pagkahinukman sa silot niadtong mga anaa na kang,” dili niadtong mga *nagatoo* Niini, “kondili niadtong mga anaa kang Cristo Jesus, nga nagakinabuhi dili uyon sa unod, kondili uyon sa Espiritu. Ug ang Akong Pulong mao ang Espiritu ug ang Kinabuhi.” Kita n’yo? Oh, dili mahimong mokuha ako og teksto gikan dinha ug nga

dili mohisgot og mga duha pa ka oras. Apan dalion nato kini, kita n'yo.

³³¹ Wala na'y pagkahinukman sa silot; hilwas na sa sala, hilwas na sa mga pagkabalaka nga iya sa kalibutan, wala na'y pagkahinukman sa silot. Ngano man? "Kanila nga human na, pinaagi sa usa ka Espiritu, nabautismohan ngadto sa usa ka Lawas." Dinha naaplikar na ang Dugo sa Cordero. Gidawat na kamo sa Dios nga anaa sa Langit, ug ang inyong. . . ang Iyang Kinabuhi anaa na kaninyo, ug kamo mga anak nga lalaki ug mga anak nga babaye sa Dios.

³³² Ang kinaiya ninyo kinaiya na nga iya sa Dios. Unsa man kini, usa ba ka medyo walay-dugukan? Dili, sir! Ang Dios usa ka Dios sa paghukom. Siya'y usa ka Dios nga nagapanul-id. Kinahanglan nga nakalinya kini. Dili magpulos ang laing uban pa. Ingon niana nga matang sa kinaiya nga aduna ka, tungod kay usa ikaw ka kinaiya sa imong Amahan. Kita n'yo?

³³³ Unsa man? Ang kinabuhi, himatikdi nga sa diha (kini) ang kinabuhi gibuhis, para makuha ang dugo. Kita n'yo? Gibuhis mismo ang kinabuhi. Kita n'yo? Ang kinabuhi, gibuhis kaniadto, para makuha ang dugo. Kita n'yo? Gipahid ang maong dugo, ug ang kinabuhi niini dili mahimong moanha sa magtotoo kaniadto, kay kinabuhi man kadto sa mananap. Dili ang kinabuhi. . .

³³⁴ Apan, kita n'yo, imbis nga usa ka tawo, usa kadto ka mas labaw pa, mas labaw pa, mas labaw pa sa Tawo. Kita n'yo? Ug nagapahimo kana sa tawo karon nga dili lang tawo, kondili usa siya ka anak nga lalaki ug anak nga babaye sa Dios, tungod nga ang super, super, super, super, super nga Kinabuhi nga anaa Kaniya, nagaanha kanimo; ug ginabag-o ka gikan sa pagka-makasasala, ug sa mga butang nga iya sa kalibutan, gikan sa pagka-miyembro sa usa ka iglesia, ug sa pagka-magsisimba sa denominasyon, ngadto sa usa ka natawo na pag-usab nga Cristohanon, nga puno sa Espiritu; nga ang Kinabuhi sa Dios nagaagay diha gikan kanimo, sama sa mga aligato gikan sa usa ka puthaw'ng salsalan, sa diha nga nagakinabuhi ka, puno sa maligdong nga batasan, ug gugma, ug kalomo, ug ingon nga ang Balaang Espiritu ang maoy nagalihok, nagapanulti. Oh, sus! Tan-awa. Ug tungod sa (sa unsa?) sa pagpatalinghug sa Mensahe, makita ang Haligi nga Kalayo, ug sa mapanalanginong kasiguradohan, "Ako nakalabang na gikan sa kamatayon ngadto sa Kinabuhi." Himatikdi, busa, wala na gayu'y pagkahinukman sa silot.

³³⁵ "Kon ang atong mga kasingkasing wala magasaway kanato, nan madawat nato ang atong ginahangyo, kita n'yo, mahibal-an nato." Apan kung may sala diha sa atong kasingkasing, kung ingon-ana ginasaway kita niini, atong—atong mas maayo nga dili na lang nato sugdan. Kita n'yo? Kinahanglan nga hilwas ka sa kasal-anan. Ug ang paagi lamang nga makahilwas ka sa

kasal-anan mao ang pagsulod diha Kaniya. Mao lang kana ang mahimong pangtabon sa kasal-anan, mao si Cristo.

³³⁶ Hinumdumi, ang Dugo sa pakigsaad, ang Dugo sa pakigsaad dili mahimong ilhon nga wala ang Timaan. Dili mo mahimo. Dili mo himoon. Moingon ka, “Bueno, ako—ako’y gibalaan na gikan sa mga butang.” Dili kana mao ang Timaan. Ang Espiritu, ang maoy Timaan, ang Espiritu ni Cristo nga anaa diha kanimo. Toohi gyud kini!

³³⁷ Karon, tan-awa, ginasigurado kanato sa Pulong ang saad. Ang tanan niini mga teksto nga akong nasulat dinhi. Nga padayon mong maiwali sa tibuok adlaw, mora’g ingon niana, kita n’yo, ang mahitungod niini. Kita n’yo? Ginasigurado kanato sa Pulong ang saad, tungod kay Kini mao ang saad. Ang Pulong mao ang Saad, ug ang Pulong mao ang Dios, ug ang Pulong ato—ato. Ug nahimo kitang Pulong, ug ang Pulong nahimong kita. “Ug kung kamo magapabilin Kanako, ug ang Akong Pulong diha kaninyo,” nan, kita n’yo, nagakahimo kining usa ka dakung halangdong pamilya. Kita n’yo? Ginasigurado Kini kanato. Tungod kay ngano man? Bueno, kabahin man kini kanato. Kita n’yo? Kita n’yo? Kita n’yo, nagakahimo Kining kabahin nato. Pagkamaanindot nga teksto! Sige. Ginasigurado kanato, ang saad.

³³⁸ Ang Timaan mao ang ilhanan nga ang pagpalit nahimo na ug gidawat na. Karon, dili mo makuha ang timaan sa pamiliti sa tren kon wala mo pa nabayaran ang bili niini; ug ang paagi lamang nga mabayaran mo ang bili niini mao ang pagbayad niini. Husto kana. Unsa? Toohan Kini. Dawaton Kini. Ang bug-os nga pagtuman sa tibuok nga Pulong sa Dios ang maoy mohatag kanimo og katungod sa maong Timaan. Bug-os nga pagtuman! Dili nga bahin lang Niini sa kutob nga mahimong dawaton sa imong denominasyon, kondili tibuok gyud Niini. Bug-os nga pagtuman sa Pulong, nga mao si Cristo, ang maoy nagahatud kanimo pasulod kang Cristo.

³³⁹ Unsa kaha kung ang tibuok kanimo nakasulod na, gawas lamang sa imong mga tiil nga atua pa sa gawas? Unsa kaha kung ang tanan nimo nakasulod na, nga ang imong mga kamot sa gawas pa? Kadaghanan kanato nakasulod na, gawas lamang sa kasingkasing nga atua pa sa gawas? Kita n’yo? Kita n’yo? Ang kasingkasing atua pa sa gihapon sa kalibutan? Kita n’yo? Apan wala nato ginabuhay kana.

³⁴⁰ Hingpit, bug-os nga pagtuman ang maoy Nagapahiusa kanimo ug sa Pulong. Ginatoohan mo Kini, ang matag tipik Niini. Ug ang tibuok gyud Niini anaa sa sulod nimo, ug makita mo Kini nga nagapanglihok pinaagi kanimo.

³⁴¹ Wala ka nagapakig-uban sa usa ka pundok sa mga basta nagapasagad na lang. Kita n’yo? Usa ikaw ka Cristohanon. Bisan

unsa pa ang ginaingon ni kinsa man, dili gayud sila makaapekto kanimo. Anaa ka kang Cristo. Siguradong luwas ka.

³⁴² Pagmanuktok na sa pultahan ang kamatayon, wala na kini og unsa man nga gahum, kita n'yo, wala man lang. Ngano man? Kini mao lamang ang pagtikang gikan *dinhi* paadto Didto.

³⁴³ Wala ni unsa man nga kahulogan ang pag-edad. Human ka na sa pag-edad. Anaa ka na sa Eternidad, tungod nga anaa ka na Kaniya. Eternal Siya. Wala na kini og unsa man nga kahulogan, kung ikaw man batan-on pa, tigulang na, sa kahamtung pa lang, o unsa man ikaw. Matahum man, maut, putot, tambok, unsa man, wala kini og unsa man nga kahulogan. Wala kini'y kahulogan.

³⁴⁴ Wala ka na nagalaroy-laroy, ug tanan na niining mga butanga. Ikaw, human ka na niana. Patay ka na. Ang imong kinabuhi natago na diha sa Dios pinaagi kang Cristo. Naselyohan ka na sa sulod pinaagi sa Espiritu Santo, nga nagakinabuhi diha kang Cristo. Ang bugtong butang nga imong makita mao si Cristo. Kana lang. Mao Lamang kana, ang imong gikinabuhian. Oh, sus! Dili ikatingala nga naandan natong kantahon kanang hamubong kantang!

Pun-a ang akong dalan adlaw-adlaw sa
gugma,
Samtang nga nagalakaw ako uban sa
langitnong Salampati;
Tugoti akong nagaadto, nga may kalantahon
ug may pahiyum,
Pun-a ang akong . . .

³⁴⁵ Tugoti nga mamahimo akong usa ra ka igsoon ninyong lalaki. Tugoti ako nga ikinabuhi ang ehemplo sa kung unsa ang giingon ni Cristo nga kinahanglan ikinabuhi sa usa ka lalaki. Tugoti ako nga mamahimong usa ka igsoong lalaki ngadto sa usa pa ka igsoong lalaki, usa ka igsoong lalaki ngadto sa usa ka igsoong babaye. Tugoti ako nga mamahimong usa—usa ka ministro ngadto sa mga ministro. Tugoti ako nga mamahimong usa ka ehemplo sa mga ehemplo. Tugoti akong maipakita sa kalibutan nga kini nga Pulong mao si Cristo. Ang paagi lamang nga mahimo ko kini mao ang pagsulod ngadto Kaniya. Tungod, dili ko kini mahimo sa akong kaugalingon, dili mo kini mahimo. Apan tugoti ang Pulong ug ikaw nga mamahimong Usa ra, kung ingon-ana ikinabuhi Niini ang Kaugalingon Niini. Usa ikaw ka nagalakaw nga sinulat ni Jesus Cristo, sa diha nga makuha Niya ang bug-os nga pag- . . . , pagkontrolar kanimo, aron sundon ang matag Pulong.

³⁴⁶ Kung Siya mopaingon *niini*, “Gusto Kong buhaton Kini,” ug moingon ka, “Dili, dili, wala ako nagatoo Niana,” kita n'yo, wala ka pa sa Pulong kung ingon-ana. Kita n'yo?

³⁴⁷ Bug-os, karon tan-awa, bug-os, ha, ang bug-os nga pagkamasinugtanon sa tibuok nga Pulong sa Dios mao ang

nagahatag kanato og katungod sa Timaan. Dayon sa diha nga kita, nagaampo, kinahanglan nga aduna kanato ang Timaan nga maipresentar uban sa atong pag-ampo.

348 Kung moingon ka, “Nagaampo ako, Ginoo, sa tinuod wala pa nako . . .” Bueno, wala pa gayud kanimo. Mas maayo pa nga undangon mo na lang, kita n’yo, aron nga . . .Buhata, usá, ang pag-angkon sa Timaan, kita n’yo, tungod kanang Timaan maoy Iyang pagailhon. Kita n’yo? Oo, sir!

349 Pagnagaampo kita, kinahanglan natong ipresentar ang maong Timaan, “Ginoo, gituman ko Ikaw, sa bug-os. Ako nang gihinulsolan ang akong mga sala. Nabati ko nga Imo na akong gipasaylo. Nabautismohan na ako sa Ngalan ni Jesus Cristo. Ania na kanako ang Balaang Espiritu. Karon aduna ako’y panginahanglanon bahin sa usa ka butang para sa Imong kahimayaan. Ginoo, akong ginapangayo kini. Sa ako na kini karon.” Dayon aduna sa kung unsa nga butang *dinhi* nga nagaangkla, “whew-whew,” ma-imoha kini. Ingon niini ang ginabuhat Niana. Dayon human na kini. Human na kini. Sulbad na kini. “Akong ginapangayo *kini*. Ginapangayo ko kini. Kinahanglan maangkon ko kini. Kita n’yo? Kita n’yo? Akong—gusto ko kini para sa Imong kahimayaan.” Kita n’yo? Bueno, ingon niana kini, dayon Iya kining ginahatag kanimo. Dayon mahibaloan mo nga imoha na kini. Ingon niana kini, sa atong mga kaanakan, ug uban pa, atong ginaaplikar ang Dugo, ginatoohan kini. Kana lang. Sige.

350 Unsay Iyang ginahimo dayon? Sa diha nga imong, maipresentar mo ang Timaan uban sa imong pag-ampo, nagapakita Kini nga bug-os ka nang miabot ngadto sa pagkamasinugtanon sa tibuk nga Pulong sa Dios. Pagmakuha mo ang Timaan, nagapakita kana nga imong bug-os gituman ang matag Pulong. Dayon, ikaw ug ang Pulong usa na, pagpangayo lamang kini sa butang kung unsa ikaw. Kita n’yo? Kita n’yo? Kung ingon-ana, aba, nahibalo ka.

351 Kung moingon ako sa *niini*, “Kamot, tumana ako, kab-ota kana nga panyo!” Buhaton niini kini. Kita n’yo, misunod kanako ang maong kamot. Ngano man? Kabahin man kini kanako. Kita n’yo?

352 Dayon sa diha nga ikaw ug ang Pulong nahimong usa ra, ang matag saad, himaya sa Dios, imoha na ang matag saad. Motuman kini kanimo. Dayon imong ginabantayan kung unsa ang gusto nimong buhaton. Wala nimo ginabutang ang imong kamot sa kalayo, aron lang ingnon, “Tan-awon ko kung mahimo niini kaha.” Oh, dili, dili! Kita n’yo? Apan kung adunay usa ka butang sa nianang kalayo, nga kinahanglan kong kab-oton, motuman kini kanako. Kita n’yo? Kita n’yo? Husto kana. Kita n’yo, gusto mong bantayan kung unsa ang imong ginabuhat.

353 Mao kana ang hinungdan nga ang Balaang Espiritu dili basta-basta nga nagahatag, ug ingon-niana, kabalo na mo kung unsay akong pasabot, tungod adunay uban nga... Dili mo gustong... Ang usa ka tinuod nga alagad sa Dios wala nagapasigarbo Niini, nakita n'yo. Mao kana. Usa kana ka pagpasigarbo.

354 Sa diha nga nagaampo kita, atong ginapresentar ang Timaan. Nagapangita kini nga bug-os kitang nagtuman.

355 Ginasultihan kita ni Pablo, nga, "Ang dugo nagasulti." Nga, ang si kinsa man nasayod nga ang dugo, sa tinuod lang, ang dugo mismo, dili mahimong mosulti. Usa kini ka kemika. Husto ba kana? Pila ba ang nasayod niana? [Nagaingon ang kongregasyon, "Amen."—Ed.] Apan pila ba ang nahibalo nga nagasulti ang dugo? ["Amen."] Kung gusto ninyong isulat kana, Genesis 4:10. Nag-ingon ang Dios, "Unsa na ang imong igsoon?" Miingon pa, "Ang iyang dugo nagatuaw gikan sa yuta, batok kanimo." Husto ba kana? Nagasulti ang iyang dugo. Hallelujah! Miingon ang Dios, "Unsa na siya?"

 Miingon siya, "Magbalantay ba diay ko sa akong igsoon?"

356 Miingon, "Nagatuaw ang iyang dugo. Nagatuaw ang iyang dugo." Usa kini ka timaan. Usa kini ka timaan, nga siya gipatay. Ang iyang dugo nagatuaw batok kaniya.

357 Karon, kung nakuha ninyo kana diha sa Genesis 4:10, kung ingon-ana diha sa Mga Hebreohanon 12:24, sugdi pagbasa. Diha sa Mga Hebreohanon 10, 12:-4. Miingon, "Ang Dugo ni Jesus Cristo nagasulti sa labi pa ka maayong pulong kay sa kang Abel."

358 Kita n'yo, si Abel, usa siya ka matarung nga tawo. Namatay siya. Namatay siya, nga inosente, tungod atua siya sa hustong Dalan. Atua siya sa maong Dalan, nga nagabarug alang sa tinuod nga kapadayagan nga aduna siya kaniadto. Nagsulti siya. Mituaw kadto! Ang matarung nga dugo ni Abel mituaw batok kang Cain.

359 Apan ang Dugo ni Jesus Cristo, dili lang nga mituaw, mitubos Kini. Amen! "Nagasulti Kini og labi pang maayo nga mga pulong." Nagahimo Kini kanato ingon nga mga anak nga lalaki ug anak nga mga babaye. Ginatago ka Niini gikan sa kapungot sa Dios. Kita n'yo? Ang dugo ni Abel kaniadto dili makatago kang Cain, kita n'yo, apan mahimo sa Dugo ni Jesus. Amen!

360 Busa, ang karaang Cain, nagatungha sa karon, kung usa ikaw ka tiglutos batok sa Pulong, ug nagaingon, "Ang adlaw sa mga milagro milagpas na. Kining Butanga binuang lang, ug ingon-anang mga butang."

361 Nagatuaw Kini, kita n'yo. Nagatuaw ang Dugo ni Jesus Cristo, apan adunay kapasayloan diha Niini kon imo lamang

dawaton Kini. Kung makapabilin pa kita unta og dugay-dugay bahin niana, kita n'yo, "Ang Dugo nagasulti og labi pang maayo."

³⁶² Pagtoo, para maluwas. Dayon iaplikar, kita n'yo. Toohi alang . . . Ania kung alang sa unsa nga ginatoohan mo kini. Kita n'yo, gusto mo ang kaugalingon mong kaluwasan. Nagatoo ka para sa imong kaluwasan, ug dayon ginaaplikar ang maong Timaan para sa tibuok mong pamilya. Kita n'yo? Moingon ka, "Unsaon ko man paghimo niana?" Pangayoa Kini! Pagnahimo Kini kanimo, kung ingon-ana ikaw ug ang Pulong nahimong usa ra. Amen! Amen! Kita n'yo? Kita n'yo, pareho Kining may kapuslanan sa inyong duha. Ikaw ug ang Pulong usa ra, dayon ginaaplikar mo Kini ngadto sa imong mga anak, ginaaplikar mo Kini ngadto sa imong mga paryente.

³⁶³ Sama sa gihimo kaniadto ni Rahab, iyang giaplikar ang timaan ngadto sa iyang amahan, iyang giaplikar kini sa iyang inahan, iyang giaplikar kini sa iyang igsoong mga lalaki ug babaye, ug napasulod niya silang tanan.

³⁶⁴ Iaplikar mo Kini, nga nagaingon, "Ginoo, ginapangayo ko ang akong anak nga lalaki. Ginapangayo ko ang akong anak nga babaye. Ginapangayo ko siya! 'Satanas, buy-an mo siya!'" Nagaanha ako para kaniya. Akong ginaaplikar ang akong Timaan, ang Balaang Espiritu. Oh Balaang Espiritu, nga nagapuyo sa sulod kanako, dakpa dinha ang anak kong babaye. Nagaanha na ako para kaniya karon, pinaagi sa Imong dihog kanako." Pagabuhaton Niya kini. Amen.

³⁶⁵ Mao kana kung unsa ang ilang gibuhad didto sa Egipto. Mao kana kung unsa ang ilang gibuhad didto sa Jericho.

³⁶⁶ Kung gusto ninyong basahon ang usa pa, Mga Buhat 16:31. Giingnan ni Pablo ang centurion, "Toohi! Ako ang mensahero sa kapanahonan. Magtoo ka kang Ginoong Jesus Cristo, ikaw ug ang imong panimalay maluwas." Husto ba? Magtoo para sa imong panimalay, dalha silang tanan nga magpailalum. "Karon nakita mo ang Dios sa Langit nga nagahimo og milagro. Sa wala pa kini ang paghukom. Nagatoo ka ba Niini?"

"Oo! Unsa may akong mahimong buhaton?"

³⁶⁷ Miingon siya, "Tindog ka ug magpabautismo." Gidala siya ni Pablo ug gibautismohan siya, nga miingon, "Karon magtoo ka kang Ginoong Jesus Cristo, ug ikaw ug ang imong panimalay maluwas."

³⁶⁸ Toohan ang unsa? Magtoo kang Ginoong Jesus Cristo, alang sa imong panimalay, iaplikar ang Timaan ngadto sa imong panimalay.

³⁶⁹ Dayon unsa ang imong ginabuhad sa diha nga ginaaplikar mo Kini sa imong panimalay? Ipanglabay ang tanan nga basura pagawas. Panguhaa ang tanang mugbo nga mga palda, ug mga

short, ug mga baraha, ug mga sigarilyo, ug mga telebisyon, ug unsa pa man, ug pangsipaa kini pagawas sa pultahan, sa diha nga ginaaplikar mo ang Timaan; dili mo mapahanugotan kining mga butanga. Oo, sir. Ipanglabay kini tanan. Ang tanang mga sayaw-sayaw, ug mga pag-party party, ug mga rock-and-roll, ug bastos nga mga mantalaan, ug ingon-anang mga butang nga iya sa kalibutan, pangsipaa kini pagawas sa pultahan, nga nagaingon, “Nagapanglimpyo kami niining lugara.”

³⁷⁰ Sama sa gibuhat kaniadto ni Jacob, miingon siya, gisultihan niya ang iyang asawa ug tanan sila, miingon, “Panglabhi ang inyong mga bisti ug tanan na. Ipangsalibay kanang mga diosdios.” Amen. Si Jo- . . .

³⁷¹ Kabalo ba mo kung unsa ang giingon ni Josue sa wala pa sila ningtabok? Miingon siya, “Panglabhi ang inyong mga bisti; dili kamo managpanuol sa inyong asawa, ug uban pa, ug panag-andam kamo, kay sulod sa ikatulo ka adlaw pagatabokon nato ang Jordan.” Amen. Nangandam siya, nga ginaaplikar ang timaan. Amen. Mao kana.

³⁷² Magpangandam. Iaplikar Kini. Toohi Kini. Manglimpyo. Tugoti nga ang inyong mga anak, tugoti nga ang inyong pamilya, tugoti nga ang inyong mga paryenti, makita Kini kaninyo. Husto kana. Magkaaduna kini og epekto. Oo, sir!

³⁷³ Dayon iaplikar ang maong Timaan sa pag-ampo, nga may—may—may pagpamalandung, may pagtoo. Iaplikar Kini uban ang ingon ka daku nga gugma, ug uban pa, hangtud masayran mo, nga mahitabo gyud kini. Kana lang. Iaplikar Kini nga may pagsalig, nagatoo nga makatabang Kini. Sa diha nga nagapakig-estorya ka nianang bata, sa diha nga nagapakig-estorya ka sa imong bana, nagapakig-estorya ka sa imong asawa, nagapakig-estorya ka niining paryente, toohi nga magatabang Kini. Nagatindog lang dinha, nga nagaingon, “Ginoo, ako na silang gipangayo. Akoa na sila. Ginaangkon ko sila alang Kanimoo, Ginoo.”

³⁷⁴ Iaplikar Kini, ug mugnaa kana nga atmosphere sa palibot mo, aron sila mangakabig mismo pasulod Niini. Kita n’yo? Oh, ingon-niana ka, ingon-niana ka, kung aduna kanimo ang Timaan, nagamugna ka og usa ka espiritu sa palibot mo, usa ka gahum, nga sa pagkinabuhi mo, mahibalo ang mga tawo nga usa ikaw ka Cristohanon. Gusto nila nga aduna ka’y maisulti kanila. Ginatoohan nila ang imong mga ginapamulong. Unsa ma’y imong ginasulti, saligan nila kini. Kita n’yo? Ingon-niana kini.

³⁷⁵ Iaplikar ang Timaan, dayon magkinabuhi pinaagi Niini. Pangayoa ang imong panimalay. Kinahanglan nga buhaton mo kini karon. Niining panahon na sa kagabhion. Karon, dugay ka nang nagapaminaw, karon ang maong panahon sa kagabhion. Panahon na kini karon sa pagpang-aplikar. Moabotay na ang kapungot, usa sa niining mga adlaw, mahimong ulahi na kini

kung ingon-ana. Kita n'yo? Iaplikar ang Timaan, nga may pagsalig.

³⁷⁶ Kung gusto ninyong basahon kana, basaha ang usa ka butang dinhi, ang Kasulatan nga akong nasulat para niini, basaha ang Mga Taga-Efeso 2:12, ug kung gusto ninyong timanan kana. Himatikdi, diha sa Mga Taga-Efeso 2:12, pagbasahon ninyo kana, ingon niini ang ginasulti niini. “Nga wala kita nagapangalagad pinaagi sa patay nga mga buhat, kondili nagapangalagad kita sa usa ka buhing Dios, pinaagi sa buhi nga mga buhat.” Amen! Oh, sus! Pinaagi sa buhing mga buhat, buhi nga mga ilhanan. Nagatoo ba kamo sa buhi nga mga ilhanan? [Nagaingon ang kongregasyon, “Amen.”—Ed.] Isulat usab, ang Mga Hebreohanon 9:11-14, kung gusto ninyong isulat kana. Buhi nga mga ilhanan, buhi nga mga buhat, iaplikar kana!

³⁷⁷ Dili nga patay'ng mga kredo, “Dalhon ko ang akong anak nga lalaki sa simbahan ug siguradohon kong magpasakop siya sa iglesia.”

³⁷⁸ Usa ka maayong Cristohanong batan-ong lalaki ang ania dinhi, usa ka suod ko nga higala, dugay-dugay ko nang kauban, tinuod gyud nga igsoon, siya—mitambong siya dinhi, nagpabautismo. Miingon ang iyang inahan, “Miadto ka na lang unta sa mas daku-daku nga simbahan, kung gusto mo nga—nga mabautismohan.” Kita n'yo? Kita n'yo, ayaw niya sa mga sa dugay nang patay na nga mga kredo ug ingon-anang mga butang. Kita n'yo?

³⁷⁹ Wala kita nagapangalagad sa patay'ng mga kredo ug patay'ng mga diosdios. Nagapangalagad kita sa usa ka buhing Dios Nga ang Iyang Dugo giula kaniadto, ug ang Timaan giaplikar nganhi kanato, aron nga kita mangabuhi usab. Amen. Oo, sir!

³⁸⁰ Ayaw pagpangalagad sa kung unsang patay nga mga kredo. Ilang ipanghimakak gani ang ingon-anang mga butang sama sa Timaan. Moingon sila, “Ang mga adlaw sa mga milagro milabay na. Wala na'y ingon-anang butang sama sa bautismo sa Espiritu Santo.” Nganong apilan mo man ang usa ka butang nga sama niana? Kita n'yo? Ayaw buhata kana.

³⁸¹ Iaplikar ang Timaan, dayon, “alagari ang buhing Dios,” para sa buhing mga buhat, buhing mga ilhanan; mga ilhanan nga nagaayo sa mga masakiton, nagabanhaw sa patay, nagapanagna og mga butang, nagasulti og laing mga dila, nagahubad, nga hingpit kahusto gayud sa matag higayon, nagapropesiya ug nagasulti og *niini* ug *ingon-anang* butang nga mga magakahitabo, nagapakita og mga ilhanan sa itaas sa Kalangitan, ug ibabaw sa yuta, mga ilhanan ug mga katingalahan, amen, eksaktong ginasulti kung unsa ang gisulti sa Biblia nga magakahitabo. “Alagari ang buhing Dios,” iaplikar ang Timaan!

382 Ayaw panambong sa niining mga kasimbahanan ug makig-apil sa niining patay'ng mga buhat ug mga butang nga sama niana, tungod wala gani sila nagatoo sa ingon-nianang mga butang nga sama sa ilhanan. Apan kita nga nagatoo, amen, nasayod niana . . . Moingon sila, “Wala ma’y ingon-anang butang sama sa ilhanan. Kana, oh, oh, binuang kana. Unsa man ang ilang ginahisgotan dinha, binuang kana. Aba, wala ma’y ingon niana nga butang. Aba, kamong mga kababayen-an dinha, oh, kamo—kamo, aba, wala kamo’y . . . Naunsa man kanang inyong pamisti . . .?” Ingon niana kini. Ingon niana man ang gisulti sa Biblia. “Unsa ma’y kahilambigitan sa inyong buhok sa . . .?” Ingon niana man ang gisulti sa Biblia.

383 Kana, ingon-niana gayud ang kalainan, kita n’yo. “Dili ka magkupot, ni maghikap, ni magtilaw.” Dios Siya. Kita n’yo? Karon, aduna gyud kini og kahulogan.

384 Karon, abi nila nga binuang kini. Apan para kanato nga nagatoo ug nahibalo sa Kamatuoran, nasayod kita nga Kini mao ang Iyang buhing Presensiya, tungod nga ginabuhat Niini ang mao rang mga butang nga Iyang gibuhat kaniadto sa diha nga ania pa Siya sa yuta. Amen.

385 “Oh,” moingon sila, “ginahanduraw lang nila kana nga nakita kono nila kanang Haligi nga Kalayo.” Oh, dili! Oh, dili! Wala kita og unsa man nga ginahanduraw.

386 Nagdahum sila kaniadto nga gihanduraw lamang Kadto ni Pablo, usab. Nagdahum ang Egipto kaniadto nga gihanduraw lang Kadto sa Israel, apan mao Kadto ang nagdala kanila paingon sa yutang saad. Oo, sir! Wala kita’y . . .

387 Mga Hebreohanon 13:8, kabalo na mo, “Si Jesus Cristo mao sa gihapon kagahapon, karon, ug hangtud sa kahangturan,” kung inyong igasulat kana, isulat, kita n’yo, nga, “Siya mao ra sa gihapon.” Kini—dili kini—kung dili kini mao ra . . . nga kung unsa ra nga paghanduraw.

388 Sa diha nga ginasulat ko kining mga Kasulatan nga gisulat ko dinhi, kabalo ko kung asa kini nga mga Kasulatan, ug sa ingon niana ko nga paagi kini ginapangita. Kita n’yo?

389 Hibaloa nga Iya kining buhi nga Presensiya, kay mao ra ang Iyang ginabuhat diha niining Espiritu. Karon, kung mitipas kini ngadto sa kung unsa nga kredo o denominasyon, mahibaloan dayon nato nga dili kini si Cristo. Husto ba kana? [Nagaingon ang kongregasyon, “Amen.”—Ed.] Kung ginadala ko kamo ngadto sa kung unsa nga kredo o unsa pa man, nga lahi, mamahimong gipadala ako gikan sa kung unsa nga denominasyon. Apan wala ako’y ginadala kaninyo nga mga kredo, ug wala ako’y ginatudlo kaninyo nga mga denominasyon. Ang ginatudlo ko kaninyo Pulong sa Dios, nga mao ang gahum sa pagkabanhaw ni Jesus Cristo nga nadayag, dili lamang para

kanako, kondili sa kung kinsa man nga gusto niini. Kita n'yo? Nga kamo. . .

³⁹⁰ Ikaw akong igsoon. Dili ako tawong daku-dako, ug ikaw yano ra nga tawo. Parehong kitang tanan yano nga mga tawo diha sa Dios. Kita n'yo? Iya kitang yanong mga anak. Wala gyud kita'y nahibaloan, sa kung unsa ang angay natong mahibaloan. Iya kitang ginapahibalo ingon sa Iyang gusto, ug mapasalamaton kita Kaniya sa kung unsa ang atong nahibaloan mahitungod sa Iyang mga panalangin. Ug wala ko kini ginaangkon sa ako lang nga kaugalingon; gusto ko kining ipaambit kaninyo. Kita n'yo? Gusto ko kamong maapil Niini, ug gusto ko kamong makadawat niining Timaan. Ug kung wala pa kamo nakahimo niini. . . Daghan kaninyo, kadaghanan kaninyo, ang nakahimo na niini. Apan kung adunay pipila kaninyo nga wala pa nakahimo niini. . .

³⁹¹ Kita n'yo, nagapakigsulti ako diha sa teyp, usab, kasabot na mo. Ug daghan sa niini. . . Ug wala ko kini ginasulti sa iglesia dinhi; nakagawas na kitang tanan, nga angay lang. Apan mahimong aduna pa'y linibo sa mga linibo ang magapaminaw sa teyp, kita n'yo. Ug, kana, usa kini ka ministerio. Mamahimong adunay usa ka tawo nga makalusot sulod diha sa Jericho, kabalo na mo, nga may dala og teyp, busa gusto nato nga—gusto nato nga makaplagan kanang predestinadong Binhi pagnakasulod na kini dinha, kita n'yo, tungod kay taliabot na ang kapungot.

³⁹² Hibaloa nga ang Presensiya kini sa buhing Dios, nga nagapamatuod nga gibanhaw Siya sa Dios sumala sa Iyang gisaad nga Pulong. “Sa diriyut lamang panahon ug ang kalibutan dili na makakita Kanako. Ang Jericho, ang Egipto, dili na sila makakita Kanako. Pero kamo makakita Kanako, kay Ako. . .” “Ako,” pang-personal nga pulingalan, maoy kanunay'ng ginapahinungdan niini, kita n'yo. “Magauban Ako kaninyo. Ako mao ang Timaan. Ang Akong pagkabanhaw mao ang Timaan. Ang mga buhat nga Akong ginabuhay ang magapaila kaninyo, ang magapaila Kanako diha kaninyo.”

³⁹³ “Sama sa nahitabo kaniadto sa mga adlaw ni—ni Lot, maingon usab ang mahitabo sa pag-abot sa Anak sa tawo, sa diha nga ang pang-gabii nga Mensahe ginapahayag na.”

³⁹⁴ “Kay mahitabo nga sa panahon sa kagabhion motungha ang Kahayag. Sa pag-abot mismo sa panahon sa kagabhion, motungha ang Kahayag.” Oh, himaya sa Dios! Daw sa mabati ko nga mahimo kong latason ang usa ka panon sa kasundalohan ug ambakon ang pader. Kita n'yo? Kita n'yo? “Motungha ang Kahayag sa panahon sa kagabhion.” Husto kana. Ingon niana ang gisulti sa propeta.

³⁹⁵ “Ako magauban kaninyo. Mamaanaa Ako sa kapanahonan ni Luther; mamaanaa Ako sa kapanahonan ni Wesley; mamaanaa Ako sa kapanahonan sa Pentecostal; apan diha mismo sa

panahon sa kagabhion, motungha ang Kahayag.” Mangamatay ang mga denominasyon, ug igaaplikar na dayon ang Timaan. Ug ang tanan niadtong mga matinud-anon sa ilang kasingkasing, sugod kaniadto hangtud dinha, nga wala—nga wala kamo dili sila paga—pagahingpiton. Apan diha kaninyo. . .

³⁹⁶ Sama kini sa ulo nga kinahanglan manguna gayud, aron madala ang tiil. Kinahanglan nga manguna gayud ang ulo, aron madala ang kamot. Kinahanglan nga manguna gyud ang ulo, aron madala ang kasingkasing. Kinahanglan nga manguna gyud ang ulo, aron madala ang baba. Kita n’yo, kinahanglan manguna gyud ang ulo.

³⁹⁷ Ug karon ania na kita sa panahon kon diin ang timaan napahid na diha sa balabag sa pultahan, kita n’yo, ug diha sa mga haligi. “Ug kon makita Ko ang dugo, ingon nga mao ang timaan, Ako molabay ibabaw kaninyo.”

³⁹⁸ Pagadalidalion ko karon, sa ingon ka agpas nga mahimo ko karon. May mga lima pa ka minuto, o napulo, mahuman na kita.

³⁹⁹ Nagapamatuod lang nga gibanhaw Siya sa Dios gikan sa mga patay. Nagatoo ba kamo niini? [Nagaingon ang kongregasyon, “Amen.”—Ed.] Buhi siya sa atong taliwala karon. Ug kanang “Ako” mao si Cristo. Ug kanang “Ako” kauban nato hangtud sa katapusan sa. . . kana’y hangtud sa *pagtibawas*, nga nagakahulogan og, “hangtud sa katapusan sa kalibutan.” “Mamaanaa Ako hangtud sa katapusan sa kalibutan,” sumala sa Iyang gisaad nga Pulong. Iyang gisaad kini. “Ug ang mga buhat nga Akong ginabuhat inyo usab pagabuhaton.” Dili kini binuang para kanato. Kini mao ang Timaan. Ang Timaan kini.

⁴⁰⁰ Atong ginadawat kining balaang halad nga Dugo. Atong ginadawat ang Iyang gihalad nga Dugo, dayon gihatag. . . Siya ang nagahatag kanato sa Kinabuhi, sa Timaan, nga usa ka selyo sa Iyang saad. Mga Taga-Efeso 4:30, miingon, “Ayaw ninyo pagpasub-a ang dugo”? Dili. “Ayaw ninyo pagpasub-a ang Balaang Espiritu, nga diha niini. . .” [Nagaingon ang kongregasyon, “*Gikatimrihan kamo.*”—Ed.] “Mga gikahatagan og tugon, mga gilain.” Usa ikaw ka gikahatagan og tugon. Ingon niana ikaw. Ang Timaan, ang Balaang Espiritu, mao ang mamahimong selyo. Sa diha ang bisan unsa man nga naselyohan na sa sulod og usa ka selyo, ayaw gayud kini badbara. Dili mo kini mabadbad, kung mahimo mo, dili kini Selyo sa Dios. Dili. Kita n’yo? Tungod kay ikaw. . . “Ayaw pagpasub-a ang Balaang Espiritu sa Dios, ni kinsa gikatimrihan kamo hangtud sa adlaw sa pagtubos, sa diha nga ginabanhaw na ang lawas.”

⁴⁰¹ Usa kini ka binhi, usa kini ka ilhanan nga ang binhi miturok na sa Kinabuhing Walay Katapusan, “*Zoe*, ‘Mismong Akong Kinabuhi,’ ug pagabanhawon Ko kini sa kaulahiing adlaw.” Ug samtang nga nagakinabuhi ka, aduna ka’y pagsalig nga anaa kanimong ang Kinabuhi ni Cristo, ug ikaw anaa Kaniya. “Sa usa

ka Espiritu gibautismohan kita ngadto sa usa ka Lawas, ug gikatimrihan dinha sa Espiritu Santo,” uban sa niining mga magtotoo nga sama niini, “hangtud sa adlaw nga pagabanhawon na kita ni Jesus.” Oh, sus! Iaplikar ang Timaan. Ingon niana ang kamahinungdanon niini para kanato. Nagapaabot kita nga ihatag kanato sa niining Halad ang maong Kinabuhi, ug ginahatag Niini gayud. Ug ginahatag sa Niini kanato ang Timaan, ug atong ginaaplikar ang Timaan, nga mao ang Selyo hangtud. . . Ingon nga—ingon nga mga umalambit Niini, daw sa unsa kini ka halangdong butang, ingon nga mga umalambit, nga mga binautismohan na pinaagi niining usa ra ka Espiritu, ngadto nianang usa ra ka mist- . . . mitikal nga Lawas.

⁴⁰² Husto ba ang pagkalitok ko nianang pulong, *mitikal*? Mistikal, mistikal nga Lawas, mistikal nga Lawas ni Jesus Cristo. Kita n’yo, ang Balaang Espiritu miingon, “Sayup ang pagkasulti mo niana.” Usa ka burongon nga sama kanako, apan miingon Siya, “Sayup ang pagkasulti mo niana,” gitawag ko kini’g, “*mitikal*,” nga maoy mistikal nga Lawas ni Jesus Cristo, kita n’yo, ang mistikal nga Lawas ni Jesus Cristo. Dili ko. . . Wala kita nagkinahanglan og edukasyon; nagkinahanglan kita og Balaang Espiritu. Siya Gayud. Kita n’yo? Siya Gayud. Oo, kita n’yo, mahimong nakapandol kana sa usa ka tawo kung asa man, usa ka magtutudlo, nagalaum ako nga nakuha niya kini karon. Ang mistikal nga Lawas! Mahimong para Kini sa kung unsa man, tungod wala Niya unta kana gisulti. Kita n’yo? Ania Siya mismo dinhi karon. Ania Siya mismo dinhi sa pulpito. Anaa Siya mismo dinha dapit. Siya kini. Kita n’yo? Whew!

⁴⁰³ Ug diha Kaniya walay kamatayon. Diha Kaniya walay kasubo. Diha Kaniya walay pagka-kapoy. Diha Kaniya walay kasal-anan. Diha Kaniya walay balatian. Diha Kaniya walay kamatayon. Kita’y anaa diha Kaniya! Kung aduna si Satanas itunol kanimo og unsa man, sama sa balatian, kuhaa lang ang imong Timaan ug iaplikar Kini. Oh, sus! Kuhaa ang imong Timaan ug iaplikar Kini, nga ikaw usa ka gipalit na ni Jesus Cristo. Ang Timaan nagarepresentar nga ang imong plete gibayaran na.

Moingon siya, “Pagnamatay ka, wala ka na.”

⁴⁰⁴ Ingna, “Sayup ka. Ania na kanako ang pinalit. Usa ako ka pinalit na. Ania na kanako ang Timaan.”

“Unsa ang Timaan?”

⁴⁰⁵ Nasayod baya siya kung unsa Kini. Ayaw, ayaw siya tinontohi. Nasayod siya kung unsa Kini. Karon, mahimo kang makig-estorya sa uban niining mga magwawali, ug makiglantugi sila kanimo. Dili si Satanas; mas nahibalo siya. Kita n’yo? Oh, oo. Nakigbatok siya niini, duha o makatulo ka higayon, kabalo na mo, ug nasayup, sa pagtintal. Nahibalo si Satanas kung unsay

imong ginahisgotan. Ipakita lang kana nga Timaan, mokalagiw na siya. Oo.

406 Tungod, unsa man kini? Usa kini ka selyado na nga produkto. Dili niya mahimong buksan kana, ug sudlan dinha og usa ka butang nga dili husto. Ingna, “Ayaw paghilabot! Selyado ako.” Oh, sus! Usa na ka selyadong produkto! Oo, sir! Pinalit ka na. Ipaibabaw ang Timaan diha sa imong dili-mairog nga pagtoo sa Iyang saad, tan-awa kini nga nagapamuhat. “Ang pagpangamuyo sa usa ka tawong matarung, daku’g kahimoan inig-ampo niya!” Kita n’yo? Kita n’yo? Gamita kana nga Timaan. Para sa ingon niana Kini. Anaa si Satanas dinha aron tintalon kamo.

Atua siya sa Egipto kaniadto, aron mangtintal.

407 Aba, kabalo mo, nga sa diha nga ang bigaon nga si Rahab gibutang kadtong . . . Gihigot sa maong bigaon kadto nga pisi paingon sa ubos, kadto nga pisi, makita ko ang pila sa mga kasundalohan didto nga gikataw-an siya ug gibiyabiayan siya, miingon, “Kana gyud nga buangbuang nga babaye! Wala siya sa husto niyang pangutok. Tan-awa, ang iyang gihigot didto. Ha, ha, ha! Aba, may nadungog na ba mo og ingon niana? Aba, si Doktor Jones nag-ingon, dinhi, ‘Wala gyud ka’y makuha niana.’” Apan aduna ka’y makuha, tungod usa ka mensahero nga gikan sa Dios ang naghatud og mensahe ug gitug-anan sila.

408 Mahunahuna kaha ninyo ang mga Egiptohanon kaniadto nga nagaingon, “Medyo daw sa . . . Hala, tan-awa kanang buangbuang nga pundok sa mga holy roller, nga ginapahid ang dugo! Ha, ha! Pagkahugaw niana, aron hugasan tapos! Oh, sus! Dagkung mga balay nga napintalan og dugo! Oh, baho uy! Pusta ko mosamot pa ka baho kana human sa pipila ka adlaw. Wala kini og unsa man nga kahulogan. Kabalo ba mo kon ngano? Ingon niini man gud ang giingon ni Balaang amahang *Ingon ani-ug-ingon ana*.” Apan aduna gyuy kahulogan kadto. Aduna gyud. Aduna gyuy gipakahulogan kadto.

409 Aduna gyuy kahulogan kadto para kanato nga nagatoo Niini. Kita n’yo? Hinumduma lamang ang imong dili-mairog nga pagtoo nga aduna ka sa niining Pulong! Karon, dili ka na si Eva. Kita n’yo? Dili ka na usa sa niining mga maduhaduhaon, ug, ingon nga, nagapakig-kompromiso kang Satanas. Ginatohan mo ang matag Pulong sa Dios. Kita n’yo?

Miingon si Eva, “Bueno, ingon niini ang gisulti sa Ginoo!”

410 Miingon si Satanas, “Pero, kabalo ka, siguradong dili buhaton sa Ginoo ang usa ka butang nga sama niana ngadto sa usa ka maayong tawo sama kanimo. Oh, pagkahiligmaon nimo. Dili Niya buhaton kana.” Oh, oo, buhaton Niya, gayud. Nag-ingon gayud Siya nga buhaton Niya.

411 “Bueno, ang akong amahan usa man ka ministro. Dugay na akong ministro.” Ako—dili ko kana mapugngan. Kung wala ang

Timaan, mawala ka. Ang kapungot anaa kanimo, kita n'yo, kana lang, pag-wala ang Timaan. Kita n'yo? Oo. Nag-ingon Siya nga buhaton Niya kini, ug buhaton Niya gayud kini. Kana, mao gyud kana. Nag-ingon na Siya nga buhaton Niya kini.

“Oh, nagatoo ako nga ang mga adlaw sa mga milagro milabay...”

⁴¹² Oo, apan nag-ingon Siya nga dili ingon niana kini. “Ako mao sa gihapon kagahapon, karon, ug hangtud sa kahangturan,” kita n'yo, eksaktong ingon niana ang Iyang ginapamatud-an.

⁴¹³ Karon, para kanato, nahibalo kita niini. Para kanila, wala sila nagatoo Niini. Apan ato Kining ginatoohan. Nasayod kita nga kini mao ang Kamatuoran. Kita n'yo?

⁴¹⁴ Karon, ingon nga diha niana, nahimo kitang kabahin sa Pulong. Ug dayon gamita ang Timaan, ang Espiritu, para sa saad, “Ako ang Ginoo nga nagaayo kanimo.”

⁴¹⁵ Karon pagpangandam na alang sa panerbisyo sa pagpangayo karong gabhiona. Kita n'yo? Kuhaa ang Timaan, isab-it Kini sa Pulong, diha sa imong dili-mairog nga pagtoo nianang Pulonga, mokalagiw siya. Karon, Kana—Kana ang butang nga nagapalayas kaniya, tungod diha sa Dios walay ingon niana.

⁴¹⁶ Hinaut nga makapamatuod pa ako og diyutay karon, sa pipila ka mga butang nga akong nakita sa miaging pipila pa lang ka semana. Kita n'yo? Kita n'yo? Oh, pagkadaghan ang mahimo kong ipamatuod!

⁴¹⁷ Kabalo mo, ug nag-ingon si Lucas, “Kung ang tanan nga mga gihimo ni Jesus isulat sa mga libro, ang . . . wala'y igong mga libro sa kalibutan nga maisulat ang mga niini.”

⁴¹⁸ Sa mga nakita ko lang sa kaugalingon kong ministerio, nga nakita Siyang namuhat, dili mo makamada ang kadaghan sa mga libro niini ibabaw niining entablado dinhi. Kung isulat ko kini sa ingon ka detalye nga nakita ko Siyang namuhat diha lang sa kaugalingon kong ministerio, nakita Siyang gipangbuhat kini. Kita n'yo? Mas daghan Siyang nahimo sa akong ministerio kay sa nahimo Niya diha sa Kaugalingon Niyang ministerio. Karon, hinumdumi, mas daghan Siyang gipanghimo karon, dili ako; Siya mao ang namuhat. Himaya! Hallelujah!

⁴¹⁹ Mas daghan Siyang gipamuhat sa Jeffersonville kay sa mga gipamuhat Niya didto sa Nazaret. Gipamuhat Niya kini didto niadtong dautan nga siyudad ug sa niining dautan nga siyudad. Amen! Himaya! Tungod, “Dili Siya makahimo og mga milagro didto,” apan nahimo Niya dinhi. Sa kaulahian milampus Siya, dinhi. Nahimo kini Niya nga mabuhat dinhi. Tingali kinahanglan pa Niyang magdala og mga tawo gikan sa kung asa man, apan Iyang—Iyang nabuhat kini, bisan pa man. Busa, mas daghan Siyang napamuhat mismo dinhi kay sa mga gipamuhat Niya didto sa—sa Capernaum o—o sa Nazaret, sa mga

niana. Namuhat Siya og mas daghang mga milagro mismo dinhi sa niining tabernakulo kay sa nahimo Niya sa tibuok Niyang ministerio sa ania pa Siya sa yuta. Husto kana, nahimo Niya kini. Karon unsa na ang tanang uban pa nga bahin sa kalibutan? Oh, sus! Karon mao kana'y Iyang gibuhat.

⁴²⁰ Karon hinumdumi, “Siya” ang namuhat. Karon, wala gyud kini nag-ingon nga ako ang namuhat niini, kita n’yo, dili, tungod dili ako ang namuhat niini. Dili gyud ako. Gihigugma ko lang Siya ug gitugyan ko lang ang akong kaugalingon Kaniya, ug gisulti kung unsay Iyang gisulti, ug ang Balaang Espiritu miadto sa ubang mga tawo ug gitooan nila ang Iyang gisulti, ug dayon gibuhat Niya ang maong buhat. Kana lang.

⁴²¹ Kung mahimo lang gayud Niya kitang tanan nga motoo niini! Unsa kaha ang Iyang buhaton karon mismo kung mapatoo Niya kitang tanan niini karon, mismo? Mamahimong walay ni usa ka tawong maluya sa tibuok niining siyudad. Husto kana. Kung mapatoo Niya ang tanan niini, sulbad na gyud kini tanan. Kita n’yo?

⁴²² Ipaibabaw ang Timaan diha sa imong dili-mairog nga pagtoo sa Iyang gisaad nga Pulong, ug mopalagiw si Satanas.

Karon humanon ko na gyud karon.

⁴²³ Ang Dios naghatag kaniadto og usa pa ka timaan sa kalibutan; usa kadto ka balangaw. Mahinumduman ba ninyo kana? [Nagaingon ang kongregasyon, “Amen.”—Ed.] Siya gayud, sukad kaniadto pa nagpabilin nga matinud-anon nianang timaan, tungod gihatag Niya kini ingon nga usa ka timaan. Sa tanan niining linibo na ka mga tuig, wala gayud Siya napakyas sa pagpakita sa niana nga timaan. Husto ba kana? [“Amen.”] Ngano man? Iya kining ginatahod. Gihatag Niya kini. Gihatagan Niya ang kalibutan og usa ka timaan nga dili na gayud Niya gun-obon ang kalibutan pinaagi sa lunop. Ug Iya gayud, sukad pa, niadtong adlaw, gipakita kini.

⁴²⁴ Adunay pipila ka elemento sa hangin, nga nagapahimo sa nianang balangaw. Sa diha nga nagaulan, ug mogawas na ang adlaw, nagapakita kini. Paugahon sa adlaw ang ulan, busa ginapatungha Niya didto ang balangaw aron pamatud-an nga wala na gayuy igong ulan nga mahimong mahulog sa yuta aron lunopan kini pag-usab. Iya kanang pakigsaad. Usa kini ka timaan. Miingon Siya, “Thatag Ko kini kaninyo ingon nga usa ka timaan.”

⁴²⁵ Gitahud Niya ang Iyang timaan. Gitahud Niya ang Iyang timaan niadtong mga adlaw ni Noe. Iya kini sa gihapon ginapakita hangtud karon. Iyang gitahud ang Iyang timaan didto sa Egipto. Iyang gitahud kini didto sa Jericho. Iyang ginatahud Kini sa karon. Iya gayud ginatahud ang Iyang timaan pag-ipakita kini.

426 Sulod na niining linibo ka mga tuig, gusto Niya gayud nga ipakita kana nga timaan. Wala Niya gayud kini ginakalimtan. Wala Niya ginakalimtan ang Iyang timaan. Karon, bisan unsa pa ka daku ang pagkausab sa kalibutan, anaa sa gihapon ang balangaw. Kita n'yo, Iyang ginatahud ang maong timaan.

427 Mao usab ang Iyang ginahimo sa karon, Iyang ginatahud ang Iyang Timaan. Bisan unsa pa ka daku ang pagkausab sa iglesia, bisan unsa pa ang ginahimo niya diha *nini*; ginatahud sa gihapon sa Dios ang Iyang Timaan, kana lang gyud. Ginapakita kanato nga wala gayud Siya nagakapakyas sa pagtahud sa kung unsa ang Iyang ginahimo ug kung unsa ang Iyang ginasulti. Atong ginadawat, atong—atong ginapasidunggan Kana. Ako usab.

428 Iyang ginalauman usab diha kanato nga ipakita ang Iyang Timaan diha sa atong pagtoo, ngadto kang Satanas ug ngadto sa tanan niyang wala-nagatoo nga mga kulto ug mga denominasyon, nga nagatoo kita nga ang Iyang saad matuod, ug nga Iyang buhaton kung unsa ang Iyang gisaad nga pagabuhaton. Mao kana ang Iglesia.

429 Dili ikatingala nga dili sila maka-first base dinha, sama sa tawag nato niini; pasayloa ko sa maong panultihon. Dili ikatingala nga wala sila'y mapaingnan kondili ang mobalik ngadto sa denominasyon ug magpabunga og usa ka pundok sa mga maayong mamisti, hinashasang mga tawo, intelektuwal, edukado. Wala gyuy mapaingnan, tungod mao kana ang ilang ginapakita, "Ako'y Methodist. Ako'y Presbyterian." Ingon niana lang gyud sila.

430 Apan ang mga magtotoo ginapakita ang Timaan! Ug kung unsa ang gisugdan ni Jesus buhaton didto sa Galilea, padayon Niyang ginabuhat sa karon pinaagi sa Iyang pagpakita sa maong Timaan, sa Balaang Espiritu nga nagabalik sa Iglesia. Tungod kay, dili kadto mga buhat sa mga apostoles, mga buhat kadto sa Espiritu Santo diha sa mga apostoles, ug usa kadto ka Timaan.

431 Nanag-ingon sila nga kinahanglan nilang magpatalinghug kang Pedro ug kang Santiago, sa diha nga sila . . . si Pedro ug si Juan, sa diha nga miagi sila didto sa pultahan nga ginganla'g Matahum, ingon nga sila'y mga walay-himbangkaagan. Mahimong mga panulti nila'y, "Hit, hain't, tote, tear, fetch, carry. Sultihan ko kamo mahitungod *nini*." Kita n'yo? Mahimong aduna sa mga tawo didto ang tanan na nga matang sa gramatika nga dili nila masabtan. Mahimong dili nila mahibal-an ang kalainan niini, ang tanan nga—nga . . . ang tanan nga matematika sa Kasulatan. Apan nahimatikdan sa mga tawo nga nakauban sila ni Jesus. Maipakita nila kadtung Timaan, tungod ang mao ra nga Espiritu nga atua Kaniya, sa wala pa Siya gilansang sa krus, atua kanila pagkahuman sa maong pagkalansang. Amen!

432 Kung ingon-ana nagapahimo kana Kaniya diha sa Mga Hebreohanon 13:8, “Si Jesus Cristo mao sa gihapon kagahapon, karon, ug hangtud sa kahangturan.” Dinha nato mahibaloan nga Siya buhi. Tungod ngano man? Unsaon nato pagkahibalo nga kita mabuhi? Tungod kay Siya buhi. Ug tungod nahibalo kita nga kita mabuhi, maoy tungod nga sama kita Kaniya, ug anaa kita diha Kaniya. Ug miingon Siya, “Tungod Ako buhi, kamo usab mabuhi. Ako mao Siya,” diha sa Pinadayag, “nga namatay, ug Ako buhi sa walay katapusan.” Ug kung—kung mamatay kita diha sa atong kaugalingon ug mamahimong buhi diha Kaniya, mabuhi kita sa walay katapusan. Ug dayon ang Iyang Kinabuhi nga ania kanato sama lang sa kinabuhi sa bisan unsa man, ginapakita Niini kung unsa Siya. Ug kana ang nagapahimo Kaniya nga mao sa gihapon kagahapon, karon, ug hangtud sa kahangturan.

433 Karon unsaon man ninyo, sa diha nga ginapanghimakak nila Kana? Dili ba ninyo makita, “patay’ng mga buhat”? Alagari ang buhing Dios, pinaagi sa Eternal . . . ang pasabot ko, sa dayon nga pakigsaad sa Kinabuhi nga anaa diha sa Dugo ni Jesus Cristo. Karon sa pagpadayon, aron matapos na, akong . . . Bueno, siguro, undangon na nato. Kita n’yo, ginapakita ang Timaan sa Iyang grasya, sa Iyang gugma! Karon, pagwala giaplikar kini nga Timaan . . .

434 Karon, usa kini ka Timaan. Unsa man ang Timaan? Ang Timaan maoy usa ka ilhanan nga ang utang gibayaran na. Ang bili nga gikinahanglan gibayaran na. Ang bili sa atong kaluwasan mao ang kamatayon, kita n’yo, ug wala ni usa ang makabayad niini gawas kang Cristo. Ug dili ang—ang espiritu sa denominasyon, dili ang espiritu sa papa, dili espiritu sa kang kinsa man nga tawo o santo; kondili ang Espiritu ni Jesus Cristo, diha sa Iglesia, mao ang Timaan nga ang utang gibayaran na ug gitagbo na Niya ang tanang gikinahanglan nga gipangayo sa Dios, ug kita ug Siya nahimong usa ra. “Niadto unyang adlaw, kamo makaila nga Ako ania sa Amahan, ang Amahan ania Kanako; Ako anaa kaninyo, ug kamo ania Kanako.”

435 Iaplikar ang Timaan! Iaplikar ang Timaan sa Iyang pagkabanhaw. Nga, tungod gibanhaw Siya alang sa pagpamatarung kanato, Iya kitang gibanhaw usab uban Kaniya. Ug karon nagalingkod kita sa Langitnong mga dapit, diha kang Cristo Jesus, ilalum sa pagpakig-fellowship diha sa Timaan.

436 Samtang atua ang Israel didto, ug sige ang mga pagsiniyagit, didto sa dalan, wala sila ni usa ka butang nga kabalak-an. Ang bugtong butang, maoy masigurado nga ang dugo, ang timaan, dayag nga makita.

437 Mao lamang kana ang butang nga atong kabalak-an mismo karon. Aduna na’y nagasingabot nga problema diha sa—diha sa dalan, paanhi na, mga higala. Dili na kini magdugay, moabot

na ang problema. Kabalo kamo niana. Siguradoha nga dayag nga makita ang Timaan. Ug ang Timaan mao ang Balaang Espiritu. “Kay sa usa ka Espiritu gibautismohan kita ngadto sa usa ka Lawas, ug nahimong mga umalambit sa Iyang himaya,” padulong na sa atong Yuta, sa atong Balay, paabante nga nagamartsa na padulong sa Yutang saad.

⁴³⁸ Gihigugma ba ninyo Siya? [Nagaingon ang kongregasyon, “Amen.”—Ed.] Nagatoo ba kamo sa Timaan? [“Amen.”] Pila ang gustong moingon, “Oh, Igsoong Branham, iampo ako, nga mapailalum ako sa niining Timaan?” [“Amen.”]

Iduko nato ang atong mga ulo.

⁴³⁹ Ginoong Jesus, Ang Dios nga Puno sa Grasya! Sa diha nga ang kalibutan anaa sa kasal-anan, ug walay makatabang, ang Dios, diha sa kalooy, nga una nang nagapakita, pinaagi sa usa ka pagtipon, nga adunay nagasingabot nga usa ka Timaan nga makatangtang sa sala; dili lang nga tabunan kini, kondili makahimo gayud sa pagtangtang niini. Ug miabot si Jesus sa hustong higayon, ug Iyang giula ang Dugo, ang Mismo Niyang Kinabuhi, sa pagdala . . . sa paghimo og usa ka pangbayad para sa among mga kasal-anan, ug dayon ginapresentar Siya balik diha sa porma sa Espiritu Santo, nga mao karon ang Timaan nga pagakuptan sa Iglesia hangtud nga Siya moabot. Kay nag-ingon ang Apostol nga si Pedro, “Ang saad alang kaninyo, ug sa inyong mga anak, ug sa tanang atua sa halayo, bisan ang kapid-an nga pagatawgon sa Ginoo nga atong Dios.”

⁴⁴⁰ Ginoo, pinaagi sa Imong grasya, sa Imong tabang, akong ginapangayo ang matag usa nga nagpatalinghug niining Mensahe. Ako silang ginapangayo para sa Dios, nagaampo ako Kanimo, Ginoo, para sa mga ania dinhi karong buntaga ug sa kadtong mga nagapaminaw sa teyp. Ug kung aduna ma'y Binhi sa kung asa man, nga predestinado, Ginoo, sa pagpaminaw sa Pulong alang niining kaulahiing adlaw, hinaut nga mangduol sila karon, nga malomo ug mapainubsanon, ug ilang ipangbutang ang ilang mga tropeo dinha sa krus, o ang ilang kaugalingon, ingon nga usa ka tropeo sa grasya sa Dios nga nagtawag kanila. Ug hinaut nga mapuno sila sa Balaang Espiritu ug maipakita ang Timaan sa Kinabuhi ni Jesus Cristo sa Iyang pagkabanhaw, samtang nga ania pa sila nagapabilin dinhi sa yuta. Itugot kini, Ginoo.

⁴⁴¹ Kini nga mga pulong, Ginoo, mahimong wala ko nasulti sa husto ang mga niini. Ug kung wala ko man nasulti sa husto, nagaampo ako nga kuhaon sa Espiritu Santo kadto nga mga pulong ug ipresentar kini sa paagi nga kinahanglan kini maipresentar, aron nga masabtan sa mga tawo ug mahibaloan, nga wala ang pagkamadinauton. Ug tugoti nga mahibaloan nila nga ang gugma nagapanul-id. Ug aron nga mahibaloan nila nga tungod kini sa kapanahonan nga among gikapuy-an, ug

ang haduol na nga pag-abot sa Ginoo, ug makita na namo ang daghang pula nga mga suga nga nagakidlap, sa tibuok kalibutan, nga haduol na gyud ang panahon.

⁴⁴² Hinaut nga madawat sa mga tawo ang Espiritu Santo niining adlaw! Ginaampo ko, ug ginapresentar sila Kanimo, sa Ngalan ni Jesus Cristo. Ug tugoti nga mamahimo Kining usa ka Timaan para kanamo samtang nga kami buhi pa, nga gisaad Mo nga mahitabo Kini. Mamahimong sayon kini ang pagpangayo niana, tungod kay gisaad Mo nga mamahimo Kini, ug nasayod ako nga mamahimo gyud Kini. Sa Ngalan ni Jesus amo kining ginaampo. Amen.

Karon, samtang nanagduko ang atong mga ulo, sa makadali.

⁴⁴³ Pinaagi'g pagtoo, nga nagatoo, nag-ampo na ako para kaninyo, sa tanan nga nahibaloan ko sa pag-ampo. Ako—miampo ako nga may sinseridad, sa tanan kong nahibaloan sa pag-ampo para niini.

⁴⁴⁴ Tan-awa, naamgo ko kini. Kabalo ba mo kung unsa? Ang inyo kining mga ikanapulo ug mga offering nga akong gikinabuhian. Ang inyo kining suporta, dinhi sa iglesia, nga aduna ko'y mga tawo nga pagawalihan. Ang inyo kining gugma, ug ang inyong “mga amen,” ug ang inyong pagpakig-fellowship. Ug ang inyong malulot nga mga pagpanulti dinha sa kalibutan kon diin kamo nagaadto, sa nagkalainlaing mga estado sa tibuok nasud, ang inyo kining mga pagpanulti ang nagatabang sa pagpakaylap sa Mensahe. Kamo kini. Mga kaabag kita niini, kauban si Cristo. Kita'y managsoon nga mga lalaki ug babaye, ug Siya mao ang atong Hari. Ug gimahal ko kamo. Ako—ako—ako—ako, kung asa ako, gusto kong maatua kamo. Mobiyahe ako latas sa tibuok nasud, aron makigsulti kaninyo sa pipila ka higayon. Ginapangandoy ko nga mahinabi kamo dinhi pag-Dominggo sa buntag. Gimahal ko kamo. Dugay ko na kamong gimahal. Usahay kinahanglan kong magsulti nga mabagison, apan pagpanul-id lamang kini. Nakita n'yo, kini tungod lamang nga gimahal ko kamo, kita n'yo, ug dili ko gustong masayloan ninyo kini Kini. Kamo, kinahanglan dili ninyo masayloan kini.

⁴⁴⁵ Karon, sa malulot ug mapainubsanon nga paagi, uban sa tibuok ninyong kasingkasing, diha gyud sa kinasuloran, dawata ninyo Kini. Ingna, “Ginoong Jesus, karon mismo tangtanga ang tanan nga ania sulod kanako, nga dili-nahisama Kanimo, ug tugoti kong matangtang ang tanan kong mga garbo, ang tanan nga ania sulod kanako, pagawas. Ang tanang basura, ang tanang dili-pagtoo nga ania kanako, ako—akong ginapangwagtang kini karon, Ginoo. Ginapangsalibay ko kini. Ug tugoti ang malulot nga Balaang Espiritu sa Dios, nga sama sa usa ka salampati, mosulod kanako. Ako—gusto kong mabuhi sa Walay Katapusan, Ginoo, ug ako—gusto kong tabangan Mo ako niining higayona. Itugot kini karon.”

446 Samtang nga nagaampo kamo, ug atong laylayon kini nga alawiton, o kantahan kini nga malumo, kitang tanan, *I Love Him*. Ug, hinumdumi, nagaabot kini pinaagi sa gugma, kay Siya mao ang gugma. Samtang nga akong ginapandong ang akong mga kamot ibabaw niining mga panyo, kay basin pangkuhaon na kini sa mga tawo sa dili pa mogabii.

I love Him, I love Him
Because He first loved me
And purchased my salvation
On Calvary's tree.

I love Him, I love Him.
Because He first loved me,

Karon itugyan lang ang inyong kinabuhi ngadto Kaniya.

And purchased my salvation
On Calv-. . .

447 Higugmaa, higugmaa, higugmaa ninyo siya. Tan-awa kung unsa ang Iyang gibuhay alang kaninyo. [Ginasugdan ni Igsoong Branham sa paglaylay ang *I Love Him*—Ed.] Pinaagi kini sa gugma. Ang gugma nagahatud og pagkamasinugtanon. Ang gugma nagahatud og mga pagpamarayeg. Ang gugma nagahatud og mga pagminyo. Ug dinha kita nagapaingon, Ang Pangkasal nga Panihapon sa Cordero. Madungog ko ang pagpanawag sa akong Manluluwas, nga ginahigugma Niya ako, usab. Ako, usab! Ako. . .

448 Tibuok sa inyong kasingkasing, nga mabati ang daw Sa Kung Unsang Butang nga pagkamalulot nga nagasulod kaninyo. Mao kana ang Balaang Espiritu.

Because He first love me
And purchased my salvation
On Calvary's tree.

449 Kung. . . Akong ginapataas ang akong mga kamot, uban sa mga tawo, dungan sa maong kanta. Kung ako'y nakasala, kung aduna man ako'y nahimong sayup. . .

Nagaampo ako karon para kanimo, ug para sa akong kaugalingon.

450 Kung aduna man ako'y nahimong sayup, ang naipataas kong kamot diha Kanimo, Ginoo, nagapasabot nga nagahangyo ako og pasaylo. Ang naipataas kong kamot diha Kanimo, Ginoo, nagakahulogan nga dili ko—dili ko buot nga buhaton kadto. Ug nahibalo ako nga duol na akong mamatay, Ginoo. Kinahanglan kong biyaan kini nga kalibutan, sa pormang pisikal. Gusto kong matagbo ko Ikaw. Ang naipataas kong kamot nagakahulogan nga, dawata kini, Ginoo. Pun-a ako sa Espiritu. Ihatag kanako ang Timaan sa Imong gugma kanako, ang Espiritu Santo, nga maoy magpakinabuhi kanako nga malumo, malulot, magpakinabuhi kanako sa Kinabuhi nga anaa

diha kang Cristo; aron nga ang akong kasingkasing magadilaab para sa uban, nga halos dili kini magpahulay, sa adlaw ug gabii, hangtud nga maagak ko ang tanan nga mahimo ko. Mamahimo akong sama sa mga mensahero didto sa Jericho; adtoon ko ang kada tawo nga mahimo ko, ug siguradohon nga maagak ko sila nga magpailalum sa pakigsaad nga iya sa Dugo, ilalum sa Dugo sa Cordero, aron nga madawat nila ang Timaan.


⁴⁵¹ Kita n'yo, nagahugas ang Dugo. Ang Espiritu maoy usa ka Timaan nga ang Dugo naaplikar na. Kita n'yo? Ang Espiritu mao ang Timaan nga ang Dugo naaplikar na. Hangtud nga wala pa naaplikar ang Dugo, ang—ang Espiritu dili mahimong moabot. Apan sa diha nga naaplikar na ang Dugo, nan ang Espiritu mao ang Timaan, ginapaanha kini kanimo, nga ang imong pagtoo sa Dugo gidawat na, nga ang imong plete nabayaran na. Ang imong plete nabayaran na. Human na. Sarado na ang kaso. Usa na ikaw ka Cristohanon. Usa na ikaw ka magtotoo. Si Cristo anaa na kanimo, ug ikaw anaa na kang Cristo.

... first loved me
And purchased my salvation
On Calvary's tree.

⁴⁵² Samtang nanagduko karon ang inyong mga kasingkasing sa atubangan sa Dios; ang inyong pastor, si Igsoong Neville, may mga patapos siyang mga pulong ug kung unsay iyang isulti.

⁴⁵³ Hinumdumi ninyo ang panerbisyo unyang gabii, panerbisyo sa pagpang-ayo. Pagpanganhi mo nga sayo pa. Magsugod kita sa alas siete, para makaanha ako sa entablado sa alas siete y media. Okay ba kana, Igsoong Neville? [Nagaingon si Igsoong Neville, "Okey kana."—Ed.] Karon magkaaduna kita og komunyon, kita n'yo, unyang gabii. Pag-anhi mo!

⁴⁵⁴ Unyang hapon, pagpabilin gyud diha Niini. Ayaw gayud tugoti nga mawala kini nga Mensahe. Timan-i, ayaw gayud tugoti nga mawala kini nga Mensahe!

⁴⁵⁵ Ang Dugo ang mamahimong Timaan nga ang Kinabuhi gihalad na. Kita n'yo? "Ug kon makita Ko ang Dugo, molabay Ako ibabaw kaninyo." Ang Balaang Espiritu mao ang Timaan nga ang Dugo naaplikar na diha sa inyong kasingkasing, ug mao Kini ang Timaan nga ang maong Dugo naaplikar na. Kung wala pa gayud kini naaplikar, kung ingon-ana dili moabot ang Timaan. Nasabtan ba ninyo? Pag-ingon, "Amen." [Nagaingon ang kongregasyon, "Amen."—Ed.] Kinahanglan nga maaplikar ang Dugo, ug dayon moabot ang Timaan. Usa Kini ka Timaan nga ang Dugo sa pagtubos naaplikar na ug ang imong plete nabayaran na. Panalanginan ka sa Dios. Igsoong Neville. 

TIMAAN CEB63-0901M
(Token)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Septyembre 1, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2016 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org